

maier
de Mont
planeta





Pharmacopœi Parisienses

ex Dono Magistri
Gillet

1766

Res 11407 11467

MICHAELIS MAJERI

VIATORIVM.

HOC EST,

DE MONTIBVS PLANETARVM
septem seu Metallorum;

TRACTATVS tam utilis, quàm perspicuus,
quo, ut Indice Mercuriali in trivijs, vel Ariad-
néo filo in Labyrintho, seu Cynosurâ in
Oceano Chynicorum errorum immenso,
quolibet rationalis, veritatis amans, ad illum,
qui in montibus sese abdidit DE Rubea-petra
Alexicacum, omnibus Medicis desideratum,
investigandum, uti poterit.



ROTHOMAGI,

Sumpt. IOANNIS BERTHELIN,
in area Palatii.

Anno M. D C. L I.

EPIGRAMMA AVTHORIS.

THeseus Pyrihoun sub Tartara dira secutus
Cautior ad superos retulit inde pedem:
At comes infœlix LAPIDI remoratus adhæsit,
Herculeæ nec vim sensit, ut ille, manus.
Ipse quoq; Ægides. Labyrinthi ambagibus errans
Sollicitat filum, Dux Ariadna, tuum:
Cujus ope evasit cavea discriminis expers,
In patriam fallax atque relegit iter.
Si tu, qui chymicos intrasti fortè labores,
Hunc, at Pyrihoun non, imitare ducem.
Herculis auxilium tibi vix promitto, sed à me,
Si fueris Theseus, Hac Ariadna datur.
Inde quod ambiguus in gressibus ultrò sequaris,
Expete, & invento tramite liber eris.
Prima viam ratio notet, Experientia quam mox
Edoceat, manuum continuúsq; labor.
Naturæ lustranda sacræ cunabula cures,
Nec tallet dubijs pagina scripta dolis,





ILLVSTRISSIMO ET SERENISSIMO
DOMINO, DOMINO

CHRISTIANO

PRINCIPI ANHALTINO,
COMITI IN ASCANIA, DOMINO
in Zerbesto & Berneburgo, &c. Superioris
Palatinatus Produci & Gubernatori, Heroi
Armis & Artibus Orbi notissimo, Domino
suo clementissimo D.D.D.

MICHAEL MAJERUS *C.P. Med. D.*



Ts i, Princeps Illustrissime,
hactenus per tot (dum chy-
micis præter Medicinam,
insudo laboribus) annorum
spatium, nihil edere in pu-
blicum constituerim, tùm
quia intelligam tot tamq; varios in hac
materia Authores in dies prodire, tùm
quia triumphum ante victoriam canere
mihi præposterum videatur, nihilominus

nonnulla nunc tandem opuscula, quæ ab experientia & observatione diutina jam pridem apud me concepi, uti minus dubia, potissimum ad commodum aliorum & utilitatem haud exiguam spectantia, cum Ars longa, vita brevis, judicium difficile; Experimentum autem periculofum, revera tam ratione Chymicæ, quàm Medicinæ, dicatur, edere non intermisi; ex quibus cum TRACTATUS hic de MONTIBUS Planetarum septem, hoc est, terrestrium seu metallorum mineris & substantijs ex montibus petitis, non minus utilis, quàm desideratus quamplurimis existeret, eum Celsit. Tuæ, grati animi causâ, haud immemor ab ea in me tantæ beneficentiæ olim effusæ, dedicare & offerre non dubitavi, non quasi Celsit. Tuam per se perspicacissimam hisce instruerem, sed ut aliis minùs exercitatis sub eius patrocinio quasi Ariadnam quandam Chymicam, cujus fili ductu ex erroribus incredibilibus tuti evaderent, suppeditem & re-

linquerem; quod ſcriptionis genus, cum
& novum & veraciſſimum ſit, niſi me ma-
nus, oculi & Vulcanus fallant unà cum ra-
tione experimentalì & experimento ratio-
nali, non eſt ambiguum, quin Celſit. Tuæ,
cui antehac mea qualiacunque à ſincera
tamen mente proſecta placuerint, pergra-
tum & acceptum futurum ſit, quam Deo
Opt. Max. unà cum dilectiſſima conjuge,
liberiſque Principib. commendo. Dabam
Francof. ad Moen. 1618. Menſe 7. bri.





PRÆFATIO

AD LECTOREM.



*P*VD antiquos , *C*andide
*L*ector, pulcherrima allegoria
 extat , quam *O*vidius lib. 2.
*M*etamorph. venustè descri-
 bit , hujus argumenti : *C*um *A*pollo regis
*A*dmeti armenta pasceret , *M*ercurius bo-
 ves quasdam , quæ longius processerant,
 furto abactas , in sylva occultavit , *B*at-
 toq̃ cuiusdam aquarum custodi , à quo uno
 visus fuerat , mandavit , ne cuiusdam illud
 furtum indicaret , quod ut libentius face-
 ret , vaccam ei dono dedit : *M*ercurius
 verò abiens , ut hominis experiretur fi-
 dem , sumptâ aliâ formâ paulò post ad
 eum redit , rogans an vaccas quasdam il-
 luc transeuntes vidisset , pollicitusque , si
 indicaret , vaccam cum tauro daturum :

Battus itaque spe muneris corruptus;

Montibus, inquit, erant, & erant
sub montibus illis;

*Indicans, ubi pascerentur; ob quam perfidiam Mercurius eum in lapidem, qui intriviis, ut Index, positus habetur, commutavit. Quid verò per boves antiqui, imò per ipsum Mercurium & Apollinem, intellexerint, alibi à nobis (utpote, Hieroglyphicis Ægyptio-Græcis) sat abundè explicatum est: Hic per boves Apollinis, ut & ibi, materiam Philosophicam accipimus, quæ quo monte à Mercurio abscondita sit, permulti in Chymicis occupati jam pridem scire exoptarunt: Alij quæsi-
verunt in diversis locis, ut agris, hortis, pratis, campis, fluvijs, rivis, fontibus & vallibus, (hoc est, seu vegetabilium, seu animalium, seu mineralium) at neutiquam invenerunt, etiamsi per totum vitæ tempus in id incubuerint: Haud rarus, instar Virgiliani illius Corydonis, Alexin formosissimum indagantis,*

Montibus & sylvis studio jactavit
inani,

vel Narcissum frustra insecutus est, ut
Echo nymp̃ha, quæ dum ad omnium vo-
ces respondit, sperans jam se optato amo-
re potituram, in invia & maciem cor-
poris redacta, spem cum substantia amisit,
nihilq̃ nisi cassam sine corpore VOCEM
retinuit. Quamplurimi, dum se pro amo-
re patriæ (ut olim Atheniensium juvenes)
ad conflictandum cum Minotauro (mate-
ria philosophica) obtulerunt, præter præ-
sentanea pericula ipsis à monstro impen-
dientia, in Labyrinthos inextricabiles in-
ciderunt; quorum, ut ratio nominis &
instituti melius agnoscatur, vetustis se-
culis quatuor fuisse perhibentur, Ægy-
ptius, Creticus, Lemnius & Italicus, at-
que ex istis priores duo maximè celeberrimi,
à varijs scriptoribus memorati.
De Cretico ita Virgil. lib. 5. Æn.

Vt quondam Cretâ fertur Laby-
rinthus in alta

Parietibus textum cœcis iter , an-
cipitêmq̃
Mille vijs habuisse dolum , qua si-
gna sequendi
Falleret indeprênsus & irremeabi-
lis error.

*Hic, veluti carcer, inclusus detinuit cap-
tivos, qui nihil passi sunt incommodi, nisi
quòd viarum perplexitate decepti illinc
evadere non potuerint : Magnificis sanè
operibus, tempore longo, labore inenarra-
bili Ægyptius à Miride rege Creticus à
Minoë, Dædalo operario, extructi nar-
rantur, non aliam ob causam, nisi ut divi-
tias abundantissimas suorum authorum
posteritati unà cum eorum perpetua me-
moriam testatas facerent. Ad hunc modum
in philosophia naturali Labyrinthus per-
plexissimus à diversis authoribus funda-
tus & educus animadvertitur, in quem,
quicunque incidant, vix unquam aut
rarissime inde se recipere poterunt ; Chy-
micos intelligo libros, quibus intricati*

Vix millesimi sese extricare solent, ita ut de exitu vero & indubitato certi sint. Quotusquisque enim ex tot scribentium numero aliud attestatus est, quàm ut se arcani Philosophi non ignarum declararet, ac interim sequentem sua vestigia involveret, injectisq; remoris detineret. Quis non araneum suis texturis & reticulis imitatus, qui quoties muscam in ea incidisse videt, accurrens, magis illam implicat, ne evadat, tantum abest, quod liberet? Rarissimus Atheniensium morem in his laudabilem sequitur, apud quos pro scelere habebatur, erranti non monstrasse viam, pro sacrilegio, ab ea magis abduxisse: Vnde illi ipsi Chymici authores protestantur, quod qui librorum medio ad artis veritatem desideret, *vix* unquam ad eam perventurus sit, nempe propter librorum ambages & errores inextricabiles, ad quos declinandos aut evitandos, nemo primâ fronte discretus sit, nisi fortè experientia longi temporis

indefessa & incessabilis ipsum post im-
mensos labores exhaustos & sumptus in-
terpositos haud exiguos circumspectum
reddat & erudiat, eique NATURÆ
gremium aperiatur & ostendat, ex imper-
scrutabili Dei consilio: Et si verò causæ
eorum obscuritatis sint valde probabiles,
ne scilicet indignus omnino ad verticem
collis secretissimi, nec dignus, nisi post
multas vexationes prævias, ascendat, ta-
men hæ non sufficiunt ad omnem verita-
tem tenebris & erroribus etiam prædoci-
libus artis filiis involuendam & obscu-
randam; quibus ut remedium aliquod ac-
commodatius inveniatur, ego, qui in La-
byrintho hæc ipso diutius detentus fue-
rim, non ignorans, quo desiderio sperato
& successu singula incepta & finita sint,
quidve sub quibus montibus quæri aut
reperiri possit, constitui MONTES om-
nes planetarum perreptare, peruestigare,
ascendere, inque eorum mineras singulas
profundissime descendere, omnibusque

ratione præditis ob oculos ponere, quid ex quibus & quomodo elici aut haberi possit, ne & ipsi, nisi omnino sint increduli aut omnium rerum rudes, eandem glaciem perfringere, aut errores errare opus habeant. Qui sane tractatus non (velut nauta ex tabula) otiosâ speculatione, quæ sæpe inutilis est & phantastica, nec cum re ipsa convenit, sed rerum, quæ hîc traduntur, experientiâ & usu profectus & deductus, si quisquam alius, Lectori utilissimus accidere poterit, ita ut vel Ariadnæi fili, vel Cynosuræ, vel Indicis trivialis instar in hoc studio & stadio longissimo, aut potius Labyrintho intricatissimo & Oceano immenso, non injuriâ haberi debeat. Hic enim quemcunque in montibus errantem & non agnoscentem (ut Arnoldus in novo Lum. cap. 1. conqueritur) materiam philosophicam, cum palàm, eodem teste, vendatur nimio precio, in modum Batti illius Indicis ad locum ubi Apis seu Bos Ægyptius tegatur, redu-

cet, nec minus Thesea per anfractus & multiplices viarum dolos ambiguum in adyta intima & penetralia artis mittet & remittet, aut vagum in fluctibus marinis, velut cynosura certa, ad foelicem portum, diriget & sistet. Etiam si verò non demonstret, quæ sit individua & infallibilis ejus materiæ species, (quod ab omni ratione alienum) tamen quæ non sit, & multa alia à nobis observata, quæ tyroni aliàs incredibilia & non sat explorata, proponit dilucidissime hac cautione, ne quis in multiplicia illa & frustra-
nei laboris diverticula in initio incidat, aut si inciderit, quibus notis id sciat, ut mature pedem retrò vertat, aliòsque ingressus in hunc Labyrinthum querat, quo gratissimum tandem exitum seu optatum finem latus inveniat. Nam qui nescit quid querit, nescit quoque quid reperiet, ac qui in principio errat, nunquam ad media, multò minus ad extrema pertinget, cum error errorem pariat

*& multiplicet. Nostro itaque labore,
ut sis cautus, Lector, inque eum & meip-
sum candidus, hoc fruiere lubens absque
invidia, quæ ubi sit, ut nec scriptorem
obscuritatis, ita nec lectorem detrectatio-
nis à vitio excusat. Vale.*





DE MONTIBVS PLANETARVM SEPTEM.

TRACTATVS DIVISIO.



CORNELIUS TACITUS
lib. Annalium 16. nar-
rat historiã memora-
bilem & scitu dignissi-
mam de Cecellio Bas-
so, qui in somnijs no-
cturnis falsus de auro,

in suis agris, ut credēbat, antiquitus de-
fosso, Neroni Principi immensos thesau-
ros pollicitus sit, in hunc modum: Illusit
dehinc Neroni fortuna per vanitatem ip-
sius expromisso Cecellii Bassi, qui origi-
ne Poenus, menteturbidã nocturnæ quie-
tis imaginem ad spem haud dubiam re-
traxit: Vectusque Romam, principis adi-
tum emeratus, expromit repertum in

agro suo specuni altitudine inamensâ,
quò magna vis auri contineretur, non in
formam pecuniæ, sed rudi & antiquo
pondere: Lateres quippe prægraves ja-
cere à partibus parte alia columnis, quæ
per tantum ævi occulta, augendis præ-
sentibus bonis. Cæterum, ut conjectu-
ra demonstrat, Didonem Phenissam Ty-
ro profugam conditâ Carthagine, illas
opes abdidisse, ne novus populus nimia
pecunia laiciveret, aut Reges Numida-
rum & alia infensi, cupidine auri ad bel-
lum accenderentur. Igitur Nero non au-
thoris, non ipsius negotii fide satis spe-
ctatâ, nec missis visoribus, per quos nos-
ceret, an vera assererentur, auget ultro
rumorem, mittitque, qui velut partem
prædam adveherent. Dantur triremes
& dilectum navigium juvandæ festina-
tioni, nec aliud per illos dies populus,
credulitate prodentis, diversa fama tu-
lerat. Ac forte quinquennale ludicrum
secundo lustro celebrabatur, oratori-
bûsque, præcipua materia in laudem
principis assumpta est: Non enim tantum
solitas fruges, nec metallis confusum
aurum gigni, sed nova ubertate prove-
nire terras & obvias opes deferre deos,

quæque alia summa facundia nec minore adulatione servilia fingeant, securi de facilitate credentis. Gliscibat interim luxuria spe inani, consumebanturque veteres opes, quasi oblati, quas multos per annos prodigeret: Quin & inde jam largiebatur: Et divitiarum expectatio inter causas paupertatis publicæ erat. Nam Bassus effosso agro suo latisque circum arvis, dum hunc vel illum locum promissi specus adseverat, sequunturque non modò milites, sed populus agrestium efficiendo operi assumptus, tandem posita vecordia, non falsa ante somnia sua seque tunc primum elusum admirans pudorem & murum morte voluntaria effugit. Quidam vinctum ac mox dimissum tradidit, ademptis bonis in locum regis gazæ. *Hæc ille.* Tale quid in chymicis operibus indies contingere, nemo non animadvertit, in quibus si non mera somnia, tamen his similia cogitata sæpenumero spes immensas cuique nimis credulo promittunt. Quicquid enim quisquam vel semel animo præconceperit, ad id non difficile erit authorum dicta & opera applicare, miro quasi modo concor-

dantia, quibus tamen effectus rei speratus minimè correspondeat: Vnde permulti vel totam artem præposterè damnant vel in desperationem ipsi incidunt, cum jacturam bonorum, ætatis, famæ, & patriæ passi sint vel alios pati sentiant. His malis omnibus, licet ex bona intentione & scriptorum & operantium originem ducentibus, ut aliquod Alexicâcon, quoad possibile, ponamus, antequam Labyrinthum hunc chymicum penitus ingrediamur, de vera porta solliciti esse debemus, quâ inventa, de progressu prosperiori, non est, quod dubitemus. Est autem hæc porta nihil aliud, quàm initium operis, hoc est, vera & una materia Philosophorum omnium, de qua verè dici possit; Dimidium esse plus toto, & dimidium facti, qui bene cœpit, habet. Nam qui sumit, quod debet sumere, jam ingressus est viam veritatis regiã, à qua se seduci non finet, etiamsi non parum nunc ad hæc, nunc ad illa diverticula ut excurrat, necessum sit. Nulla autem econtra veritatis inveniendæ spes est illi, qui quid pro quo, imò naturæ & arti adversum elaborare & ad suum nutum reducere

nititur. Hunc ad dehortandum, illum ad confirmandum ex THEBIS Ægyptiis Centiporeis; propter magnitudinem nimis diffusè patentibus, ad Bœoticas illas seu Cadmeas, septem portarum nos conferemus, hoc est, ex ferè centenis materiis, quæ vel poterunt ad opus assumi, vel assumptæ sint unquam ab aliis licet frustra, septem considerabimus, nempe Metallicas, intércue illas delectum instituemus, proposito convenientem; atque sic tractatum hunc in totidem seu septem capita dividemus, quorum singulis cursum aliquem peculiarem, seu descensum in Montem minerum feracem, initio factò semper ab uno eorum in Labyrinthi chymici anfractuosos flexus productum absolvemus, non sine Ariadnes rationabilis adminiculo & filo, quo cuique non tam in manum, quàm mentem tradimus, eúmque Deo commendamus.

CAP. I.

De Monte Mercurij.

QUod antea, in præfatione, de bove Apollinea à Mercurio abacta & clam sub monte aliquo disposita retulimus, id in primis de materia Philosophica, ut dictum, intelligi debet. Hanc ut inquiramus, de monte ad montem ibimus singulæque loca & claustra perscrutabimur. Est autem rationabile, quod Mercurius hanc sub proprij nominis monte, tanquam arca, concluderet, quocirca hunc omnium primò rimabimur. Mercurius etsi metallum propriè non sit, quia nec malleabilitatem, aut extensionem sub malleo, nec cum aliis metallis permixtionem naturalem præ se ferat, tamen quia omnibus metallis, & præcipuè auro, ob naturæ similitudinem amicari videatur, ac plaræque eorum per artem influentem Mercurium reduci possint, non immerito à chymicis pro aqua minerali, ex qua metalla admixtione sulfuris vel fixi magis aut minus, vel non fixi, puri, vel impuri, congelata sint, habetur. Cujus

sententiæ argumenta nec asserere nec infirmare hic nostri est propositi, at saltem demonstrare, quomodo ad artis usum Mercurius adhibeatur, qui omnino triplex est, ut & aliorum metallorum sequentium, nempe primo ad aurum, secundò ad Tincturam, tertio ad Medicinam; Hoc est, nonnulli, qui Mercurio utuntur in chymicis operibus respiciunt eò, ut in aurum congeletur per se vel cum quibusdam additamentis: Nonnulli, ut inde Tinctura seu lapis philosophicus conficiatur, per se vel cum aliis: Quidam, ut ad medicinam solum corporis humani usurpetur. De quibus singulis hoc primò capite suo ordine dicturi sumus, ut prospiciatur, quid tandem ex Mercurio fieri possit, ad quam rem sit utilis aut non, & quid de eo sperandum. Philosophi quando loquuntur, de Mercurio, non semper intelligunt hunc vulgo cognitum, fluentem, crudum & aqueum, sed sæpissimè suum illum Philosophicum, de quo inquisitio hæc nostra instituta est. Hunc nominant omnium rerum nominibus ne agnoscat & ex omnibus rebus educti asserunt, eandem ob causam: qui tamen semel cognitus,

operarium non sua spe frustratur : De hoc dicitur ; Est in Mercurio quicquid quarunt sapientes : Et Mercurius novies sublimatus est totius Magisterii finis.

De I. usu Mercurij ad aurum , in quod coagulandus præsumitur.

Aurum , in quod Mercurius communis seu vulgaris congelari à quibusdam desideratur , cum sit omnium metallorum perfectissimum , summus apex , & quasi terminus , ad quem per naturam pleraque eorum transeunt aut artificio deducenda sunt , ideò hic ejus natura, quoad huic proposito sufficiat , definienda & ex suis proprietatibus tam essentialibus , quàm accidentalibus circumscribenda est. Geber in summa perfectæ ejus duplicem definitionem posuit , quarum prima est parte tertia, cap. 32. hujusmodi : *Aurum est corpus metallicum , citrinum , ponderosum , mutum , fulgidum , equaliter in ventre terræ digestum , aquâ minerali diutissimè lavatum , sub malleo extensibile , fusibile , examinationem Cineritij & cementi tolerans , secunda definitio est ibidem lib. 2. cap. 5.*

Estigitur sol creatus ex subtilissima substantia argenti vivi & clarissima fixura, & ex substantia pauca sulfuris mundi & puræ rubedinis, fixi, clari & à natura sua mutati, tingentis illam. Ex quibus constat, aurum totum esse Mercurialem substantiam, in qua sit mixtio omnium elementorum perfectissima & juxta qualitates eorum æquata. An jam ex Mercurio coagulato talis mixtura fieri possit, & quomodo, disquirendum venit. Est autem Mercurius substantia frigida & humida, ideoque fluens, non æquata in elementorum qualitatibus, volatilis tota in igne & evanescens, licet non in partes compositi resolvatur, sed omnis ascendat, hoc est, terra cum aqua, aëre & igne, & nullum elementum facile ab alio segregetur. Auri quidem ponderositatem, fulgorem & homogeneitatem in se habet, sed in aliis proprietatibus ab eo deficit, nempe in citrinitate, malleabilitate, ignibilitate, duratione in igne & auri examinibus, ac demum in æquatione qualitatum omnium. Videamus primò, an aurum naturaliter nonnunquâ ex Mercurio coagulato proveniat aut nascatur: si hoc, fortè quoque possibile esset, id inde provenire per ar-

tem : si non , de coagulatione hujus , ut non naturali , cogitandum non est. Duplici autem modo invenitur talis Mercurius , uno extra suam mineram in fossa subterranea collectus & currens , vel circa superficiem terræ in herbis aut aliis retinaculis aut cavitatibus , quorsum , versus inferiora scilicet , suo pondere defluxit , versus superiora per distillationem in fumi specie ascendit ; altero in sua minera seu cinabari nativâ , ex qua per ignis vim distillatione elicitur. Sunt , qui dicunt , quemlibet Mercurium aliquid auri in se continere , ideóque mirantur id non separari in illis locis , ubi invenitur Mercurius. Verum fides sit penes suos authores : Ego tale quid neque experimento proprio , neque lectione ex aliis cognovi : si de Mercurio in minera sua adhuc manente intelligi volunt , aliquid forsân dicunt , si de Mercurio extra mineram existente & venali , aurum adscititium ipsi videtur. Nam & in fossis subterraneis & fluviis , ubi ille Mercurius eâ formâ colligitur , auri tenuissimas particulas in se imbibere solet & potest. Cinabaris illa nativa absque dubio nihil perfecti metalli in se conti-

net: Hæc invenitur interdum eodem colore & figura, qua argenti vena sanguinea (*Rothguldig*) dicta apparet, sed nihilominus ex igne evolat & argenti vivi naturam ostendit: Idem sentiendum de eo Mercurio, qui extra mineram suam collectus invenitur, quod aurum naturaliter in se minimè contineat, sed permixtione superveniente: Non tamen interim negamus, Mercurium in aurum à natura succedente tempore, coagulari, nempe intermediis metallis imperfectis. Vt enim ab extremo ad extremum non datur transitus, nisi per suum medium, tam secundum naturam, quam artem, ita nec Mercurius coagulabitur in aurum, nisi transeat per metalla auro imperfectiora: Nam in natura metallica Mercurius & aurum longissimo intervallo, & tanquam revera extrema duo à se invicem distant; Et metalla imperfecta vel huic, vel illi magis appropinquant, tanquam intermedia inter utrumque. Quis inficias ibit, aurum ex argento peti, argentum ex plumbo? Quis non videt affinitatem plumbi & Mercurij non admodum remotam, adeò ut aliquando experimentum viderim cum ar-

Experimentum.

gento vivo per fumum plumbi coagulato, quod cemento ex tegulis antiquis & scoria ferri in tigillo strato super stratum facto, & per tres horas in igne gradatim aucto retentum in plumbeam, vel omnino ei similem, transierit. Vnde nonnulli promittunt quoque lapidificam vim coagulantem argentum vivum in plumbum, quod an præstare possint, ipsi viderint, mihi eo non fit verisimile. Mercurius itaque, si à natura in plumbum, plumbum in argentum, argentum in aurum mutetur, hac ratione ex Mercurio sit aurum, sed longissimo tempore, fortè mille annorum, intercedente. Quo dato, consideremus modum hujus mutationis: Mercurius cum sit fumosa substantia, ut frigida & humida, non coagulatur à natura, nisi à sulfure, quod est valdè calidum & siccum. Hæ duæ substantiæ generantur ex mixtione elementorum in visceribus terræ, singulæ primo per se ex Dei singulari providentia: Mercurius ex aqua ita mixta cum terra & proportionata, ut hæc illam non deferat, & econtrà; sed si calor accedat, & aqua ejus urgeatur, ut rareseat in aërem, ipsa quoque terra unà transeat in aërem seu fumum, hoc est,

non separetur aut in fundo relinquatur ab illa: si iterum frigus vincat, aut loci angustia cogat, ut ex fumo aërio iterum fiat aqua per condensationem, eadem elementa indivisa permanent: Hinc fit, ut superficiem transcurrat & non humectet, quod est manifestum signum ejus humiditatis aqueæ, non tamen separabilis à terra sua: In sulfure similiter ita elementa sunt commixta, ut non facile ab invicem segrementur, in quo tamen prædominantur calida & sicca. Unde sulfur positum ad ignem validum totum ascendit in fumi speciem, relictis terrestreitatibus, & post coagulatur iterum in sulphur, quod frigore accedente fit friabile & durum. Non autem ignoro, sulfuris oleum factum per campanam, ut vocant, seu alembicum, esse liquidum & non durum, nec idem sulfur, quod prius, in fundo relictis partibus quibusdam, quæ dant duritiem: Ac considero hic, quomodo fiat sulfur commune ex suis mineris, nempe per unctionem & ignis incensionem inferius, superjectis mineris sulfureis, ac per strangulationem seu mortificationem superius (ut fiunt carbones ex lignis) tum fumi

sulfurei ascendentes per contiguitatem
minerarum in superficie summa frigore
coagulantur in sulfur liquidum, quod
depuratur postea per distillationem in
valis retortis: Hoc modo id fieri vidi
Goslariæ in Saxonia ex mineris æris
& plumbi (ex monte Rammo petitis)
valde sulfureis. Sed aliter id fit jam Sne-
bergæ & non procul à Geir in sylva,
nempe ex minera sulfurea nil metallici
continentē, nisi forte quid exiguum
(quod non respicitur) dante simul sul-
fur, arsenicum, vitriolum, ocræ seu
flavum & rubrum (*Bergrodt*) colorem
dictum: sulfur itaque cum in suis parti-
bus quasi inseparabile maneat, ascen-
dens calore subterraneo à centro ad cir-
cumferentiam, hoc est, à magis interio-
ribus terræ partibus versus superficiem
magis propinquas; ac similiter argen-
tum vivum eodem modo ascendens,
vtrumque in fumi specie seu aëria for-
ma, complexantur se invicem, veluti
mas & foemina, donec in cavitatem
quandam saxosam, superius tectam in-
cidant, in qua hi duo fumi coacervati
aut cumulati semper novis ascendentibus,
vel noctis superveniente frigore

alióve accidente, vel suâ copiâ coagulantur in massam duram & metallicam, quæ postea pro minera plumbi agnoscitur & eruitur. Quòd si verò alia atque alia fuerit proportio horum duorum fumorum, ac calor differens, locúsque, qui locatum continet & appropriat sibi, aliquâ qualitate imbutus hinc varia genera minerarum metallicarum oriuntur, de quibus hic nihil addimus. Sufficit n. saltem demonstrasse rudi Minerva, quomodo ex Mercurio illo liquido & fumoso, necnon ex sulfure illo calidissimo & igneo, in terræ visceribus generentur metalla imperfecta, in primis plumbum & stannum, tanquam minus cocta in suis mineris. An verò mox quasi è vestigio, quam primùm hi duo fumi se invicem complexi, sint metallum imperfectum, ut pote plumbum, de eo dubitari potest; an verò longiori tempore, ut hoc fiant, maturentur; Hæc etsi sine arcana naturæ opera, quæ mirabiliter operatur supra humanæ mentis captum, in singulis aliis, utpote hominis formatione in utero, cæterorumque animalium & vegetabilium, tamen dicam, quid sentiam, experientia tum propria, tum aliorum ductus: Ut

conceptionis hominis dicitur fieri in momento, & sic omnis generatio, seu introductio formæ novæ in materiam, sic cogitandum est, hanc fieri metallorū transformationem secundum naturam. Hinc constat, quamprimum hi duo fumi sint conjuncti & coagulati, ut dictū, speciem aliquam metallicam licet crudam, representent. Qua propter nunquam contigit, quod metallarii, qui scrutantur metalla, fossores, inciderint in substantiam aliquā compositam, quæ esset sulfur & argentum vivum simul, necdum tamen metallum, hoc est, plumbum aut stannum: Quo argumento quidam ineptè demonstrare conantur, argentum vivum & sulfur non esse principia metallorum, quia nunquam simul inventa sint in unis fodinis, nec substantia aliqua media inter metallum & horum mixturam: Verū illi ipsi hoc modo raciocinantes falluntur & à seipsis, si animadvertant, refutantur: si enim vel in eodem die & hora, qua conjunctio horum fumorum contingit, introductio fiat novæ formæ metallicæ, sive opus sit integro anno aut amplius, perinde est; quemadmodum referunt de homine, quod primis septem

tem diebus formetur Embryonis species ex semine, ac sequenti tempore augmentetur; Attamen verisimile est, quod hoc de mutatione sensibili, quatenus discerni possit à nobis, intelligendum sit; Cum axiomata hæc physica maneant inconcussa; Nullam rem posse habere duas vel plures formas physicas simul, sed saltem unam; Et, Nunquam esse absque forma, Et, substantiam seu essentiam non recipere magis & minus; Et, Generationem seu introductionem formæ fieri in momento, quæ omnia sunt unius generis & intentionis: Nihilominus si demus mutationem hanc fieri in tempore, quis nostrum hoc intermedium tempus animadvertere potuit, cū fortè in metallicas has mineras post centenos aliquot annos ab eorum primâ mixtione incidamus. Non enim ita se res habet cum ipsis, ut cum animalibus & vegetabilibus, quæ apud nos sunt in promptu: Vnde non mirandum, si hæc ignorentur tanquam remota & abscondita, cum nunquam obstetricis munere in horum ortu homo fungatur, sed natura hæc ut arcana, ex se se absque hominis interventu producat: si elephas, camelus, & multa alia

animalia, tam secretè coeunt inter se, ut rarissimè homo id videat arbiter, quid dicemus de his fumis subterraneis. Elephas ducentos perdurat annos & 60. juventutem conservat: ut scribunt: Unde quis hominum ejus ortui & senectuti simul unquam adfuit; Annon permulti aestimarunt elephantem decem integros annos uterum gerere, cum tamen experientia aliorum convincat, saltem biennium; si hoc in animalibus, quæ sunt homini subjecta & præsentia, quid dicemus fieri in illis subterraneis occultis, longioris ætatis, fortioris mixtionis & subtilioris essentiæ individuis; Quam primum itaque horum fumorum mutua complexio facta est, præsupponimus esse metalli imperfecti mineram, exempli gratia, plumbi in quo tamen eodem tempore Embryo perfectionis, hoc est, argenti, apparet: Nam nullum plumbum in minera invenitur omnino absque argento, sive in parva seu magna quantitate: Scimus quædam plumbi genera tantillum continere, ut pro nullo, quo ad sensum, habeatur, sed revera semper aliquid abscondunt: Villacense, quo in Germania plærunque ad probationem minerarum

per cupellum utuntur, tanquam nihil argenti habeat, æstimatur, sed quo ad sensum intelligendo, non ad rei naturam ac rationem: si enim ejus plumbi viginti centenarii in pondere (vt mihi pro certo ab aliis probatoribus relatum est) contineant saltem unam semiunciam seu lotonem argenti puri, tum drachma una istius plumbi (que plerumque refert centenarium decimasticum) quantum habebit argenti? Certe hoc quantum ad sensum pro nullo reputatur; quantum ad rationem, pro aliqua tamen quantitate, licet exigua. Nam si 256000. drachmæ, (hoc est, 15360000. grana) plumbi dant 240. grana, (hoc est semiunciam) argenti puri, tum una drachma (seu 60. grana) plumbi, dabit aliquid, sed nec sensibile nec notabile: nempe 64000. grana plumbi, habent unum granum argenti, aut vice versa, drachma vna (seu 60. grana) plumbi habet circiter millesimam partem unius grani argenti, seu unum granum plumbi habet 64000. partem grani argenti: Ex quibus convincitur, perfecta ex imperfectis à natura sensim educi, ut ex eruca papilio, ex verme repente insectum

volans , nova quādam assumptā figurā
non quidem de novo generatur , sed
quasi perficitur. Dum enim sulfur illud
calidum & siccum agit in argentum vi-
vum , frigidum & humidum sibi vapo-
rabiliter commixtum , calore subterra-
neo incitatum & motum , semper ejus
humiditatis & frigiditatis exiguum quid
vincit & sibi assimilat , hoc est , aliquan-
tulum caliditatis & siccitatis in Mercu-
rium introducit , quæ duæ qualitates , ut
agentes , cum illis , ut patientibus junctæ
æquationem faciunt metalli , quæ est ar-
gento propria. Hinc quando plumbi mi-
nera ignibus fortibus exponitur , confluit
in massam plumbeam , quæ habet in se
fortè mille partes frigiditatis & humidi-
tatis respectu argenti vivi , & tantundem
respectu sulphuris illi admixti , sed in
ipso argento vivo ab hoc sulfure longio-
ri tempore duæ vel tres partes aut plures
caliditatis & siccitatis factæ sunt. Vnde
probatione factâ per cineritium , eli-
ciuntur hæ duæ vel tres partes in Mer-
curio calidæ & siccæ , quæ totidem de fri-
gidis & humidis secum assumunt , &
per consequens granum argenti osten-
dunt. Quicquid de plumbo hic dicitur ,

similiter de aliis intelligendum est imperfectis, quamvis non à stanno & ferro ita separetur illud granum, veluti à plumbo & ære. Ex hæcenus dictis patet, quomodo argentum vivum in imperfecta, imperfecta in perfecta transeant: si itaque coagulandum sit argentum vivum ab arte, necessum est, ut id fiat ad imitationem naturæ: Verum in his naturam imitari non possumus, quæ operatur longissimo tempore in suis vasis occultis, medio sulfuris admixti certa qualitate & quantitate, calore moderato & conueniente. Quæ omnia cùm ab arte fieri nequeant, patet Mercurium nullo modo in aurum coagulari posse ab arte; Nec per se absque additione, quia natura ita non procedit, sed cum admixto sulfure, nec cum hoc, propter causas jam dictas. Nullus itaque hoc sibi præsumat, cùm verum aurum & naturale hac ratione neutiquam valeat producere, sed massam fortè aliquam, quæ in prædicamento substantiæ aut curâ naturæ locum non inueniat. Deerunt enim ejusmodi coagulato Mercurio antea dictæ proprietates auri & vera essentia, ideoque vt pictum aliqua carbone vel cre-

ta facta differt à vivo homine, cujus est imago, sic hoc aurum sophisticum, aut hæc massa ex Mercurio coagulata differt ab auro naturali & vero. Quæ hæcenus dicta sunt, quemlibet rationalem ab innumeris erroribus, qui fiunt circa Mercurium in aurum coagulandum, si modo rationi & monitis sit obsequens, præcavere ac vendicare possunt. Nunc videbinus & percurremus, quid factum fuerit & inuentum ab illis, qui Mercurium ita in aurum coagulare præsumperunt: Primò omnium sese offert Mercurius cum fumo plumbi congelatus, qui omnibus chymistis ferè notus est, & ab aliquibus in magno habetur precio, quasi sit non fallax rudimentum & indicium ad perfectam illam coagulationem præstandam. Operatio vulgarior est, quàm ut multis tradi debeat: Plumbum liquefit in olla, cui ab igne remoto, cum jam congelascere incipit, cum lapide quodam rotundo imprimitur fossa, in quam (concreto plumbo) argentum vivum infunditur, quod mox in massam quandam friabilem & albam congelatur. De hac aliqui referunt, quod possint eam reddere malleabilem & tin-

Y.
Mercurii
coagula-
tio à
fumo
plumbi.

Etiam citrino colore: verum nugantur,
& quod in phantasia conceperunt, re
autem nunquam præstiterunt, quasi
præstitum sibi aliisque persuadere co-
nentur. Nonnulli, ut antea monui, cum
hac massa ita coagulata procedunt, ut
huic minor aliqua quantitas Mercurii
non coagulati addatur & in vase admi-
nistrato calore arenæ vel cineris coagu-
letur in massam consimilem priori; Vn-
de affirmant posse fieri lapidem plum-
bificum ex argento vivo, hoc coagu-
lantem in plumbum perpetua congela-
tione: At hæc licet absque utilitate sint,
ideoque nulli, qui lucrum quærat, ten-
tanda, tamen dicta videntur, ut possi-
bilitas & modus artis demonstraretur, qua
ratione & hypotheses seu paradoxa, mi-
nimè cum re, quam declarant, conve-
nientia, tanquam vera conceduntur.
Argentum enim vivum illud fumo
plumbi coagulatum non fit plumbum
naturale, nec aspectu, nec alia quacun-
que proprietate, nisi illi admisceatur,
quid de eo per fusionem in igne, sed
manet argentum vivum, ut antea, dem-
ptâ liquiditate currente, ejusque vice
accedente friabilitate, malleum non

2.
Ex *N. erã*
curio plū-
bi sicut
lapis quo-
rundam.

admittente : In igne absque dubio ascendet, ut prius, & in pristinam fumosam, deinde aqueam ponderosam substantiam (quamvis id non expertus sim) redibit, eadem volatilitate circumscriptum: si igitur est argentum vivum, quomodo in plumbum sui simile coagulabit? Imò nec hoc coagulabit, ut opinor, sed ab eo ad liquiditatem potius reducetur: Invanum itaque ejusmodi esset labor, cum nec pro ludrica nec seria re correspondeat intentioni. Verùm alii animadvertentes à plumbo sulfur vaporosum emissum hujus coagulationis causam existere, varias ingressi sunt vias, ut idem vel cum plumbo, vel cum sulfure coagularent, quorum quoque operatio cum naturæ sit adversa, sub fine frustrata est: sulfur, ut dictum, in mineris coagulat suum argentum vivum, cui naturaliter admixtum est, in imperfecta, & hæc in argentum & aurum: Vnde stulti sunt, qui ad hanc operationem præstandam non potiùs imperfecta ipsa assumant, quam argentum vivum adeo crudum, humidum & frigidum, in quod à natura nullæ qualitates calidæ & siccæ (de elementis non loquor latentibus

7.
Eiusdem
coagulationis
cum
aliis.

sub prædominantibus) introductæ sunt.

Quis enim nisi insanus ex galo & gallina femina extrahat & cōjungat; ut ex iis faciat ovum, ex ovo producat pullū, cum ejusmodi ova habeat à natura generata.

*Demonstratio
vanitatis
multorum.*

Idem statuendum de Mercurio in metal-
la imperfecta coagulando, & post imper-
fecta cum imperfecta naturalia habeantur in copia, quæ ignem nunquam attige-
rint: Ergo horum omnium intentio est
phantastica, quicquid conceperint de
Mercurio, quod sit aurum, si sit coagu-
latum; tinctum & fixum: Nam hoc opus
hic labor est, non solū efficere coagu-
latum, tinctum & fixum, sed & ut cor-
respondeat in aliis proprietatibus auri,
quæ antea relatæ fuerunt, quod est im-
possibile. Ne quis verò existimet, me in-
telligere hic omnino argenti vivi coagu-
lationem esse impossibilem quocunque
modo, cum sciamus & notum sit, per tin-
cturæ aurificæ additionem in dimidia ho-
ræ operationem perfici; Verū quod hæc
tinctura seu forma auri non sit in ipso ar-
gento vivo, nisi forte in potētia remotis-
sima, quam inde nemo educere poterit,
ita ut materia & forma, hoc est, patiens
& agens, argenti vivi pars maneat si-

mul, illæſa alterutra: Nam demus, quod argentum vivum fiat per artem abique corroſivis aut peregrinis additis calidum & ſiccum, at interim ubi manebunt partes ejus humidæ & frigidæ, quæ debent in quantitate elementorum longè excedere quantitatem calidorum & ſiccorum, in quantitate verò qualitatum eorundem æquare: ſic argentum vivum totum vel manet humidum & frigidum, ut prius, & non erit aurum, vel mutabitur per artem in calidum & ſiccum, pereunte ferè omni humiditate & frigiditate ejus, & neque ſic aurum, ſed ſubſtantia aliqua intractabilis ad vitrum vel terram potius accedens, quam aurum. Quæ qualitates humidæ & frigidæ. nec non calidæ & ſiccæ, ſi aurum fiat à natura ex argento vivo mediis imperfectis, non deſtruuntur, ſed æquantur: Ita quoque contingit ſi tinctura aurifica, quæ calida eſt & ſicca in ſubjecto humido argento vivo addatur, ut illud æquet & coagulet in aurum: Eſt itaque Mercurii coagulatio in aurum poſſibilis per naturam & artem, par naturam, via metallorum imperfectorum; per artem, via tincturæ perfectæ: At præter has

vias omnino impossibilis. Præterea qui cinnabarim factitiam illam primitus fecerunt, Mercurium in aurum medio sulfuris coagulâre conati sunt: Hinc Theophrastus ille genuinus Aristotelis discipulus (non ille Bombastus) scribit, quod cinnabaris in Epheso fiat arte καὶ ἐργασίας, cum in colchis & Hyberia nascatur sponte natura αὐτοφύεις. Et memorat Calliam quendam fecisse cinnabarim, cum se aurum facere præsumeret, quod magis credibile est, quàm vice versa, quod pharmacarius quidem, ut narrant, cum cinnabarim facere tentaret, aurum confecerit: Cum enim aurum ex argento vivo & sulfure fieri naturaliter dicatur, inde hujus naturalis compositionis imitatores videri voluerunt, qui Mercurium & sulfur cōmunia conjunxerunt: & ad ignem sublimando in cinnabarim, non in aurum, coxerunt: Verùm falli sunt in eo, quod sulfur illud sumpserunt, à quo auri substantia est alienissima, nec quicquam in sese possidet, quod dum manet in metallis, ea manent imperfecta, dum separatum est, in perfecta migrant. Natura quidem medio illius sulfuris, ut ante traditū, aurum generavit, tanquam alicujus

Ex Mer-
curio Cin-
nabaris
factitia
pro auro.

instrumenti adminiculo, quod operatione perfecta, ab opere suo omnino segregavit, quemadmodum faber aut mechanicus utitur malleo, igne vel aqua pro instrumentis & mediis, quæ omnia non manent apud res arte factas: Aurum omnino expers est sulfuris communis, & ejus loco aliud sulfur obtinet nempe metallicum ex argenti vivi substantia productum, quod homogeneous illi sit, nec extraneum, à quo sulfur commune longissimo intervallo distat: Hoc enim comburit & ipsum est combustibile, illud neutiquam: Hoc nigredinem, imperfectionem & interitum metallorum causatur, illud citrinitatem, perfectionem & in igni constantiam: Vnde Disdiapason, quod ajunt, ab invicem hæc duo sulfura differunt. Cum itaque cinnabaris factitia componatur ex argento vivo & sulfure communibus, nihil cum auro habet commercii, nec cum auri sulfure aut tinctura, sed quando igni validiori adjungetur, facillimè separabuntur ejus partes, nempe ut argentum vivum fumi instar abeat & in suam naturam redeat, sulfur verò comburatur, terrestribus quibusdam facibus reli-

Etis, quæ si urgeantur igne, in vitrum a-
beant. Nonnulli considerantes hanc ful-
furis combustibilis & comburentis natu-
ram, ab eo abstinere in coagulando
Mercurio; & metallico aliquo sulfure,
ut existimant utuntur, aut ex salibus aut
vegetabilibus diversis petito: Marti vi-
dent Mercurium non adhaerere, propter
ejus sulfuris fixi aut terrestris naturæ
abundantiam, & argenti vivi paucita-
tem, ideoque sumunt aut ipsum aurum,
aut argentum, aut cuprum, cumque his,
quia fixa sunt, ignibilia & fusibilia cor-
pora arbitrantur sese Mercurium fixum,
ignibilem & fusibilem effecturos: Cum
auro, quod habet in se sulfur fixum &
rubrum, amalgamatione Mercurium
permiscunt & coquunt, opinantes hunc
ab illo vim aliquam congelativam ac-
cepturum, & ita in aurum congelatum
iri; quemadmodum fermenti una pars
plures partes de massa eadem, non-
dum acida facta fermentare & acidam
reddere potest. Verum falluntur suo ju-
dicio & spe, quia igne lento aurum &
Mercurius non moventur, & singula
manent in sua natura, forti, hic ab illo
avolat, mediocri, longi temporis, Mer-

*Mercurii
coagula-
tio cum
sulfure
metallico.*

curius exiccatur in pulverem rubrum, inutilem, qui nihil cum auro vel tinctura auri commune habet; In medicina corporis humani solum valent, si abique corrosivis sit factus, de quo post: Hæc via innumeros artifices, ut Labyrinthi error frequentissimus, diutissime detinuit & vexavit. Causa hujus erroris ita perspicitur: sulfur in auro existens est minima pars ejus, quæ si in composito maneat, ipsi dat essentiam auri simpliciter, non autem se propagare potest, aut per commixtionem compositi cum argento vivo id perficere in aurum, uti nec vinum (quod omnem essentiam habet à spiritu suo) aquæ commixtum, illam transmutat in vinum, sed ab aqua potius adulteratur & inficitur, & à vini homogenea natura redditur semotius & alienius. Nec verò quisquam imagineatur vim aliquam traducem seu propagantem sese in infinitum inesse auro, qualis est in animantibus & vegetabilibus, quæ si inesset, non tamen in actum deduci posset, nisi in sua propria matrice seu natura, quæ si esset argentum vivum apud naturam, tum hoc cum auro conjunctum in minoris vel fluvii ab eo

transmutaretur. Et sic aurum sibi infinitam sobolem generaret ex argento vivo, quod erroneum est non solum, sed & stultum cogitare, unde non opus habebis ulteriori declaratione: Quicquid cum fermento conjungitur, si sit similis substantiæ, sit fermentum, quicquid in salinas incidit, dicitur sal fieri, quicquid in aquas lapidificantes, lapis, sed ita non est cum auro, ut quicquid cum eo conjungatur, fiat aurum. Est enim aurum quasi summum naturæ metallicæ miraculum, & omnis mixtionis naturalis, quo ad fortem compositionem, apex, à quo Mercurius vulgi, tanquam extremum ab extremo, longissimè distat: si gramen cum carne bubula coquatur, non illud in hanc transit, quamvis bos gramine potius accreverit & pastus sit naturaliter; Causa est, quia ars in his naturam imitari non potest, multò minùs mille modis superare. Quomodo enim una simplex coctio artis gramen verteret in carnes bovis cum natura in bove viva tantas mutationes requirat, antequam ex gramine fiat caro bubula? Ita cogitandum est de auro: Quomodo homo per artem possit facere

id ex Mercurio coagulato per mixtionem & coctionem cum eo, cum natura tantum tempus, tanta vasa, tantas transformationes, tantæque media, antequam ex Mercurio faciat aurum per imperfecta, ut dictum eundo, expetat & necessaria habeat? Quicquid de auro hic statuitur, idem de argento intelligendum venit: Si itaque nec sulfur auri, nec argenti vim habeat coagulativam Mercurio communicabilem, quo hic in aurum mutetur, quid existimabimus de ære, ferro, stanno aut plumbo? quæ singula si potentiam haberent sibi assimilandi Mercurium per commixtionem, non tamen in aliam naturam, quam sibi propriam, multò minùs in auream, dominium exercebant. At nec in propriam illa Mercurium promovere possunt, cum horum mixtio naturalis arti sit omnino impossibilis & inimitabilis, quicquid conetur, inconsideratus operarius. Frustrà itaque vasa cuprea,

6.
*Per vasa
 metallica.*

ferrea: aurea vel argentea ad Mercurii coagulationem assumuntur; utpote à natura aliena & abhorrentia, sic & limaturæ, laminæ, folia & solutiones metallorum per amalgamationes, liquefactiones,

ctiones, aquas fortes, regias, acetosas vel alias ejusmodi, metallicas, vel non, cùm in via naturæ locum non inveniunt. Quid jam de vegetabilibus aut animalium partibus dicemus ad metallicam substantiam prorsus inutilibus & ineptis? Coagulent hæc omnia vel singula Mercurium, ut possunt, nihil hoc ad aurum. Non enim introducent in Mercurium caliditatem & siccitatem (humiditate & frigiditate illius illæsis) tantam & talem, quæ requiritur ad ejus æquationem. Vnde nec eum coagulant in aurum, quod proprium est solius tincturæ aurificæ, quæ non latet alibi, quàm in naturali suo subjecto solo & unico. Idem sentiendum de salibus, quæ quasi intermedia sunt inter vegetabilem & mineralem naturam, prout est sal tartari, nitri, commune, vegetabilium & alia mineralia ac semi-metalla. In quibus cùm vestigia quædam & quasi semina metallorum appareant, fortè ad tincturam inde elicendam & Mercurio conjungendam: laborare quis posset, de quibus nunc dicturi sumus, non ad Mercurium con-

*De II. uſu Mercurij ad tincturam, in
quam reduci tentatur.*

Multi ex chymix operam impendentibus eò uſque cogitationes ſuas extendunt, quod ſciant, tincturam eſſe quærendam in ſpiritibus, & præ reliquis in Mercurio; In ſpiritibus ideò, quia debeat eſſe ſpiritualis, ut penetrare poſſit corpora etiam metallorum ſolida, inque illorum poros ſeſe inſinuare, ad ſegregandum ſulfur innatum primæ originis. Corpus enim ita non ingreditur corpus, ſed illi ſaltem admiscetur in contiguitate, non continuitate, prout ſpiritus, cujus ſolius eſt permeare denſa & alterare ſibi admixta; In Mercurio, quia tota ars Hermetica circa Hermem, hoc eſt, Mercurium verſetur, in quo omne ſitum ſit, atque ipſum aurum nil niſi Mercurius habeatur: Et quidem hi cùm credant Mercurii in aurum coagulationem non poſſibilem, eum in tincturam, & millies quid auro perfectius

evehere conantur per artem : Contra quam intentionem generalem nos antea in Cœlidonia nostra argumenta non parvi momenti produximus , quæ non paucis à conatibus frustraneis , ne sese in hunc Labyrinthum chymicum sponte sua præcipitent , dehortari possunt, quibus verò , illis non perspectis , placeat nihilominus experimentari , quid ratio possit , quidve ars aut natura valeat , his hoc tractatu consultum volumus. Mercurius absque ulla additione in vasis supra lenem ignem retentus longissimo tempore , vix decem annorum , à sua natura mutabitur , hoc est , si non loco moveatur in tepido calore , si fortis , ut ascendat , vel exitum invenit & avolat , vel in aquam redit , & sua gravitate iterum descendit , & mox ascendit , ut prius. Atque hac ratione fortè annuo spatio & amplius , reciprocatione facta in pulverem tandem rubeum abibit , qui ut nec aurum est , ita nec tinctura ejus , sed vel in Mercurium vivum album reducibilis fortissimo igne , vel in vitrum. Idem contigit , si conjungatur cum aliis cor-

1.
Mercurius
rins solo
igne ad
tincturam
coagulandus.

2.
Mercurius
rins additis
corpo-

ribus me-
tallicis in
tincturam
coagulan-
dus.

poribus ficcis & terrestribus, metalli-
cis, siue non metallicis: si cum auro &
argento, ut dictum, nulla inde tin-
ctura proveniet, uti nec aurum, sed
Turbit aut præcipitatus: sic nec, si cum
aliis metallis aut eorum mineris fixatis
præcipitetur aut coaguletur, tinctura
inde speranda est: Quia vel manet in
sua volatili & alba natura nil mutata
intrinsecus, sed saltem extrinsecus ad
aspectum, vel si ab hac violentia qua-
dam seducatur, in terram inutilem &
mortuum abit; idque vel fortissimo va-
se & igne, vel longissimo tempore. A-
qua autem volatilis & terra immobilis,
in quæ duo elementa Mercurius, tan-
quam Protheus aliquis se semper trans-
mutat, non sunt de proprietate essentiali
tincturæ: At è contrario, si aqua illa sit
non volatilis & tincta, terræque illa mo-
bilis tingens; tum erit oleum illud in-
combustibile & sal fusibile, quo habito
laudandus sit Deus. Quocirca alii hanc
Mercurii inconstantiam animadverten-
tes longâ experientia edocti, voluerunt
illum mortificare vel trucidare cum aliis
corrosivis acutis & adstringentibus mi-

3.
Mer-
curius su-
blimatus
vulgi ve-
nenum.

neralibus, aut aquis succisve ex iis elic-
tis. Quidam miscuerunt eum sali petrae
& vitriolo, quidam aluminibus diver-
tis, & inde distillarunt per alembicum pri-
mò aquam, postea Mercurium; quem
novis deinde his similibus materiis jun-
xerunt, iterumque distillarunt, idque
toties donec à sua natura mutatus ascen-
deret, vel in fundo maneret: tuncque
hanc belluam optimè trucidatam putà-
runt. Verùm pro tinctura saluberrima
venenum teterrimum invenerunt, cum
suis authoribus ex rebus humanis rele-
gandum omnino: quantum mali ex hoc
invento exortum sit, dici vix potest: Ni-
hilominus ad usus humanos multiplices,
utpote aurifabrorum, cosmeticam, me-
dicinam & chirurgiam tandem adhibi-
tus est. Alii ex iisdem salibus aquas di-
stillarunt, quas fortes vocant, cum qui-
bus Mercurium saepius distillarunt, ab-
strahendo & refundendo, donec hinc
pulvis rubeus, qui præcipitatus propriè
nominatur, exortus est: Hic licet sit ru-
beus aut citrinus, tamen tinctura non
est aurifica, à qua distat longissimè, quia
redit in pristinam naturam volatilem

4.
Mercurius præ-
cipitatus
vulgi.

5.
Præcipi-
tati alii
abſque
corroſi-
vis.

& albam, nec mutat, ſed mutatur: non eſt calidus & ſiccus, retenta humiditate & frigidityte, ſed aut his aut illis qualitatibus præpollet aut ſpoliatur omnino. Eundem effectum alii cum aquis diverſis multorum generum ſibi pollicentur, quas hic præterimus. Quidam corroſiva omnia vitantes, & tincturam conficiendam, Mercurio jungunt granatos, chalædonium, criſtallum, ſmiridem aut ejuſmodi alios lapides pulveriſatos, eumque præcipitant igne convenienti, & vaſe in pulverem ejuſdem coloris & utilitatis, ſed ad medicinam tamen jam dicto tutiorem & efficaciorem. Verùm animadvertentes alii nec per ſublimationem, nec præcipationem memoratam, à Mercurio poſſe volatilitatem adimi, aggreſſi ſunt alias vias ad ſiſtendum eum, nempe detracta ipſi aquoſitate nimia, cujus ratione redit in priſtinam naturam, vel avolat. Hoc alii per instrumenta diverſa obtinere ſperarunt, nempe cum vaſe oblongo, cujus inferior pars craſſior ſit in igne validiſſimo, ſuperior in aëre ſatis fri-


6.
Mercurii
fixatio ad
tincturam
per vas
longum.

gido ; Vnde Mercurius calore ignis actus ascendat in superiorem vasis partem , de qua frigore aëris condensatus sua gravitate in fundum decidat, idque toties , donec maneat totus inferius , nec amplius ascendere possit. Quidam ad hoc aliis vasis & instrumentis utuntur , sed eadem est intentio & effectus ; ideóque in his nulla diversitas. Processit insuper audacia , ne dicam stultitia , quorundam eò usque, ut Mercurium vel simplicem vel sublimatum vel præcipitatum incluserint tormento ferreo crasso & valido , obstructis omnibus viis respirationis aut evasionis , & sic per 40. dies ac noctes tenuerint in igne fortissimo , maximo circumstantium periculo , nulla utilitate , nisi quod pro Mercurii sublimati impositi libra una tres vel quatuor libras inde (ex corrosione , ut opinor , instrumenti ferrei) eximere se posse jactent. At hæc à tinctura philosophica longissimè abesse nemo non videt , cujus notas & dotes Geber aliique quamplures descripserunt , quod debeat esse Mercurialis , homogenea , fixa , hoc est,

*Per vas
ferreum.*

in asperrimo igne non fugiens aut diminuenda, ruberrima, tenuissimæ essentia, ingrediens in metalla, liquefiens, seseque illis permiscens absque ulla separatione, quodcunque extraneum sulfur igni comburendum exponens, inde pondus, citrinitas, puritas & æquatio compositi contingat, quod aurum dicitur: Talis tinctura an expectanda sit ex Mercurio, videant discreti artifices & considerent, quomodo esse, quomodo non possit: Quod non hætenus enumeratis modis satis patuit, nec forte aliis, qui innumeri sunt, ideoque non hic recensendi; Quibus omnibus seu dictis seu omisis aut dicendis, nunc certam quandam figuram, tanquam Mercurialem statuam, toti hujus tractatui inservientem, ad viam veritatis in hoc Labyrintho inveniendam aut inutilem apponemus & accommodabimus, ut ea conspecta quilibet intelligens agnoscat, quam portam eligere, qualem semitam sequi & quem exitum sperare debeat.

THEBARVM BÆOTICARVM
descriptio.



Thebis illis antiquissimi (quibus
Cadmus Agenoris filius fundator, Dio-

nysius verò ex Semele, Cadmi & Harmonia filia natus, tanquam Deus congenilis, protector extitit) fuisse septem portas jam ante meminimus, ideòque has nobis præ Ægyptiis eligendas & imitandas: singulis portis, si benè antiquitatis illius monumenta scrutemur singula munera & insignia addicata invenimus: Versus occasum æquinoctialem prima omnium visebatur ordine & amplitudine spectabilis, in cujus turri eminentiori ex solido marmore extructa imago hominis habebatur: Quæ hanc proximè versus occasum solstitii hyberni sequebatur porta non minus decorata materia & arte, pro hieroglyphicis literis agnum monstravit: septentrioni directè opposita fuit tertia, quæ delphinum pro imagine habuit. Quarta ortui solstitiali hyberno correspondebat cum figura bovis: Quinta ortui æquinoctiali objecta, cujus nota, caper fuerit: sexta ad ortum solstitii æstivi respondit, quæ canem venaticum habuit: septima & ultima respexit solstitii æstivi occasum, & pro insigniis habuit Leonem: Versus meridiem porta fuit sed non aperta, ab antiquo tempo-

re clausa muro & cincta : Per singulas has portas ingressus patuit in urbem, sed per unicam saltem earum in arcem ejus munitissimam & pulcherrimam ascendebatur, singulis septimanæ cujusque diebus una ex his patuit, cæteris obsecratis & custodiâ præpeditis : Ad hæc non licuit quicquam animalium in hujus urbis forum adducere, nisi per propriam suam portam. Quotquot huc venerunt advenæ, viderunt quidem arcem illam protinus ornatissimam, sed modum intrandi ignorarunt, unde maximis fatigabantur curis & doloribus : Inter cæteros quidam accessit ab ea parte unde zephyrus spirat, qui cum sese omnino arcem occupaturum opinaretur, spe tamen sua frustratus ex medio urbis sese recepit extra mœnia, circum quæ dum ambitum instituit, quotiescunque ad portam aliquam novam accessit, observavit viatorio suo instructo, quæ directior esset ad arcem linea; quod equidem scire non potuit, antequam totam, quanta esset urbem circumcisset, ac tandem invenit, portam eam clausam versus meridiem maximè ad arcem directam esse; Post hanc eam, quæ à

VIATO-

RII

VSVS.

coeli parte, unde corus spirat: Deinde, quæ occasui æquinoctiali opposita est; ad quam cum post incredibiles exhaustos labores accessisset, pèrque eam in civitatem intrasset, non dubitavit de semita ad arcem ducente invenienda: quàm an unquam invenerit, inque eam ascendere, affirmare nequeo; tantum scio illi potentiam & modum per angustos penetrandi meatus arcisque summa fastigia obtinendi non defuisse.

De III. Vsu Mercurii ad Medicinam corporis humani.

Hactenus descriptæ Mercurii coagulationis & tincturæ species, licet suæ propriæ intentioni non ferviant, Medicinæ corporis humani tamen negari non poterunt, præsertim cum per experientiam tales probatæ & inventæ sint: Empyrici ex chymistis non solum coagulatos illos Mercurios à se fortuitò factos sed etiam cinnabarim, tam artificialem, quam nativam, sublimatos & præcipitados omnis generis ægrotis propinarunt: Quæ sanæ medicamenta bona sunt & haberi possunt, dummo-

do absque corrosivi suspitione maneant: An verò ab aqua forti caustica & deleteria vis Mercurio vel à salibus impressa igne exuri vel aqua omnino ablui possit, dispiciant alii: Mercurium absque ulla peregrini corrodentis noxa præparatum, optimum præ aliis censeo: qualis cum oleo sulfuris per campanam distillato factus existimatur, nisi exploratum sit hoc ipsum, arsenicali proximum, oleum corrosionis vi solvere aurum & cætera absumere metalla, ideoque valde suspectum, præterquam, quod parum operetur in corpore humano, etiamsi sit satis curiosè & circumspectè præparatum; Cujus vice eligat sibi alium modum ex antedictis cum gemmis, aut cum lapide lazuli vel armeno, ut purgatio per inferiora fiat expeditior: sunt qui crudum Mercurium pilulis cochiis aut mastichinis admiscant, atque eundem effectum, de quo tamen dubito, pollicentur: Pro quo, si ille, qui coagulatus sit fumo plumbi pilulis iisdem (quibus tamen in mixturis Mercurius semper fit ignavus) commissus administretur, absque dubio utilior & commodior futurus es-

set: Omnium virtutum & efficaciam antecedit Aurelius ille dictus melioris, quam illi notæ & originis, de quo aliàs: Cum Mercurius purget, & salivationem promoveat, dum volatilem seu fumosam naturam adhuc habeat, non autem si fixatus sit in pulverem ficcissimum, ratio patet. Quia calor vel stomachi vel etiam membrorum externorum, si illinatur, videtur nonnihil de ejus fumosa substantia resolvere, quod sensim ascendendo in transitu humores pituitosos visceribus impactos, pigros & quietos inhærentes, ad motum incitet & clementer provocet: qui si fluxiles semel sint facti à calore stomachi, venarum miseraicarum; Epatis aut aliorum viscerum & membrorum juvantur & expelluntur. Humida enim natura Mercurii virtutem expulsivam, quæ in humiditate existit semper leniendo provocat: Hinc cassia, manna, pruna Ungarica, jus herbarum mollientium, terebinthina & ejusmodi humectando intestina ficciora reddita per calorem & siccitatem morbi vel excrementorum obstipantium, vias mitigant & vim expultricem juvant, quo calor naturalis sua

actione non frustretur, se & naturæ adversa expellat & amica attrahat, retineat & alteret in commoditatem individui, quæ emollientia ex vegetabilibus, quia non tota sui substantia ascendant à calore viscerum resoluta, sed saltem eorum aquea pars relicta terrestri in fundo inde neque hæc sputationem promovent, veluti Mercurius; Et Mercurius ipse fixatus seu quomocunque mortificatus hac virtute humectante simul & ascensu privatur, imo & purgante quacunque vel superius vel inferius: Ex quibus patet causa, cujus huius Mercurii operatio ministrati cum spiritu vini fortificetur, quod nimirum unà cum frigida & humida Mercurii substantia ascendat calida de spiritu vini, quæ calorem naturalem excitet & corroboret, & sic major excretio fiat, nempe humectatis viis & calore aucto per accidens. Deinde & ex his constat, cur Mercurius excitatus in terram fixam non operetur evacuando, quia nimirum humiditate, quam non habet, non adjuvare potest vim expultricem. Quid jam dicemus de Mercurio sublimato, illo venenoso, qui suâ propriâ aquâ per effusionem & ab-

ſtractionem reiteratam dicitur edulcari, ablui & omni corroſiva vi ſpoliari? quid de Mercurio præcipitato communi per aquam fortem factò, rubeo, vel de albo illo per eandem ſoluto & cum aqua ſalis ad fundum reverberato, an hi Mercurii omnem ſuam venenofitatem exuant, an verò abſcondant, ad tempus? Certè medici quamplurimi his ſeſe cum ſumma utilitate abſque noxa uſos adfirmant. Verùm cùm in dictis Mercuriis illa humiditas & frigiditas, quæ operatio illa ſalivationem excitans perficitur, non ſit omnino ſublata ſeu eradicata ita, quod caliditas & ſiccitas ejus vice operaretur, ſed ſaltem teſta & ſepulta ſub ſacibus ſalium, ex quibus aqua fortis conſtat, vel aliæ ejusmodi additiones abundant, hinc nulla ſalivatio ſenſibilis inde ſequitur, unde nec per conſequens alvi ſubduſtio, quam tamen ſequi ex Mercurio illo albo, & aliis ejusmodi multi promittunt, hoc eſt, quod ſolum inferius, non ſuperius operari debeat, id quam verum ſit, experientiæ & rei naturæ conveniât, judicent alii: Nam ſi aliqua inde alvi evacuatione ſequeretur, cum non ſit ex humiditate

ditate leniente, certè erit ex caliditate irritate, quæ accidentaria est in illo Mercurio, nempe à salibus introducta, quemadmodum multa extremè calida, ut Euphorbium, cataputia, & his similia, attrahant humores & evacuant, quamvis tamen in his possit esse peculiaris vis purgans, quæ non proveniat à caliditate illa manifesta, sed occulta qualitate, ut quidam volunt. Verùm in Mercurio aliter se res habet: In hoc naturalis vis obtruditur admixtis aquis & salibus, quæ fuit, humectando evacuare superius & inferius, & alia præternaturalis & accidentaria ipsi conciliatur, nempe per sales & aquas fortes, quæ est, non purgare superius, sed solum inferius: Cujus rei nulla est ratio, nisi in calore, ut dictum, super veniente, non in humiditate, quæ oblitterata est: sint itaque cautiore & medici & ægroti in ejusmodi Mercuriis mortificatis & strangulatis propinandis & assumendis, ne aliquid noxæ relinquant in corporibus & plus damni, quam commodi præstent. Nam non sequitur, nihil senserunt mali ægroti, sed bene se habuerunt. Ergo vis illa venenosa non adest amplius, nec no-

cere potest. Novimus esse quoque venena, quæ eo tempore, quo assumuntur, non occidunt, sed sunt innoxia & insensibilia, cum tamen in posterum existant læthalia. Quid? si tale quid contingeret in Mercuriis illis mortificatis, ut mortificarent potius assumentes post aliquod temporis spatium, quàm à morbis relevarent? Demus, quod primò relevarent, cur non & postea nocere poterunt? Nec verò medicus, nec æger de his rebus certus esse poterit, nisi eventu: Imò si unus aut alter nullam noxam inde sensisset, nempe in humido morbo vel temperamento quis certus fuerit, quod nec alius in alio morbo vel temperie corporis. Novimus quendam circumforaneum seu Empyricum medicum arseni dragmiam unam vel plures in corona astantium assumpsisse per os atque inde post semihoram intumefactum, miserum sibi theriacæ suæ auxilio subuenisse, cum admiratione omnium, at cum id sæpius singulis diebus reiteraret, pollicitus sibi certissimum alexiterion fore in sua pixide, (ignorans Theriacam appropriari venenis potius bestiarum, quàm corroderenti-

bus) præsentaneam sibi mortem accersivit, cum stupore adstantium: sic vidimus aliquando puellam quadrimam vel circiter, bibisse aquam venenosam arsenicalem, qua necantur muscæ, at absque noxa, quia paulo antè ceraforum magnam copiam ingessisset, quibus per vomitionem rejectis, nihil mali sensit, nempe per accidens: Eadem referuntur de ebrioso quodam, qui aquam fortem seu separatoriam hausit noctu pro alio liquore sitibundus, & restitutus est à præsentemox medico: Tutius itaque est uti præfidiis medicinalibus absque ullius noxæ suspitione: Mercurius per se est morborum plurimorum alexipharmacum, & ut testantur quidam ipsius pestis (cum eo loco, ubi hic effoditur & tractatur, nunquam aut rarissimè contagium hoc grassetur) dummodo maneat sua propria natura, & non à salibus aut aquis corrosivis inficiatur & venenosus reddatur: Videant hinc illi, qui putant se illum præparasse, ne destruxisse aut corrupisse potius existimare possint: Nam Mercurium non purgantem superius, sed solum inferius naturâ suâ illasâ produxisse,

equè mihi possibile videtur,quàm ignem
absque calore , aquam absque liquidita-
te & triangulum absque tribus angulis.
Detractâ enim proprietate rei quasi es-
sentiali , res ipsa , quæ fuit , permanere
nequit , sed fit aliud , aliâque forma in-
notescit : Inde miror , quosdam conari
opio , euphorbio , scammonio & aliis
ejusmodi fortissimis medicamentis , uti
& Mercurio , certas qualitates , quæ ipsis
sint essentielles , non accidentales præpa-
ratione suâ præconcepta detrahere , sub-
stantiis illorum & virtutibus illâs. Ob-
tundere quidem possunt hanc vel illam
qualitatem contrarietate ipsis propria,
ut opii vim narcoticam acetosis , non
euphorbii caliditate , scammonii vio-
lentiam solutivam succo cydoniorum
restringente, Mercurii vim ascendentem
cum pilulis Ruffi vel cochiis ad inferio-
ra revellentibus , vix delectum præstare
in correctione. Nam opium si torrea-
tur supra carbones , unde flamma ex-
citetur , quomodo ero certus , quod
non vis illa , quæ operationem narco-
ticam efficere debet , torrefactione pe-
reat , & saltem noxa abeat , hâc illâsâ.
Vinum , quod sulfure infectum , ut fit

vulgo , incenditur : Vnde ero certus, quod sulfuris reliquæ & non potius optima spiritus vini pars consumatur , cùm constet , sulfur non incendi in humida substantia , sed in sicca & terrestri , spiritum autem vini , humori mixtum , facillimè inflammari. Hinc admirandum, quosdam ita pituita cerebri laborare, ut promittant horum à sese præparatorum medicamentorum , aliàs fortissimorum , doses duplices aut triplices, imò ut pro saccharo tutè assumi possint absque noxa , gloriantes quoque de artificio suo tam feliciter peracto , cùm non intelligant , sese illud medicamentum aut ab innatis virtutibus spoliassè & destruxissè , aut ejus virtutes nocuas sub pallio quodam abscondissè, & sic serpentem magis noxium reddidissè, quem sub dumetis , quasi in insidiis collocarint : si destruxerint , exempli gratià , virtutes opii, scāmonii, antimonii, Mercurii quibus quodlibet maximè valebat , ita ut multum cuiusque assumi possit , opium non erit opium, nec scammonium scammonium , & sic de reliquis : Imò satius fuisset, in dosi parva nota & consuetà unà cum correctione convenienti adhibita.

quodlibet administrasse, quàm tot laboribus interpositis dosin majorem, cum dubio & pretio majori. Mercurius itaque tum pro medicamento uti habeatur, quando non desinit esse Mercurius, quomodocunque præparetur, corrigatur, & cum aliis misceatur: Vnde sub una forma, nempe, ut dictum, præcipitati innoxii, omnes operationes Mercurio dignas, superius & inferius evacuando, perficiet. Quando verò fixatus est in terream substantiam, amisit illam operandi virtutem & temperamentum suum proprium, quo omnia elementa, præsertim aquam & terram, ita habet copulata, ut unum cum altero in ascensione maneat inseparatum, & terræ cujuscunque qualitatem assumpsit, quæ est siccitas cum caliditate accidentali: Longè aliter se res habet cum auro, quod solutum & desinens esse aurum, retinet tamen humiditatem caliditati junctam, unde hoc agit in corpus humanum, omniâque ejus membra, præcipuè cor ac spiritus corroborando. In caliditate enim & humiditate consistit fons vitæ, nempe humidum radicale, & calidum nativum, quorum assumptio

ne aut suffocatione homo interit, confortatione & restauratione, vigescit & vires recuperat. Hæ qualitates non sunt in Mercurio, nisi valdè remotè, exceptis passivis & foemineis, quibus si per artem masculinæ & agentes, prout natura admittit, jungantur, sequetur compositum, pro caliditate & humiditate exuperet, de quo in sequentibus latiùs dicemus.

C A P. II.

De monte Saturni.

Saturnum hîc intelligimus non planetam illum mundi supremum, nec Deorum Ethnicorum quasi abavum & primum fatorem (de quo in Hieroglyphicis nostris suo loco sat egimus) sed metallicam substantiam, quæ plumbi vel ejus mineræ, nomine appellatur, prout communiter recipitur: Huic proximum à Mercurio locum concessimus, cum & in artis philosophicæ & naturæ operatione hac serie illum sequatur, testantibus Philosophis & ipsius rei experi-

mentis. Denius enim, quod Mercurius det materiam seu seminium primum operi, velut infanti, tum Saturnus suâ frigiditate contringente, ut loquuntur, conceptionem adjuvat, & nigredine superveniente eandem esse factam demonstrat, ne quid de reliquis planetis aut coloribus hic addamus: Hoc constat, in terræ mineris à Mercurio ad Saturnum facilem & proximum esse progressum, & Saturnum nil nisi Mercurium leviter coagulatum in quibusdam videri: Quocirca de hoc metallo non immerito nunc dicturi sumus, nempe ut primò demonstremus, quomodo ad aurum inde producendum quamplurimi respererint; Deinde quatenus ad Tincturam, ac tertio, quomodo ad usum medicum adhibuerint, aut adhibere possint, & quid inde contigerit aut sperandum sit.

*De I. Quomodo Saturnus in aurum reduci
tentatus sit.*

Philosophi in scriptis suis sæpenu-
mero Saturnum vocantes aurum lepro-
sum & immaturum, occasionem præ-

buerunt curiosis artis chymicæ inquisitoribus, vt conati sint eum in aurum reducere coctione maturiori adhibitâ, nec non purificatione qualicunque, idque vel in fusa ejus massa seu substantia, vel in minera puriori & nobiliori, vel in Mercurio inde par artem factô: Qui in substantia; per se, vel cum aliis id perficere tentarunt: Per se, hoc est, absque peregrini additione, si qui plumbum tractarunt, ignis calore usi sunt, eoque vel leni & ejus liquefactionem non causante, vel fortiori æquante, vel fortissimo, longe superante. Qui leni calore usi sunt sive in limaturis, pulveribus, aut substantia discontinua fuerit, sive continua & dura, operam omnem impensam luserunt, etiamsi longo tempore hisce ovis incubarint? Ratio est, quia vis agens ibi non est in plumbo, nisi sulfur illud comburens & fustum, quod non agit, nisi longissimo tempore, accedente calore moderato extrinsecus quemadmodum contingit in terræ visceribus circa mineras, non circa corpus fustum plumbi: si quoque extra terræ claustra fuso jam metallo hoc fieri possit (quemadmodum Isaac fide dignus author annotat,

Leni calore.

plumbum ex antiquissimo tecto , fortè
 bis mille annorum detractum , in ceru-
 sam argenteam seu argentum finum
 magna sui parte , vi & calore solis , plu-
 viarumque lotionè , commutatum fuisse)
 tamen aliquot seculorum tempus
 requireret & lentissimum calorem , quæ
 duo homo neutiquam ipsi præstare po-
 test, etiamsi Mathusalem ætate vinceret:
 Item statuendum de mineris plumbi
 quibuscunque , quibus nonnulli non abs-
 que evidenti & profunda ratione per
 multos inhæserunt annos. Quod si ca-
 lor administretur Saturni mineris , vel
 corpori , liquefactioni æqualis , illæ sen-
 sim effumant sulfur , hoc in fæces ebul-
 lit , utroque modo in substantiam ter-
 ream sive longo , sive breviori tempore
 fit transitus , quâ utilitate , novit, qui ex-
 pertus est. Citissimè verò corrumpitur
 plumbi substantia ab igne fortissimo , ut
 pote ejus frigida naturæ adversissimo.
 Causa cur plumbum ignibus destruat,ur,
 multiplex. Prima & præcipua , quod
 abundet sulfure illo communi combu-
 stibili & comburente , quod cum vehe-
 mentiori igne inflammetur , consumit
 suum subjectum seu focium sibi adjun-

*Calor li-
 quesa-
 tionis.*

*igne for-
 tissimo.*

*Causa
 combu-
 stionis
 plumbi.*

Etum, nempe argentum vivum, idque contingit vel magis vel minus in omnibus imperfectis, præcipuè in plumbo propter ejus abundantiam: secunda causa est porositas quam efficit hoc sulfur in corpore, cui inhæret. In hanc enim flamma & calor ingreditur & devastat quicquid ibi invenit calori non assuetum, quale est tertio argentum vivum adhuc crudum, frigidum & humidum, ideoque à suo contrario, ut inimico, abhorrens & mutationem sui patiens. Et si enim ponderosum sit, non tamen id ratione magnæ argenti vivi copię, sed potius cruditatis accidit; quia ad auri ponderositatem neutiquam attingit, cum eo duplo ferè levius, quo ad eandem quantitatis dimensiones, habeatur. Ex his causis Saturnus igne forti non consistit, sed minuitur, hoc est, à natura sua aquea fluente & metallica, in terream quandam, vitrificationi proximam substantiam convertitur, ut per experientiam patet omnium eorum, qui Saturnum vel dimidia horâ vitrificatorium opus præparant, & in vitrum reducunt. Cur verò Saturnus sit reliquorum metallorum tam perfectorum, quàm imperfectorum, exa-

minator, & quasi tortor eorum, ut veluti innocentium constantiam, horum, ut reorum crimina probet & attestetur, causa ex dictis in propatulo est. Pisces, si in propria sua aqua, velut ostrea in contento succo, bulliant, nihil quid præter naturam patiuntur, quod sit peregrinum illis: Ita de auro argentoque cogitandum, quæ in Saturno, tanquam aqua vel succo suo, super testam & cineritium coquuntur, non quo coctio illis aliquid maturitatis aut qualitatis addat, sed saltem ut crudum superfluum, seu humores frigidiores secedant vel evaporent, hoc est, metalla imperfecta & impura: Accedit calor, non solum consumens exsiccando humidum immaturum, & segregans & movens ad latera heterogenea, congregansque homogenea & retinens. Vnde Saturnus in cineres imbibitur à calore supernè urgente inferius vel ad latera repulsus, ut refrigerium sui que salvationem acquirat, ex naturæ instinctu, quo gravia tendunt deorsum, & quodlibet, licet inanimatum fugit à suo contrario (ceu patet ex aqua frigida in fornacem ardentem infusa) qui dum fugit, sui ma-

ximè simile ratione sulfuris admixti, æs
 secum abluit, velut aqua trahit oleum &
 perfecta relinquit in medio, utpote calo-
 ri ejusmodi assueta & amica. Cur verò
 Saturnus nec Iovem nec Martem secum
 rapiat, hoc fit per accidens: Iovem,
 quia hic approximat æquato & substan-
 tiam habeat mediocriter puram, sed
 valdè infirmam, Martem, quia hic ipsi
 non commiscetur, & maximè sit im-
 purus. Non pauci Saturnum per calci-
 nationem reducunt in pulverem, idque
 vel absque additione vel cum admix-
 tione salis alteriùsve rei peregrinæ ad
 corrodendum vel abstergendum appo-
 sitæ: Ex qua operatione peracta tandem
 lythargyrium rufum vel subalbum, in
 igne vitrificatoriam solummodò trans-
 fusionem habent, non aurum, à quo
 longissimè abest. Qui in initio vel post
 addiderunt acetum, fortè ad solvendum
 vel incarandum, ut reciperet amissam
 humiditatem, vel melius purgaretur à
 superveniente sulfure comburente, ce-
 rusam albissimam quidem acceperunt,
 sed ad argentum & aurum omnino inu-
 tilem substantiam. Ex hac igni fortiori
 exposita minium, vel imbibitione cum

*Lythargi-
rium.*

Cerusa.

Minium.

*Causa cur
videatur
plumbum
coagulari
posse in
aurum.*

urina, vel cum aliis alii colores, non aurum nec argentum resultant. Cum verò plumbum sit ex Mercurio & sulfure per naturam compositum, verisimile videtur, quod possit sulfure per ignis gradus combusto & separato arte ejus argentum vivum maturari & reduci in aurum; siquidem à frigido & humido non detur transitus ad calidum & siccum, nisi per medium æquatum, quod nec frigidum nec humidum nec calidum, nec siccum sit. Nam demus, quod in minera vel substantia plumbi sit prævalens humiditas cum frigiditate juncta, quæ post percoctionem vel calcinationem cum igne convenienti vertatur in siccitatem cum caliditate, comitante; inde rationabile est, quod in eo puncto, quo humiditas in siccitatem & frigiditas in caliditatem vult transire, fiat prius æquatio omnium qualitatum; quæ est auri temperies, & per consequens, plumbum prius vertatur in aurum quam in lythargyrium aut aliam substantiam siccam & calidam. Verum cum experientia huic ratiunculæ reclamet, sufficeret hæc intelligenti, ne in ejusmodi errores incideret unquam, nisi cognitum

haberemus, in his nullum adeo circum-
spectum esse, quin spem sibi faciat e-
ventus melioris & optati, modo vel mi-
nimum, quod arrideat, animadverti
possit: Idcirco causam evidentiorē *Causa, cur*
trademus cur non hoc modo æquatio *id fieri*
fiat in aurum, si calcinetur plumbum *nequeat.*
quocunque igne, vel lento vel forti, cum
vel absque additione rei alterius, sed
in substantiam ab auro remotissimam
abeat. Causas corruptionis plumbi in
igne jam ante exposuimus, quæ tum
sunt verissimæ, hinc ejus argentum vi-
vum omni humiditate radicali spoliatur
& vitro fit proximum: Æquatio autem
contrarium qualitatum non accidit, quia
non fit totalis separatio sulfuris combu-
rentis, sed saltem vnius partis, cum forte
duæ ejus partes maneant in composito,
nec sint separabiles, quia ob terrestrei-
tatem aliquid fixitatis in se habent, non
quidem aureæ sed terreæ viscosæ, mox
vitrificandæ. Et quo major pars ejus
sulfuris sit combusta, eo magis exicca-
tum & depravatatum est argentum vivum:
Vnde hoc ex sua natura in terram mu-
tatum, à facibus sulfuris facile in vitrum
reducitur, quod est omnium composito-

rum ultimum: Quod si per artificium ignis vel alium modum concedatur ex plumbo posse omne sulfur segregari, neque tum ille Mercurius purus in aurum equari posset, quomodocumque tractetur. Quia in auro sunt omnes qualitates quatuor contrariae in summis gradibus, qui summi gradus non possunt hac ratione in Mercurium frigidum & humidum introduci, cum quantum siccitatis & caliditatis accidentalis non essentialis, huic Mercurio acquiratur, tantum ille amittit humiditatis & frigiditatis, donec omnem humiditatem & frigiditatem amiserit, & earum vice siccitatem & caliditatem possederit; atque hinc nulla fiet æquatio qualitatum, & per consequens nec aurum. Idem fieri videmus in aliis operibus: Calx calidissimæ qualitatis fit ex lapide sua natura frigido. At post combustionem non ille lapis est calidus & frigidus simul: sic aqua, quæ prius est actu frigida, post admotionem ad ignem in distillatione vaporosa actu calida existens non retinet de utraque qualitate, sed una abit, altera adveniente: sic quod de actu hic dicitur, idem de potentia, & quod de duabus, idem & de quatuor qualitatibus

tibus compositi intelligendum est. Nonnulli considerantes plumbum vel in substantiam malleabile congelatum vel in minera etiam clara existens nimium sulfuris combustibilis per ignis calcinationem vix unquam segregandi continere, alias invenerunt vias ad naturam ejus purificandam, & à facibus sulfuris segregandam, nempe reducendo id in Mercurium currentem, quem si habeant, promittunt sibi ejus coagulationem in aurum per se vel cum auro juncti possibilem. Cum enim ejusmodi coagulationem Mercurii propter hujus cruditatem fieri non posse animadvertant, quia natura in hoc nullam, in plumbo verò aliquam coagulationem sua sponte inceperit, ideoque hoc magis naturæ consentaneum, quam illum opinantur. Nam quod philosophi dicunt, incipiendum esse arti, ubi natura imperfectum reliquit, id non absque ratione de plumbo intelligunt, in quo sit incepta digestio, mollities & mediocris cruditas, ut facile tractari & compleri possit artificio, alias per naturam relictum imperfectum: Cumque metalla reducenda sint in primam sui materiam, hoc

*De reductione
plumbi
in Mercurium.*

eſt, in Mercurium, à quo ducunt originem, hinc plumbum neceſſario ſtatuunt in Mercurio currentem reducendum eſſe. Hoc ut perficiant, multas inierunt vias, quæ omnes duplici modo differunt, nempe ut vel putrefactione & abſterſione, vel ſolutione & adjectione Mercurii vulgi, id tentarent. Primo modo, quidam ipſum plumbum diſtillare conati ſunt, exiſtimantes Mercurium ejus in liquefactione aſcenſurum, & ſulfur in fundo manſurum, ſed illis illuſit vana opinio, cum contrarium prorſus acciderit, nempe quod ſulfuris aliqua pars aſcenderit citrino colore, argentum vivum verò cum majori ejus parte manſerit in fundo, tandem in pulverem aut lythargyrium redactum. Alii per deſcenſum idem tentârunt, quaſi voluerint plumbum in laminis calci vivæ ſuperpoſitum, ſtrato ſuper ſtratum factò; & igne ſupernè agente argentum vivum ejus cribrare vel colare per calcem vivam in foveam ſubiectam. Atque hoc inſtitutum eventu & ſpe ſua fruſtratum fuit. Cauſa verò, cur argentum vivum nec aſcendere, nec deſcendere potuit, relictis ſuis facibus ſulfureis & ter-

retribus, hæc est: Quia in fundo naturæ hæc duo arctius colligata sunt, quàm ut artificio, quod igne perficitur, separantur ab invicem. Vnde medio aliquo absterfivo vel separativo extraneo egent, vel argenti vivi homogeneo collectivo, eoque vel crudo vel maturo, & agente. Media ejusmodi absterfiva habentur sales, armoniacus, turturi & his similes. Collectiva sunt Mercurius vulgi crudus, vel sulfur aureum, fixum & maturum. Hinc alii assumpserunt dictos sales, cùmque iis mistis plumbum putrefecerunt per certum tempus, post quod distillarunt, & Mercurium, ut dicunt, extraxerunt. Secundò per solutionem plumbum in Mercurium reducitur, si, ut quidam experimentati sunt, solvatur in aquam fortem, & Mercurio vulgi adjecto, separatur ejus Mercurius sensibilibiter. Multi alios invenerunt modos ad eandem intentionem, quas prætereo. Horum omnium etsi labor non videatur malè collocatus, cùm ex metallo non metallum, ex non Mercurio Mercurium fecerint, tamen vereor, quod non utilitas aliqua, quoad ejus coagulationem in aurum, expectanda sit.

sive enim aurum misceatur, vel amalga-
metur cum eo, & coquatur, quicquid
nonnulli jactent, sive per se coaguletur
lento igne, impossibile est, quod sulfuris
aurei qualitates agentes introducantur
in illud: Nam quicquid de ipso plumbo
aut minera ejus, nec non de Mercurio
antehac dictum est, cur illa in aurum non
coagulari possint, eadem causa & hic ob-
stat, licet in Mercurio non sit tanta sul-
furis comburentis quantitas. Qualitati-
bus enim patientibus destructis, introdu-
cuntur illi agentes qualitates, & non fit
æquatio omnium contrariarum in eodem
composito remantium, quod fieri debe-
bat, si aurum futurum sit, idque in sum-
mis qualitatuum gradibus, ut ante dictum.
Eandem ob causam nec aurum amalga-
matum cum Mercurio Saturni eum in au-
rum perficere poterit, cum aurum nihil
habeat superfluum in sua perfectione, sed
simpliciter sit perfectum, ideoque de sua
simplicitate si aliquid alteri Mercurio
concederet, ipsum egestate laboraret,
prout Bernhardus Comes optimè disse-
rit. Ne quis autem existimet, Mercurium
plumbi qualicumque modo coagulatum
in aurum nobilitari, cum contrarium re-

*Causa cur
Mercuri-
us Sa-
turni in
aurum ne-
queat coa-
gulari.*

ipsa experietur, nempe ipsum in terram inutilem degenerare. Quod si verò à sulfure auri fixo & agente, hoc est, calido & sicco, tingente Mercurius plumbi coaguletur, nullum est dubium ex eo, ut & aliàs aurum perfectissimum fieri posse, de quo hic non est differendi propositum. Tantum sufficiat de primo Saturni usu seu in aurum coagulatione, sequitur de præparatione ejusdem ad tincturam.

De II. Vsu Saturni ad Tincturam.

Pauciores, ut opinari quis posset, quæ siverunt tincturam fixam & spiritualement in Saturno, cujus corpus sit facilis corruptionis seu destructionis in igne & aquis corrosivis multique sulfuris comburentis & terrestri particeps, nihilominus, cum judicia operantium sint diversa, scriptorumque sententiæ diversissimè accipiantur, quicquid alii de propinquitate plumbi & auri inter se intellexerunt & ad coagulationem unius in aliud retulerunt, quidam ad tincturam ex plumbo conficiendam, interpretati sunt: Accessit, quod à Philosophis passim inculcetur, æs & plum-

bum esse lapidem pretiosum & in plumbum esse masculum & tincturam utramque tam albam quam rubram, ut monstrat cerusa & minium, dummodo debite inde educatur: Hinc secundum sonum verborum conjunxerunt æs & plumbum, vel hoc & arsenicum aut acetum, & nihil tale repererunt, artemque vel abjecerunt omnino ut impossibilem, vel imperfectam relinquere coacti sunt. Quidam subtilius operari volentes, atque in hoc Isaacum imitati, Saturnum variis præparationibus ad puritatem & substantiæ tenuitatem quandam reducere voluerunt, ut in metalla radicaliter ingredi, iisque adhærere posset, eundem ad nihilum seu fæces inutile redegerunt, quomocunque animam Lunæ vel Solis immittere, vitamque tribuere illi tentarint. Verum hæc opera omnia esse frustranea experientia singulorum tandem licet rarius & non nisi post multorum sumptuum interpositionem convincit. Quomodo enim quid boni fructus ex arbore mala expectabis. Quomodo ex colocynthide mel, aut ex simeto fatido rosam suavissimi odoris elicies? sanè vix unquam per artificium,

licet natura suis arcanis operationibus utrumque educat, nempe ex amaro dulce, & ex foetido suave. Nam quid uvis, pomis, pyris & ejusmodi immaturis fructibus palato ingratus? quid iisdem calore Solis maturatis acceptius & mitius? Quod si ars quoque naturæ manum vicariam & quasi obstetricem præbeat, videmus ad effectus admirandos, ad quos alias nunquam perveniret, eam contendere & aspirare. Annon ex sylvestri arbore, cujus fructus sunt acerbissimi & esui inutiles, circa truncum abscissa & ramo seu furculo nobiliori eidem insito coalescit genus arboris, furculo, non radici simile & fructibus correspondens nobilioribus?

Ad hujus exempli imitationem quidem conati sunt Saturno aliquod germen inferere & compositum soli seu calori philosophico committere, donec satis maturum sit, & absque dubio votum suum obtinuerunt: Verùm in electione horum mineralium cautum quem esse debere admonet bonus ille senex Morienus, cui ut morem gerat, æquum est. Nos ut & hoc loco Indicem, qui in triviis meliorem semitam hæsi-

88 *Tractatus de Septem*
tanti ostendat, statuamus, figuram ad-
jicimus sequentem:

SANGVINIS DRACONIS
descriptio.



In tertia illa mundi parte, Africa dicta, ubi maximi ardores & aquarum penuria, ideoque regiones sunt latissimæ quidem, sed non iatis frequentes incolis, iisque potissimum nigricantibus & barbaris populis: econtrà feris horridis & monstrosis partim, partim venenosis hominum generis infestis abundant, quales sunt tigrides, pardi, leones, iisque similes, quarum ad fontes aquarum dulcium, rivósque conventu & mutuo insultu semper aliquid novi generis suboritur diversi omnino in specie à singulis suorum parentum: Hic, ut cætera prætereamus, elephas visitur singulari, ut corporis magnitudine, sic prudentia conspicuum (cui nonnulli intelligendi, loquendi & scribendi aptitudinem, humanæ proximam, attribuunt) inter reliquas bestias primum tenere locum: Cui, ut nihil est ab omni parte beatum, continuò se invidum & hostem interne cinum draco prægrandis offert. Hic ut tam vastæ beluæ, cui viribus longè sit impar, damnum ingerat, non audens aperto Marte cum ea configere, rem ex insidiis aggreditur hoc modo. Observat quâ viâ elephas aquatu rediturus sit,

eandem, ubi arctior est, præoccupat, se-
 féque inferiori loco abscondit, donec
 elephas aquis prætumidus accedat, cu-
 jus pedibus nexus & gyros suo corpore
 sinuoso injiciens sanguinem libat & ebi-
 bit. Tandem ubi viribus defecerit ele-
 phas, draconem circum sese in nodum
 reflexum, jam cruore saturatum, deque
 victoria contra hostem obtenta secu-
 rum, suo pondere in terram corruens,
 ipsa morte vindictam sumens conterit
 & extinguit, omni regurgitante & of-
 fusso ejus sanguine, qui post **DRACONIS**
 (licet potior pars elephantis sit) dici-
 tur, ad medicinam aliasque necessitates
 hominum non inutilis. Draconem hunc,
 cujus sanguinis ad medicinam philoso-
 phicam assumitur, oportet quem probè
 agnoscere, ne terreum quid, seu, ex ter-
 ræ fundo depromptum, aut aliud haud
 conveniens in ejus locum substituat. Est
 autem ex eo genere, quod Saturno,
 Apollini, Æsculapio & Mercurio ascri-
 bitur, quod Cadmi socios interfecit, &
 ab eo interfectum, quod vellus aureum
 observavit, quod pomis aureis Hesper-
 idum hortis invigilavit, quod Geryo-
 nis Tricorporis boves puniceos custodi-

vit, Typhonis & Echidnæ soboles : Saturno appropriatur dum capite caudam apprehendit, non quasi tempus significet, sed quod in se redeat, & ex duobus, nempe capite & cauda unum quid fiat : Appollini affingitur, quia ab eo sagittis occisus putatur Typhon, qui putrefactus Python dicitur : Æsculapio, quia medicinæ revivificativæ & juven- tam restaurantis Draco symbolum est & subjectum proprium Mercurio, cujus caduceo appingitur duplici, masculi & foeminæ forma, quia constituit duplicem Mercurialem substantiam Hermaphrodyticam contrariarum operationum, nempe quod durum mollificet & molle induret : Cadmi socios interfecit, quia idem sunt re, quod hic elephas, & à Cadmo interficitur vice versâ, quia elephas draconem moriens, occidit. Reliqua omnia, ut etiam jam dicta, petantur ex nostris Hieroglyphicis, ulterius ibidem explicata, quæ lucem hisce dant clarissimam.

De III. Vſu Saturni ad Medicinam.

Si conſideremus jam ſubſtantias ex Saturno productas ut ſunt lythargyrium, ceruſa, minium & ejuſmodi, animadvertemus eas corpori humano interius aſſumendas plus noxæ, quam utilitatis allaturas, cum eadem inter venena potiùs, quam medicamenta ponantur: Cauſa verò harum nocuæ qualitatis videtur eſſe manifeſta, non quia per ſe ſint venenofa, ut arſenicum, ſublimatus & ejuſmodi corroſiva, nec ut venena animalium, ſed quia venas & vias corporis humani obſtruant, & inimicam cordi qualitatem, frigidam & ſiccam communicent. Quomocunque itaque plumbum præparatum per calcinationem ab igne factam non ſolùm non amittit ſuam frigiditatem, quam ante habuit, ſed quoque ſulfure ejus calido combuſto magis auctam poſſidet, ut pote jam factum præterea ſiccum, quod eſt terræ proprium. Eſt quidem plumbum ante combuſtionem diverſarum virium, ratione argenti vivi, frigidi & humidi, ac ſulfuris calidi & ficci, in una mixtione

existentium. Nam usu cognitum est, quod non solum repellat sanguinem sua frigidityte, sed etiam discutiat caliditate, ut apparet in gangliis aliisque partibus subumidis: adhuc humectat sua aquea humiditate, & exiccat terrea qualitate: ratione humectationis exiccatis locis adhibetur, ab argento vivo in unctum: ratione exiccationis, praesertim calcinatum, ulceribus humidis, imò & cancriosis, ut lamina ejus cancro non ulcerato & labiis (quod miremur) humanis ne nimis excrescant. Cicatrizationem quoque adjuvat, si debite applicetur vel inferatur locis eam requirentibus. Nihil hic dicemus de sale Saturni, aut saccharo ex minio parato, hisce similibus, quia sunt ejusdem originis, qualitatis & operationis: Vnicum nobis ex Saturno remedium interius assumendum innotuit utilissimum, si mineræ ejus purissimæ Lunari foetu prægnanti per ignis gradus fixata & purificata Mercurius vaporabiliter misceatur, ita ut ex duobus Mercuriis vnum quid fiat citrinissimum, quod est medicamentum admirandarum virium in morbis quibuscunque chronicis & humoralibus

foeliciffimè ufurpandum , alibi à nobis Cælidonia , dictum , propriè minerale Panochymagôgon appellandum, de quo videndum fuo loco.

C A P. I I I.

De monte Iovis.

INTER omnes Deos gentiliſios Iupiter primatum & præeminentiam obtinuit, quod nec de planeta, nec de metallo ejusdè denominationis cum eo ſtatuerè licet: Vnde qui Iovis illius Olympii dicti velut Divi, facta, aut ſtellæ erraticæ inter Saturnũ & Martem in cœlo elevata curſum & operationes metallo, quod ſtannum propriè appellatur, assignare velit, in rerum judicio & comparatione nomine aberrare invenietur: Vix enim quicquam hæ duæ ſubſtantiæ cum fictitio illo Iove, qui adulter, & nescio quibus non vitiis inſignitus à poëtis fingitur, commune habent præter nomen, quod tamen huic metallo more chymistarum, impropriè attribui-

tur : Iupiter planeta calidus & humidus præsumitur, ideóque Dominus humanæ vitæ, quæ in calore & humido consistit: An earundem qualitatum & virium sit metallum ejus nominis, dubitari potest: Nihilominus cum stannum & usu & æstimatione vulgi in satis magno habeatur pretio, de eo secundum institutum ordinem, nempe primò de ejus coagulatione in metallum perfectum, deinde quomodo à quibusdam ad tincturam inde conficiendam sit adhibitum, tertio de usu ejus in medicina, agemus.

*De I. Vsu Iovis ad coagulationem in
metallum perfectum, argentum
ac aurum.*

Geber multis in locis, ut & author speculi Alchymix, Iovem enumerat proximè post perfecta metalla, si consideretur ejus status oculum, nempe puritas argenti vivi, splendor, cum Mercurio assimulatio & æquatio componentium, quæ omnia de nobilitate ejus præ cæteris imperfectis attestantur: Ad hæc

in opere Philosophico proximum à Saturno locum occupat, qui propter colorem post nigredinem subalbescentem seu cineritium eidem ascribitur: Quibus indiciis quidam ducti stannum ex plumbo loto purificato aut adjecto Mercurio educere conantur, considerantes horum duorum affinitatem & convenientiam; Alii argentum ex stanno, à quo illud parum abesse putant: Quod si ita se haberet, tum ex Saturno facilis esset transitus ad Lunam per viam Iovis, & inde ad Salem. Verùm persuasio rei, quæ non est, hic prævalet: quemadmodum patebit ex natura & proprietate Iovis collata cum cæteris, Saturno & Luna. Iupiter splendet mediocriter propter argentum vivum, Lûnæque proximus videtur, Saturnus nigricat in opere & valdè infectus apparet, ut pote lividus & terræ propinquus. Luna verò in omnibus notis perfectæ & constans visitur, clarissima & alba, ignitionem patiens moderatam, antequam lique scat, in cineritio permanens: quæ Iovi non conveniunt, nisi ex parte, Saturno autem nullo modo. Nam etsi Iupiter, ut dictum, splendeat, Lûnæ tamen radiis multum

tum concedit : Adhæc licet Iupiter non ita facile cedat in cineritio , nec mox segregetur ab argento aut auro ; tamen mox in calcem sub nigram comburitur & humiditate sua radicali privatur , ut in reductione ejus in metallum , facillimè in vitrum abeat , quod non contingit ullis ex perfectis : Cum itaque dicitur , quod Iupiter in cineritio maneat , id intelligendum , in igne leviori , non examinationis , & quod non facile à perfectis separetur sua substantia illasâ : Nam si centum partes Iovis cum una Lunæ sint fusione commixtæ , quæritur quomodo arte hic Luna separetur à Iove , ut hic non comburatur : si enim Iupiter in tantâ quantitate comburi deberet , videtur major futurus labor & sumptus majusque dispendium in Iove perdendo , quam utilitas ex Luna salvata acquirenda. Adhæc combusto Iove in tanta copia cineris ejus , non facile inde Lunæ tantillum ignibus exprimi posset , nisi fluxu adhibito : Vnde labor & sumptus longè excederent speratum pretium : Si verò una pars Iovis juncta sit centum partibus Lunæ , tum combusto Iove salvatur Luna facillimè : Inde quo plus Iovis

lit & minus Lunæ in mixtura , eo difficilius videtur & minus operæ pretium. Non autem me latet , artifices invenisse modum per descensum , quo utrumque metallum , Iovem & Lunam, magna ex parte separando salvent, prout necessum est fieri in concrematione ædium , cum omnia metalla imperfecta & inter hæc abundantius stannum, fluxione permisceantur : Ex quibus apparet, Iovem reverà in cineritio non durare , sed comburi, licet argento & auro profundius , non tamen in radice, adhæreat: Causa hujus adhæfionis licet petatur ex æqualitate partium componentium, hoc est, sulfuris & argenti vivi, quorum unum in viribus non excedat aliud (de vulgaribus intelligendo) tamen potius ex argenti vivi natura & copia desumenda venit. Cùm enim aurum & argentum maximè conveniant cum Mercurio puro & claro, qui minùs sulfuris admixtum habeat, ideò Iovi præ Saturno , Venere & Matte , proximè post ipsum Mercurium aggregantur, quasi inseparabiliter, quod inde apparet, quia si Mercurius vulgi fugam amisisset, & malleabilitatem & constantiam habe-

ret, ut stannum, tum argento & auro admixtus, nullo medio inde separaretur, hoc est, nec superius abiret per funum, nec inferius ullo artificio. Cum itaque stannum proximè accedat ad Mercurium, quem suo splendore, nec non stridore sub dentibus satis ostendit, tunc difficilius à perfectis segregatur. Nam sequestrator ille & examinador Saturnus, cum multum habeat sulfuris combusti- bilis admixtum suo argento vivo, cogitur tergum dare ignibus desuper accensis, atque ita se insinuet in cineritium pro sui salvatione, ne abeat in non metallum seu lythargyrium aut vitrum, in qua fuga sulfur ejus trahit argentum vivum suum proprium, nec non cognati metalli, cupri aut latonis, non autem stanni, quia stannum plus habens Mercurii clari, quàm sulfuris terrei, hinc non est obediens Saturni rapacitati, sed manet potius supra cineritium apud perfecta, tanquam cognata sibi, ratione Mercurii, quàm imperfecta dicta, ratione sulfuris, idque ex sola naturæ similitudine & appetitu, qua aqua aquæ, & omne simile aggregatur suo simili, non ex delectu aut sensu, qui inanimatis

non inest. Causam jam dictam multum non intelligentes, ac interim Iovis cum perfectis similitudinem considerantes, non dubitarunt hunc per artem ad ea adducere coagulatione, aut potius calcinatione & fixatione: si enim illud, quod summam Iovis perfectionem impedit, quo minus sit argentum & aurum, tollatur, putarunt sua sponte ad eam rediturum: sunt autem ex evidentioribus impedimentis in Iove, sulfur comburens & foetens, stridor sub dentibus, ponderis defectus, mollities, seu ignitionis convenientis fusionem praecedentis absentia, malleabilitas vitiosa, seu frangibilitas, & minor tenuitas substantiae, idque ad Lunam, ad Solem verò, praeter haec omnia perfectiora, citrinitas. Haec itaque per artem removeri posse, & argenti aurique proprietates induci stant, iidem omnino possibile existimarent. Media, quibus haec perficere tentarunt, fuere partim solus ignis, partim ignis cum salibus aliisque adminiculis, aut aquis corrosivis. Qui solo igne, eundem processum adhibuerunt, quem alii in Saturno aut Mercurio, nempe ut vel lento calore coagulant, & superflua

Solo igne.

ab eo separarent, vel liquefactione adhibita, vel igne fortissimo. Verum his idem contigit, quod illis, nempe opinio frustrata; non ex voto succedens. Aut enim stannum mansit, ut prius, aut in calcem redactum, aut in vitrum, nec ulla reductio facta est in argentum aut aurum. Causa est, quia natura non admittit ejusmodi saltus, nec violentiam, ut quid reducatur in argentum aut aurum, absque argenti aut auri formæ introductione, quæ forma cum non sit in stanno ante, nec post manente illasâ ejus substantiâ immitti potuit, prout sub Saturno prolixius demonstratum est. Demus, quod lenta coctione Jupiter induretur magis, imò & à sulfure suo per lotiones adhibitas artificiales purgetur, ut Lunæ splendorem & formam externam referat, verum propterea non erit argentum verum sed sophisticum, quod etli examen cineritii sustineat, tamen reductionem post solutionem ab aquis fortibus vix patietur, nec in cæteris proprietatibus, pondere, ignitione, fusione, malleabilitate & similibus erit idem cum argento naturali. Qui sales, vel aquas corrosivas adhibuerunt, eodem igne cum salibus.

modo & citius Iovis substantiam cor-
ruperunt potiùs, quam perfecerunt. Ra-
tio est, quia exiccando ejus propriam
humiditatem eum ad vitrificationem
magis promptum reddiderunt, ut ab ex-
perimento patuit. Nonnulli Mercurium
inde elicuerunt, prout ex Saturno di-
versis operationibus, quo multum se
perfecisse gloriantur in transmutatione
chymica, sed ego non credulus illis, qui
novi formam argenti aut auri non exi-
stere in hoc argento vivo, nisi fortè re-
motissimè, unde nunquam per artem e-
duci possit. Ex bove, aiunt, posse fieri ca-
nem, mutationibus naturæ intermediis,
nempe si bos à canibus devoretur, & in
semen caninum transferatur, ex quo po-
stea nascatur canis. Verùm tale quid
non expectabunt ex Iove, ut transeat in
Lunam artificialibus intervenientibus
concoctionibus. Causa est, quod ibi
natura sola, hinc ars operetur. Ars au-
tem naturam imitari, quantum possibi-
le, aut potiùs, naturæ opera adjuvare
debeat: sic natura immittit formam re-
bus generatis, qua immisâ & perfectâ
in momento fit generatio. Hoc modo
ars in res per naturam habiles immittit

formam argenti ac auri, eamque de potentia in actum reducit, quam in suo subiecto proprio seu Mercuriali substantia præoccupatam transfert in quodlibet argentum vivum, quod per æquationem mutat in argentum & aurum actu, idque quasi in momento, sulfure omne extraneum separando & comburendo. Tale quid cum fieri nequeat ab arte circa Iovem, inde nec hunc absque forma illi aliunde immisâ in argentum aut aurum transmutari posse certissimum est. An verò talis forma peti possit ex eo, hoc est, an Iupiter in tincturam argentificam vel aurificam promoveri queat, de eo nunc latius inquiremus, nempe sub secundo usu.

De II. Usu ad tincturam, de qua queritur, An ex Iove fieri possit?

Non videtur consequens; Iupiter non potest artificio ullo ad perfectionem promoveri per se; Ergo nec tinctura ex eo confici. Differunt enim longè inter se, in aurum perfici seu coagulari, & in tincturam ipsam reduci: Hoc quidem

longè quid preciosius suo censu habendum, sed illud non minus difficile. Tinctura fortè absque auro vulgi perficitur, aurum autem verum vix absque tinctura: Vnde non satis est, demonstrasse, Iovem non figi in verum argentum vel aurum, sed insuper addemus, quid sperandum de eo, quo ad tincturam. Iupiter à juvando dictus revera apud antiquissimos pro subjecto Philosophico ex quo omnis tinctura petatur, habitus est, quod convincunt tot fabulæ de eo confictæ & introductæ, quæ videantur suo loco inter Hieroglyphica nostra. An verò sit stannum illud vulgare metallum non immeritò dubitari posset: Quomodocunque sit, utriusque partis & adfirmantis & negantis rationes veluti palmam, in medium producemus, ut quilibet discretus & intelligens mox veri imaginem videat & percipiat: Qui adfirmant, præter allatas ex antedictis authoribus, Gebro, Speculo & aliis authoritates nec non innumeras ex antiquissimis de Iove fabellas revera chymicas producant ex rei natura, monumenta hujusmodi, quod nimirum argentum vivum in Iove sit, quo ad imper-

*Rationes
adfirmanti-
um ex
Iove tin-
cturam
feri de-
bere.*

fecta, optimum habile ad figendum, quia non fixum, & ad tingendum, quia non tinctum particeps sulfuris albi & rubei, mediociter præparati & fixi; Vnde non impossibile sit ad ejus perfectam præparationem, fixationem & tinctionem pervenire: Quæ habilitas seu potentia cum non existat in aliquo imperfectorum simul, nisi in Iove, cur non igitur in actum potius ex eo, quàm aliis deduceretur? Ad hæc Iupiter pro spiritali habetur corpore, facilis mutationis, boni splendoris, pauci sulfuris terrestris & quod sit ad frangibilitatem pronum, imò & vitri fragilitatem; quæ omnia accidentia tincturæ veræ competunt, vel potius corpori, ex quo illa perficienda sit. Alii his adversa ponunt, Gebrum aliósque authores vetustissimos respexisse longè alium Iovem, nempe eum qui sit Martis pater, ut & alium Saturnum, nimirum ex cujus genitalibus Venus pulcherrima nata sit. Item & Martem alium, qui cum Venere concumbens sit pater Harmoniæ copulanda Cadmo: quæ omnia non possunt dici de vulgaribus metallis, stanno, cupro & ferro. Deinde, quod fixum non est natu-

*Rationes
negan-
tium.*

ra, non posse figi per artem, quod cum de Iove dici non possit, ab illis repudiatum est. Denique esse longè aliam rationem producendi tincturam ex sua radice, quàm per solam separationem superfluatorum. Opus quoque esse adjectione deficientium, in quibus duobus secundum Hippocratem omnis medicinae ratio versatur. Iupiter itaque ab his eadem facilitate profligatur, quàm ab illis admittitur. Nos licet arbitri officium in tam difficili controversia nobis non assignemus, tamen quid iudicatum sit in similibus quaestionibus reminisci possumus.

IDOLVM IOVIS.

Agatocles Siciliae rex humili loco , pa-
tre figulo natus cum sese à plerisque sub-

ditorum propter natalium suorum obscuritatem despici animadverteret, auream pelvim, quâ diu usus fuerat ad excipienda corporis recrementa, curavit in formam Iovis, seu divi maximè venerandi ab artifice converti & ornatissimo habitu effingi, eamque in summo templi loco poni; ad quam cum omnes singulari reverentia & pietate accurrent, inque terram proni procumberent; En, inquit Rex, vos veluti Iovem in hac forma aurea, quæ tamen ex quodam abjecti usus vasculo adeo excellens facta est adoratis & colitis: sic mihi ex figuli filio facto Sicilia regi debetis honorem & observantiam, quam hoc exemplo & invitamento ab iisdem quoque obtinuit. Ad eundem modum etsi Iupiter manens in sua pristina forma vilissimus habeatur, tamen si ad tincturam perfectam evehatur, non Iupiter amplius, sed rex in omnes sibi subditos, hoc est ex Mercurio generatos, futurus est. Nam forma dat essentiam rei, non materia, sed hæc illam assumit & amplectitur, ut foemina virum. Ut enim jam dictus rex in summa maiestate sedens coronâ aureâ decoratus,

in mensa patinas figulinas luto oneratas inter gemmas & aurum collocari voluit, ne scilicet unquam è memoria excideret, quâ profapia & domo, veluti ex qua materia tanta forma ortum duceret, ita quoque forma philosophica nunquam suæ materiæ oblita, eam ubicunque viderit aut tetigerit, agnoscat, & ad se rapiet, quoad potest, hoc est, in aurum convertet. Vnde patet, cum tinctura debeat agere in metalla imperfecta, atque illa ad summum metallicæ dignitatis apicem evehere, quod ex metallis, tanquam matrice extracta sit, quæ deinde similitudine suæ naturæ assultet & congregetur omni metallico generi, idque, nisi sit perfectum, perficiat. At quorsum hæc, inquires, an ex his sum certus, Iovem esse materiam philosophicam? Respondeo, Iovem vulgarem esse nego, Philosophis notum adfirmo. At qualis hæc? quæ in aquilæ forma Ganymedem in cælum evexit, quæ in aurum mutata Danaæ in gremium decidit, quæ sub forma cygni albi Lædam compressit, ex quibus paucis de similibus quamplurimis iudicabis. Nisi enim ad volatû sit idonea, aut ad lapsum

fuo pondere apta materia, non est Iovis nomine digna, cum ne minimum juvare possit opificem, sed plurimum morari.

De III. Vsu ad medicinam.

Nunc ad medicinam quantum spectet Iupiter, breviter adjiciemus. Non quidem magni usus est in medicina corporis, nisi quod vasa ex eo ad medicamenta vegetabilium continenda fiant, sed hoc potius ex perversa multorum ignorantia contingit, qui Iovem dominum (veluti in Saturnalibus antiquis mos erat) servis suis servire non sine usu intelligentium jubent, cum potius ille in medicamentum redactus optimum, ab his scilicet vegetabilibus in vitrum conversis transparens, contineri & servari deberet. Tanta est humani ingenii infirmitas & labilitas, ut quæ rara sunt, minus utilia præferat utilissimis in copia existentibus, ut ex veste judicet de corpore, ex corpore de mente. Cum decora & aurea vestis sæpè abscondat corpus deforme; corpus verò pulchrum non rarò mentem enormem, & vice versâ. Vestem vilem detrahe Iovi, & habebis

medicinam optimam, dummodò hanc conjungas cum Iovis filio optimæ indolis, cujus nutrix Latona extitit. Osiris, inquam, qui & Iupiter & Apollo & Mars, uxorem ducat sororem Isidem, Iunonem, Dianam & Venerem, ut ex duorum conjugio mascula proles nascatur. Alij calcinant Iovem, & conjungunt cum duplo sublimati, distillantque per retortum unde diaphoreticum medicamentum conficiunt, ut sperant. Verùm, qui his utuntur, sint cauti, ne corrodenti veneno tunicam induant, quâ exutâ, hostem se potius vitæ humanæ, quàm amicum declaret.

C A P. I V.

De Monte Veneris.

INter metalla, quæ Deus usui humano maximè inservire voluit, est Venus præstantissima, tam corporis pulchritudine exteriori, quàm virium robore firmiori prædita. Inde non solum ad munera fervilia adhibita est, sed quoque numis, pretio rerum mutabilium primitus

materiam præbuit, cum æs seu pecunia
 area, Iano regnante, ut fabulantur,
 excussa sit, ac Romæ longo tempore
 post argentum signatum legatur. Imò
 Tubal, ut in sacris habetur, omnium
 primò ex venis terræ hoc rimatus in
 lucem protulit, & ad opera varia ac-
 commodavit. Et quod magis admiran-
 dum, ex ære ad dignitatem & preciosi-
 tatem auri accedente Salomonis tem-
 pore monumenta templi divini pulcher-
 rima facta sunt. Vnde & post apud Ethni-
 cos æs Corinthium maximè præcellens
 in honore extitit, quod deleta à Roma-
 nis Corintho, quasi toti orbi pro exuviis
 gratissimis & manubiis memorandis di-
 stributum est. An verò hoc fuerit præ-
 clarum aliquod genus latonis, vel me-
 talli alterius, nunc ignoti, dubitatum
 est à quibusdam, à nobis verò æri Cy-
 prio, unde Venus Cypria & cuprum di-
 citur, in colorem aureum sive opti-
 mum latonem translato ascribitur. Quo-
 modocunque sit, semper constat, Vene-
 rem fuisse in artis operibus, sive ad chy-
 miam, sive ad alia, quæ cum innumera
 sint, nec nostro proposito accommoda-
 ta (possunt enim unius rei esse diver-
 si fines

si fines & utilitates) saltem ex chymicis potiora , & quæ aliquid valoris & probabilitatis obtinent , seligenus , & in medium producemus , idque prædictâ methodo, ut triplicem æris usum, nempe ad aurum, tincturam & medicinam, ordine declaremus.

De I. Usu ad aurum.

Qui æs ejusque naturam & proprietates explorant & considerant, magnam ei cum argento & auro affinitatem ut ascribant necessum est, quodque ad utrumque sit trãsmutabile: Cum enim spectent ejus tardam fusionem, ignibilitate præcedente, malleabilitatem & extensionem, nec non alias dotes, non dubitant, id sulfure combustibili per artem detracto in argẽtum vel aurum transformare & convertere. Vnum enim sulfur extraneum æri commistum efficit, quod non sit argentũ, quo ingeniosè separato, nihil impedit, quin rediturum sit ad Lunæ perfectionem: quod si tum magis coquatur, ad Solis sublimitatem. Hæ, inquam, cogitationes non sine subtili rationis discursu à quibusdam instituuntur, quibus ut satisfaciant, ad opus se accingunt: Verum

ut ingeniosus lector, quemadmodum
promissimus, & tractatus inscriptio tes-
tatur; multum utilitatis ex hoc nostro
labore, & plus (absit invidia verbo) quam
ex centenariis aliis deceptoriiis libellis, re-
porter, naturam hujus metalli primò
percunctabimur, deinde media & ope-
rationes, quibus hoc ad argentum vel
aurum adduci posse præsumitur, una cum
causis possibilitatis aut impossibilitatis
exponemus. Nolo autem hic insistere
diu aliorum testimoniis recensendis,
cum pluraque eorum non tantum ve-
ritatis, quantum ad speciem ostenta-
tionis habeant, & nos non solum le-
ctioni scriptorum, sed & lustrationi lo-
corum nec non manuum labori incredi-
bili circa has res longo tempore intenti,
non nihil in his videamus & experti simus
quod fortè ex libris haurire non licuisset,
æs, prout in vicinis Germaniæ locis &
amplius observavimus, ex diversis mine-
ris, quoad aspectum eruitur, nonnun-
quam laboriosissimo artificio & ingenio,
ut in primis Goslaræ in Saxonia, ubi
montis Rammi mineræ contritæ molis
& aquis elotæ per plurimos ignes grada-
tim torrentur & exuruntur antequam

ad fusionem metallicam præstandam
fiant habiles, five in cuprum malleabile
& purum transeant; ut operatione com-
pleta decies octies ferè focos & ignes
varios sub dio, inque furnis, partim
torrefactionis, exustionis, in massam la-
pideam reductionis, descensionis, lique-
factionis, probationis & ejusmodi alios
expertæ sint & lustrarint. Nam primò
ut ex dicti montis (qui ferè totus intus
mineralis est) ruinis durissimam pyri-
tem seu lapidem exscindant, opus est
igne prævio flammali ad latera montis
disposito per noctem, quæ invulnera-
bilis alias durities saxi edometur & vin-
catur: Deinde mineræ selectæ & eductæ
torrentur, ad sulfur colligendum, (ut
cap. 1. sub usu 1. supra innuimus) post
ad vitriolum macerantur aquis: Hinc
motis contusæ & elotæ novem ignibus
successivis torrentur, ut nimirum ma-
litia fumorum venenosorum & argenti
volatilis adhuc (cujus ferè drachmas
duas in centenariò pondere latere di-
cunt) prædatorum sensim coërceatur,
ad quod non nihil scoriarum aut fru-
storum ferri adjiciunt: post in lapi-
dem nigrum reducunt, & tum ad

alias ignes transeunt hisce operibus consuetos. At quorsum hæc ? Vt ignari harum rerum intelligant, æs permultos labores ad metallicam massam ex quibusdam mineris educi, & quod ars his quasi stratagematis usa naturæ Embryonem tenerrimum, argentum, ex hujus visceribus eruere possit matre & foetu illæsis: Deinde, quod ut infans, antequam edatur in lucem, excrementis, quibus immerfus est, ab obstetrice liberatur, sic metalla à suis facibus nocivis, antequam pura & tractabilia fiant, purgantur ignibus & aquis. Tandem cum jam deleta sit maxima pars heterogeneorum à metallica æris naturâ, ignibus vehementissimis & fluxibili materiâ adjectâ, in corpus fluens, & metallicum reducitur, in quo est granum illud perfecti, per plumbum adjectum inde segregandum, furno, ut vocant, descensorio, ac post per cineritium rursus à plumbo, furno seu foco separatorio: Quod si ejusmodi fiant in magnis illis operibus, igne forti & artificio multis ex vulgo noto, quidni, ut ratiocinantur harum rerum curiosi, subtiliori ingenio æs tractatum in argentum & aurum transiret ? Nam

I. Æs ut transeat in argentum vel aurum quorumdam operatione.

quod secundum partem transmutatum est à natura, & ab arte, ne pereat igne, conservari potest, nulla videtur causa obstare, cur non secundum totum in argentum migret, arte ministrante? Verum alii respondent, veluti sub Saturno retulimus, quod ars in hoc naturam imitari nequeat: quod licet verum sit, tamen ab experientia cognitum est, hasce mineras ejusmodi cauto igne tractatas plus argenti reddere, quam alias inconvenienti exustas, quod itidem de auri venis, aliisque exploratum habetur, atque hinc concludunt illi, si hinc artis beneficio argentum & aurum in lucem nascitur, quod alias perituum esset, quidni ejusdem ope in sua matrice augeri & perfici possit? His indiciis ducti & docti, æs in argentum & aurum transferre nituntur & laborant. Quod equidem in mineris ipsis igni intactis vix licet, quia eæ adeo impuræ, & facibus multiplicibus permixtæ sunt, ut nihil boni inde sperandum sit, quamvis quoque purius æs, at rarissime visatur. Idcirco ad ipsum metallum sese conferunt adhuc prægnans suo innato foetu, idque ignibus exponunt, sed eodem eventu, quo alii

Calcinationem metalli.

in antedictis operibus occupati. Ignibus enim sive levioribus, sive fortioribus utantur, multum spei, parum rei hic inventuri sunt: quia licet colores optimè respondeant, pondera augeantur, & reliqua bene se habeant, attamen nec argenti, nec auri augmentationem ullam persentient, nisi fortè per mille annos in labore perdurent: Ad hanc operationem eò audaciùs incipiendam & patientiùs perficiendam, Geber quoque classicum canit, cùm inquit in Summa perfect. cap. 32. de auro, inter ærisamenta, quæ in arena caloribus Solis exposita fuissent post lotionem aquæ per triennium ea percurrentis, aurum optimum inventum esse: Verùm hæc verba sunt adeò dubia & sophistica, ut nemo illis fidere debeat, cum vario sensu intelligi possint, non solum tropico, sed & prout sonant, simplici. Nam in multis mineris æris aurum invenitur, ut & argentum, secūdum naturam minerarum: sic in arenis idem aurum, ut & in rivis fluviorum colligitur, & fortè interdum æs, translatione ex aliis locis aut venis. Quid hæc ad transmutationem æris in argentum & aurū per artem? Ars enim

in his naturam non assequitur, sed admiratur potius ejus progressum & opus, ubi rimari nequit, multò minùs imitari. Quidam ad sulfuris ablutionem & segregationem utuntur aliis mediis, nempe ^{2. Sulfuris} solutione in aquis corrosivis vel acri- <sup>segrega-
tione.</sup> bus, aceto distillato & hujusmodi, ac post calcinant & reducunt, prout Geber aliique chymici secundùm literam innumeris suis tractatibus præscribunt, sed qui hoc modo operantur, sciant, sulfuris illius abstersionē esse longè difficillimā, propterea quod suo subjecto in profundo adhæreat, & ne quidem illo destructo separetur, nedum salvo & illæso: Cujus rei causa cum sit diversa ab antedictis, hic insinuanda est: sulfureitas in Venere duplex est, una inflāmabilis & volatilis, altera neutiquam, quarum prima per calcinationem repetitam deletur, imò vix deletur, secunda neutiquā, nisi accedat cum argento vivo lotio conveniens, aut sulfuris aurei substantia eam ablegans. Duobus enim hisce modis abigitur, licet pro una via haberi possit. Causa, cur non illis artificiis, sed his segregetur, manifesta est, quia ignis, & quæcunque corrosiva exiccant, & sic magis astringunt & sti-

pant illam ſulfureitatem terream, ac interim argentum vivum, cui adhæret, abſumunt & fluxioni inutile reddunt. Vnde ex utroque terrea ſubſtantia reſultat, non aurum nec argentum, quod quæritur. Vbi admirabile quid cõtingere animadvertimus (quemadmodum quoque in plumbo) quod Venere calcinatâ & igne crematâ, ejus pondus magis atque magis augetur, eò uſque donec in quinta parte primum pondus excedat, cum tamen conſtet, ignem abſumere omne humidum, & id eò pondus minuere. Hinc experientiſſimus metallorum probandorum per Bohemiam magiſter, Lazarus Erkerus, inter cætera ſui operis abſolutiſſimi, non immeritò hanc quæſtionem movet, at inſolutam Philoſophis diſcutiendam relinquit, cur nimirum cupella probationis æris unâ cum impoſitis ante operationem, & poſt ponderata, gravior ſit poſt, quàm priùs? Cujus rei cauſas occultas, ut alii pro ſui ingenii ſubtilitate inquirent, facilè concedo. Quantum ad me ſpectet, agnoſcò in duobus illis metallis, ære & plumbo, quæ ingrediuntur cupellam, abſumi non tantùm humidum argenti vivi,

sed & magnam partem sulfuris combustibilis, quod si jam respondeamus, humido absumpto terram graviolem reddi, hoc tamen non fieri in aliis rebus experimur. Exempli gratiâ, si ex rosâ distilletur aqua, & caput mortuum, seu massa illa in fundo reliqua ponderetur, non erit tanti ponderis, cujus ante fuerant rosæ impositæ, tantum abest, quod erit majoris. Hinc si dicamus, nullam ibi fieri evaporationem humidi sed potius condensationem in terram, huic respondetur, condensatio si fiat, ratione humidi evaporantis continget, ut videmus in luto humido arescente, vel melle cocto ad consistentiam, quod si ita est, neque hac ratione pristinum pondus habebit, multo minus majus. Verum Philosophi dicunt, quod in sua coagulatione crassius ignis cadat in aërem, densius verò aëris in aquam, & hujus densius in terram, quâ ratione hujus difficultatis subterfugium quidam petere possent, sed non satisfacient omnibus. Alii ignem augere hanc substantiam asserent, quod frivolum est cogitare, alii in humiditatem cupellæ transferant causam, quæ

imbibatur ex aëre post operationem, sed hoc inanè est phantasma, quomodo enim in cineritiis aliquot uncia aëris attrahi possent, cum potius cupellæ humidiores censendæ sint antea, quam post. Est qui ad plumbi jacentis sub dio gravitatem contractam, aut etiam calcinati pondus majus respondet, terrestreitatem ejus auctam esse aucti ponderis causam; quod huic concedendum, quia augeri potest imbre & terrâ maceratum plumbum, at in proposita questione tale nil accedit, nisi ignis, qui nihil auget, sed omne potius minuit. Dicimus itaque levibus ablatis sulfuri-
bus aut concrematis, corpus gravius reddi, haut aliter quam eundem hominem esse longè graviorem mortuum seipso vivo, nempe spiritibus aëreis & igneis, qui librabant corpus vivum in cadavere amissis, alii statuunt. Quæ causa si cui non arrideat, quæraturne verisimilior, quæ tamen cum dicta natura
3. *Solutio-
ne in a-
quas cor-
ruptas.* ra metallica conveniat. Præterea, cum constet, Veneris ex ferro generatio-
nem aut educationem medio vitrioli, vel vitriolatæ aquæ, fieri, veluti in jam dicto monte Ramma usu receptum oculis

ipsis annotavimus, hinc eiusdem Veneris in argentum vel aurum progressum continuari posse, quidam autumant, dummodò convenientibus aquis aut salibus tractetur seu solvatur & congeletur. Hoc argumentum etsi ex probabilibus sit, & non necessariis, concessis omnibus ejus antecedentibus, ideóque non opus habeat responsione, tamen cum multa hinc dubia oriri possint, tam contra artis veritatem, quàm aliàs, huic breuiter respondemus: Misochymici (inter quos Guibertus quidam) negant hanc transmutationem esse veram, sed saltem cupri atomorum aut insensibilium particularum per aquas vitriolatas collectarum & absconditarum in iis vel vitriolo congregationem fieri ferro aquæ imposito, cujus sententiæ se quoque diu fuisse testatur antedictus Erkerus, nisi vidisset in subterraneis aris fodinis claves ferreos cuicunque ligno infixos, tempore intercedente longiori, in purum putúmque cuprum transmutatos fuisse, quod adeò evidens est, ut nullam refutationem admittat. Concedendum itaque, hanc transmutationem ferri in cuprum esse possibilem &

fieri dicto modo, at interim non sequitur, cupri in argentum vel aurum eodem modo conuersionem fieri per aquas artificiales aut sales. Differentia enim inter perfectum & imperfectum maior est, quàm inter imperfectum unum, & aliud, præsertim Venerem & Martem, aut Iovem & Saturnum. Ex ferro, si aliquid sulfuris terrestris prohibentis fusionem ejus segregetur arte, videtur illud in Venerem transire posse. Et sic dicendum de Saturno, nigredine ejus separatâ ad partem, in Iovem transituro: At ut ex Venere fiat Luna, oportet ut totum sulfur Veneris, quod copiosius est, arte dealbatur, quod adeò arduum, ut penè impossibile habeatur, veluti supra diximus. Huic malo sophistæ remedium invenire satagentes, ad dealbationes Veneris se contulerunt superficiales & non radicales, cum Mercurio sublimate, arsenico albo, antimonio, zinkio, stanno, bisinuto & similibus multis præparationibus interpositis. At deceptores potius inuenti sunt, quàm veri Philosophi. Causa horum deceptionis modorum hæc est, quod Venus habeat intra sua viscera morbum lethalem & in-

curabilem remediis omnibus , exceptâ unicâ medicinâ , nempe sulfur comburens terrestre : Vnde corpus ejus porosum , deforme & infirmum redditur. Hic morbus curandus suscipitur ab his Empyricis , emplastris & illitionibus cuti optimum colorem conciliantibus, ut sic naturalis , & vivida temperies rediisse , corpusque sanum esse videatur. Verùm ad tempus sub hoc pallio delitescit morbus coram ignaris , qui post cineritio , coloritio , quartatione & ejusmodi examinibus facilè in conspectum venit , & medicastro suo imperito & improbo , malæ voluntatis & duræ cervicis , viro , infamiam , si non mortem aut carceres pro mercede curationis reportat. Idem dicendū de sophisticationibus seu citrinisationibus Veneris ad auri colorem , ut fit in latone cum tutia aut lapide calaminari , aliisque ejusmodi præparationibus , quibus ex albo & rubeo coloribus certa proportione inter se mixtis citrinus nascitur aut flavus , aureo similis , non æqualis. Verùm quod his omnibus deceptoribus Albertus occinit , hic nobis sufficiat. Quicunque , inquit , albificant cum albis & citrinant

Rubificationibus.

per citrinâ , eâdem manente metalli substantia , hoc est , non purgatâ à sulfureitate sua , sunt deceptores : quod licet in latone non fiat (vbi flavedo non flavo , sed albo in rubeo colore apparet) tamen sulfureitas non est adempta , quæ postea in igne corpus metalli non defendit (uti debet , sulfur verum) sed comburit , non ponderosum , sed leve reddit , non ab efflorescencia in acutis aut corrosivis tuetur , sed viriditate & ærugine inficit , ne quid dicam de aliis ejus corruptelæ causis aut signis.

II. De usu ad Tincturam.

Qui tincturam vetò in Venere quæsi-
verunt , non multum suæ rationis iudi-
cio aberrarunt , cum viderint corpus ad
omnia sibi deficientia acquirenda & su-
perflua demenda satis habile & dispo-
situm , in eoque potius spem & laborem
ponendum , quàm in curcuma , sanguine
humano , cortice granatorum & capil-
lis , hisque similibus , quæ facili ignis
combustione in cineres abeunt , & arti-
ficem impensis defraudant. Est enim
Venus inter corpora coloris ad tinctu-

tam rubicundissimam capiendam propinquioris, qui in igne non facile cedat, sed liquefactionem post ignitionem in suo subiecto harena admittat, quorum nullum in jam dictis contingit. Quid multis? Geber dicit, Venerem habere in se sulfur fixum tingens in infinitum, ut aliorum testimonia prætereamus.

Hæc cum quidam intelligerent, Venerem ad tincturam assumpserunt crudam, eamque miscuerunt diversis metallis & mineralibus, quibus per ignem fortem combustis, in Venere tincturam auctam opinati sunt, quam auro addiderunt, & sic augmentationem in argentum promiserunt: Quantum præstiterint, ignotum mihi est, hoc scio, quod hæc tingendi ratio sit naturæ adversissima propter causam, quam adjungo: Aurum non plus habet tincturæ, quam sibi sufficiat, nisi plus aliunde acquirat, nihil argento communicare potest: At dices, quod ex Venere acquisiverit aliquid tincturæ: Ego id pernego: Tinctura est argenti vivi purissimi substantia fixa, hoc est, in omni igne perdurans absque diminutione, calida & sicca in subiecto humido, ideoque potius ca-

i. Ut ex
ere tin-
ctura fiat
aliorum
opinionem
combustione &
mixtione
cum perfectio.

lida & humida, in summo gradu. Ad hæc substantia non fuit in cupro ante naturaliter, nec post introducta: quod non fuerit, patet, quia perfecisset suum argentum vivum in aurum; nec post advenerit, quia hæc est veræ tincturæ proprietas, quæ non levi artificio in cuprum introducitur: Ergo nec Venus quid tincturæ communicavit auro: Hæc est hujus Labyrinthi Cynosura verissima, quæ à multis erroribus sui sequacem liberabit: Vt enim Cynosura in coelo per se mobilis est, attamen habet stellam unam in extremitate suæ caudæ, polo mundi immobili propinquiorem, ita etiam hæc nostra tractatio: Satiùs est animadvertisse, quo non sit dirigendum iter, quam in immenso Oceano errasse & ad omnes mundi plagas absque ulla cursu directione vagatum esse. Alii non crudis, sed coctis ex Venere positis remediis usi sunt ad morbos imperfectorum curandos, idque diversis viis, quas ipsi sibi invenerunt, & non nostrum est explicare: Hi considerarunt, quod natura ubi morbum, ibidem & remedium posuerit, dummodo homines eo egentes id eligere & à facibus adherentibus separare

*Simile à
Cynosura*

*2. Extrac-
tione
ejus sul-
furis per
varias
prepara-
tiones.*

rare possint. Geber ubi de Venere loquitur, quod habeat in se sulfur rubeum, similiter de Marte, Saturno & Sole, imò de sulfure & Mercurio, aliisque innumeris idem refert: Videndum igitur, cui fidendum, quo loco & tempore: Corpus ex quo sulfur illud extrahi debeat idem Geber dicit, esse spirituale: An tale sit Venus, dubitandum donec inquisitum sit: sunt equidem multæ gentes, quæ bonos habeant, naturæ indulgentiâ, cibos, sed quos ipsæ vel inscitiâ vel ignaviâ, aut præpostera de sese nimisque magnifica persuasione ductæ & indoctæ præparare nequeant: Ita contingit cum corporibus metallicis; quæ permulti sciunt esse utilia ad tincturam inde eliciendam, sed ipsi præparare, aut nesciunt, nec inquirunt, aut labore deterriti abstinere ab iis, suisve rebus nimis addicti non curant de aliis magis indagâdis: animal quoddam ajunt, cui Inertiæ nomen est, arbori pomis onustæ adrepere, eamque cauda verberare, sed non ascendere, etiamsi possit, fame penè moribundum, & ungues à natura datos possideat, ne scilicet post descendere opus habeat. Huic persimiles refert Baconus, quam plurimos chymix

amantes ejusque fructuum cupidos, at laborare nolentes, ideoque de artis fine desperantes propter sumptuum, laboris & temporis interpositionem forte cum jactura faciendam: Nonnulli aliam ingrediuntur semitam, nescio an foeliciore, considerantes visitanda esse interiora terræ juxta literas initiales ænigmatis, dum, prout Mercurio vulgi Mercurium metallicum sic sulfure communi sulfur metallicum ex Venere elicere conantur. Sumunt itaque Venerem & calcinant sulfure communi, veluti quorundam processus est in propatulo, indeque sulfur, aut, ut illi vocant, vitriolū educunt, sanè nullā aliā intentione, quàm ut cum eo tingant, quod cum non in hoc vitriolo inveniret, aliis usibus, ut fit, applicarunt, nempe ad oleum seu spiritū vitrioli inde conficiendū pro stomacho confirmando laudabile Esurinum. Sunt alii, qui crocum inde faciunt vel æs ustum, solvuntque in aquis regijs, fortibus aut spiritu urinæ, per se, vel miscent cum alijs, & tandem vel cum auro solo, vel cum auro & Mercurio miscent & figunt, quorum laborum & mixturarum cum sit inenarrabilis numerus, nos singulis recensendis supersedebimus;

3 Vitriolo seu sulfure Venere.

4. Croco ve' ære
1310.

Et saltem ad jam prolata, ex quibus de
similibus judicandum erit, respondebi-
mus: Sanè crocus ille vel æs ustum in
medicina corporis externā optimi usus
est, vix ad internam, qualis tinctura ei-
se debet, quia venenosi multum adhuc
& corrosivi obtinet: Hinc vulneribus
aut ulceribus exedendis aut cicatrizan-
dis non utiliter adhibetur: Quod si ve-
rò cum ejusmodi aquis corrosivis mis-
ceatur, eò magis exedentis propieta-
tis evadet, à qua abstinendum: Causa,
cur non in vitriolo aut croco aris quid
boni ad tincturam sperandum sit, ex
hisce patet. Tinctura est purissima pars
argenti vivi calida in humido agens;
qualitatum excellentium, quæ non sunt
in jam dictis substantiis siccis & impu-
ris, terrenis & nihil aut parum argenti
vivi continentibus: An jam has quali-
tates his subjectis inducere possint, nec
ne, disquirant intelligentiores: Verum
alii ad evitandas has difficultates ex Ve-
nere Mercurium longi temporis labore
elicuerunt, eumque ad tincturæ pro-
prietates recipiendas aptum existima-
runt, quippe qui homogeneitas Mercuria-

*s. Mer-
curio
Veneris,*

lis, fluxibilitatis & fixitatis non obscura documenta polliceatur: At præterquam quod difficilimè educi possit, impurus est & viriditatem semper suam ostendit, sulfureitatis nunquam expers, à qua si tandè purgari posset, quid aliud quam Mercurius vulgi, Saturni aut stanni præstaret? qui si ex antedictis rationibus non poterunt coagulari in aurum, nec tincturam, nulla est causa, cur hic illis sit ad eadem aptior: Fixus fuit, inquires, ideóq; facilè fixandus, iterum tinctus, ideóq; tingendus. Ad hæc respondeo: tinctus non fuit, nec fixus verè, nam quod talis existimetur à sulfure rubeo, impuro & fixo partim provenit, quod cum sit corrumpens & non constans in igne, nec ex substantia argenti vivi, nec color nec fixitas Veneris est legitima: Cumque hæc reducta dicatur in Mercurium, nec id absque alio Mercurio factū sit, vereor, ne plus ipsi adsit de alieno, quam de proprio; & si quid de proprio, id viriditate & ærugine obsessum, à quo si iterum separet alienum, in suam substantiam redibit metallicam fortè, & sic nihil factum fuit. Verum demus, quod sit ille Mercurius Veneris purus

& genuinus, nihil tamen confert, propter proprietates tincturæ sæpè dictas, quæ nullo artificio in Mercurium possunt induci, nisi hic vel ex toto maneat frigidus & humidus; sicque currens, vel è contra calidus & ficcus per accidens, in forma ficca; Et sic nec aurum nec tinctura inde habebitur. Vt autem quid de Venere ejusque tinctura (cui Basilius Valentinus multis in locis calculum, ut videtur, adjicit) æstimare debeas: meliùs intelligatur, en accipe emblematicam hanc figuram, quæ sequitur,

CHAMÆLEONTIS ANATOMIA.



Magnus ille rerum naturalium contemplator Democritus ex Abdera oriundus, qui uti supra vulgum saperet,

patriam reliquit, & Ægyptum, matrem scientiarum omnium, adiit, ubi Philosophorum ac sacerdotum sapientissimorum contubernio aliquandiu usus, abditissimorum mysteriorum cognitione optimè instructus, tandem ad suos rediit, ubi cùm ferè omnes diversissimis & inanibus desideriis rerum futillum & inutilium detineri animadverteret, veras autem scientias & artes, quæ animum divitiis & corpus optima sanitate beant, alto supercilio despiciere, non potuit non hominum ineptias, & præposteram vivendi rationem perpetuo cachinno explodere & deridere. Cùmque Philosophi sit, causas rei proximas agnoscere, non dubitavit in visceribus animalium ejusmodi vanitatis in hominibus causam inquirere & explorare per anatomiam medicis usitatam. Existimavit enim vir prudentissimus splenem in primis, qui melancholici humoris, omnis phantasticæ opinionis, authoris, receptaculum est, in illis bestiis, quæ proximè ad hanc hominum diversi colorem pravitatem & nequitiam suâ naturâ accedant, perlustrandum, & subtilissimè investigandum, num quid inso-

liti, & præternaturalis humoris contineret. Cum hac ratione brutorum multorum cadavera secuiſſet, & variarum rerum cauſas, pro cuiuſque animalis diverſitate inſpexiſſet, tandem omnium beſtiarum verſutiſſimam, quæ maximè homines aſtutos & verſipelles, inque ſingulas horas mutabiles, in vanitate autem ſua nimis conſtantes, repræſentaret, Chamæleontem ſibi adferri curavit ex Africa, cujus utpote rariſſimi & incogniti in hiſ locis, hæc eſt deſcriptio. Roſtrum ad modum ſuis, corpus aſperum crocodili inſtar, caudam prælongam, quæ in tenuitatem deſinit viperinis orbibus ſe implicans, crura ejus recta, latera ventri junguntur, ut piſcibus, ſic & ſpina: oculi in cavo reſſu prægrandes & concolores corpori, qui nunquam operiuntur; nec pupillæ motu, ſed totius oculi verſatione circumſpiciunt: Colorem mutat corpore, caudâ & oculis reddítque ſemper quæcunque proximè attigit, præter rubrum & candidum: Ore eſt ſemper hianti, ſolúſque, ut ajunt, animalium nullo alio, quàm aëris nutrimento nutritur: Ungues ei adunci, & motus tardus, ut

testudini: Has & alias hujus animalis proprietates Democritus observans singularum causas per sectionem indagavit & invenit. Rostrum suillum ipsi à natura datum existimavit, ut voracitatem significaret, licet saltem aëre nutriretur. Corpus crocodili fere invulnerabile, ut tarditate motus aliorum injuriis non esset expositum: Caudam viperinam, quia venenositatem quandam in se habeat, homini infestam: piscibus quoque similis, quia quatuor elementa optimè repræsentat quatuor animalium formis. Oculi aperti, quia nunquam dormire videtur, hoc est, somno opprimi non apparet. Colorem mutat in omnes differentias præterquam in rubrum & candidum, hoc est, fit niger, viridis, ceruleus, aliisque coloribus insignitus, sed optimos illos quæsitos non exprimit, aut si exprimit, non tamen sunt veri, at saltem per deceptionem visus contingunt: Aëre vescitur, quod est admirandum in quadrupede tam corpulento: Aër enim instar fumi in viscera & venas ejus penetrat & mutatur in sanguinem, qui tamen subniger magis est, quam rubeus, uti esse deberet. Cujus rei causam cum Philosophus acutissimè in-

quireret nec ab instituto delisteret, invenit viscus illud, quod atrum sanguinem ex tota massa separare debeat, huic animali deesse, nempe lienem. Atque hinc motum ipsi tardissimum ad esse, ob terrestribus humoris melancholici in corpore manentis copiam, hinc abesse quoque ipsi rubrum aut candidum colorem, quia uterque à bona temperie sanguinis oritur, quæ non est in hoc animali: Inde quoque huic defuncto pallor adfuit in toto corpore, sanguis autem soluta circa cor & oculos. Quæ omnia cum Democritus observasset, ac inter cætera Hippocrati medico astanti declarasset, his indiciis manifestissimis satis testatum reliquit se esse Abderitarum omnium sapientissimum, nec insanum, (veluti existimarent, ideóque ad maniam ejus curandam Hippocratem ablegarunt) ipsos verò Abderitas pravis opinionibus preoccupatos circa vanitates mundi instabiles ex melancholici humoris copia & lienis defectu dementatos versari, & vitam belluarum indomitæ instar degere, ideóq; Hippocratico elleboro & fortissimo auxilio indigere.

De III. Vſu ad medicinam.

Intra corpus humanum propinaſſe medicamenta ex Venere præparata, temeritatis vel audaciæ inexpertæ à plurimis cenſetur ſignum, cùm conſtet in Venere cruda per ſe aliquid cauſtici ineſſe, quod corpori humano haud conveniat, in primis ſi cum acribus & corroſivis exaſperetur & corrodatur. Nihilominùs invenimus alios fœliciter tam ex cruda quàm præparata Venere uſurpaſſe remedia, quorum experientia maneat in ſuo valore. Quidam enim acetum diſtillant in vaſe cupreo ſeu veſica cum alembico vitreo ſeu ſtanneo, & aquam inde diſtillatam promittunt evacuativam per vomitum & ſedes abſque noxa, quod qui velit, experiri poterit, & in Care ꝑ (quod ajunt) aut potiùs cane, facere periculum. Alii præcipitatum ex Venere & Mercurio in peſte ſibi profuiſſe teſtantur, cum alia medicamenta non eſſent ad manum. Eſt, qui ab hoc, tanquam veneno exitiali, dehortetur medicos, cui obſequendum cenſeo, etiam alterius experimento edo-

catus, qui optimum quoad calorem, ex Venere medicamentum, experiretur, cato in os intrusit fortè ad grana tria, unde quidem mox nihil mali sensit, vel eodem die catus, sed sensim contabescere cepit, ita ut ex tabe intra mensem ab assumptione illius mortuus sit. Non enim in tanta copia medicamentorum certissimorum, quorum tot secula mundi experimenta & pericula subierunt, opus erit ad dubia, periculosa, haud cognita transire, relictis cognitis, tutis & exploratis. Medicamenta amicorum habeantur loco, ex quibus non decet novos anteferre veteribus novitatis gratiâ, uti cum equis usu venit, sed veteres, ut antesignanos, in maximo honore habere, novos interim familiariter accipere & utendo probare: Idem de medicamentis novis & veteribus iudicium & discrimen statuendum non diffiteor: Constat enim plæraque à chymicis medicamenta facta & in cœlum suis laudibus, forte dignis & meritis, evecta, casu fortuito esse inventa, nempe ab aliud quærentibus; Vnde miror hos ipsos gloriari adeo de illis interdum, uti non videantur aliquid reperisse, quod

pueri in fabis , tanquam veteres chymici aut medici , inter quos Avicenna & Arnoldus , nihil ejusmodi sciverint aut fecerint , quos tamen permultos errores errasse & exantlassse non est dubium, antequam ad artis perfectam veritatem pervenerint , ideóque & talia & tanta, qualia & quanta moderni jactant , remedia jampridem fecisse , habuisse, & probasse , at cum fortuita & non quaesita fuerint , neglexisse & silentio præteriiisse : utpote imperfecta & dubia : His non obstantibus existimo exVenere præclarissimam antidotum contra venena & plæraque corporis humani mala utilissimam confici posse arte spagyrica, qua sulfur illud causticum temperari, si non separari , possit ; quod tamen non cujusvis fore artificis , sed experientissimi & circumspecti opinor.

C A P. V.

De Monte Martis.

MArtem, licet corpus sit durum, nec in igne fluens, tamen metallis ad-

numerari non eſt dubiũ, tum propter maleabilitatem ejus, tum ſplendentem ſubſtantiam, quæ ex argento vivo, metallorum omnium ſpermate, originem duxit. Vt enim in republica ſeu ſtatu politico ſunt diverſi mores, habitus & officia civium, quorum alii præſident cum honore, alii ſunt nobiles, alii ignobiles & manuiarias exercentes operas, ita in hac metallurgia ſeu Septemvĩratu metallico quædam ſunt in cenſu & pretio, quædam non, quædam mollia & non aſſueta ignibus, quædam dura & aſſueta, quale & ferrum habetur, ſervus, ut ita dicã, omnium: Imò Stratiotes ſeu militiæ peritus & Mareſcallus, qui regi & regiñæ, Soli & Lunæ (ut & Saturnus Cancellarii, Iupiter theſaurarii & Mercurius legati ad externos mittendi vices obtinens. Venus verò Gynæcio addiãta) ſerviat. Qualem politiam in ipſis planetis cœli, quorum nominibus hi terreſtres ſimilitudine quadam appellantur, obſervare liceat, nempe rege tenente medium ſui regni, cæteros conſiliarios, Saturnum, Iovem & Martem, utrinque ſtĩpare ejus latera, ad quem proximè accedentes ſe humiliter ſubmittant, ne quid ejus majeſtatis ſplendori &

authoritati detrahant, remoti verò sublimius, ingrediantur tardius & tutius, retrò, citràque, non tamen ab orbita veritatis, hoc est, Ecclipticæ lineâ, nimium recedentes. Mercurius regi proximè adhaeret, ut satelles, à cujus radiis obfuscat, at Venus tam vesperi, quàm manè suâ luce regis propinquitatem manifestat. Luna verò, veluti Regina, à Sole lumen mutuatur, quæ (ut & cæteri) ne officiat ejus splendori, proxima, tenuior, remotior, plenior apparet, ut reliqua cœlestium luminum admiranda, & hominì contemplanda munera hic prætereamus. Quæ etsi ita se utrobique habeant tam superius, quàm inferius, tamen non ideò ascribere possumus Marti inferiori superioris virtutes, nec è contrà superiori inferioris. Dicuntur enim hæc potius & præsupponuntur, quàm probantur, cum illustrationi rerum maximè convenient comparationes, etiam non in omnibus coincidant. Mars itaque bellis igneisque furoribus præfectus jam considerandus est, quatenus ad triplicem dictum usum adhibeatur, nempe ad aurum, tincturam & medicinam.

I. De Usu ad aurum.

Ad argentum vel aurum ex Marte conficiendum, credo, quod paucissimi respexerunt, tum quia durus, intractabilis, fusionis expers, niger & pauci argenti vivi, tum quia Philosophi ejus rarissimam mentionem faciunt, & quasi quemlibet ab ejus tractatione dehortari videantur. Nam, quia durus, resistit operationi artificis, quia non funditur, nec metallis congregatur, quia niger (unde & clavi infixi ligno, id inficiunt, & coloribus nigris tinctorum adduntur) sulfuris terrestris copiosissimi in eo indicium est: pauci argenti vivi, hinc ferrum levius & porosius perfectis, cæterisque imperfectius, licet fixius. At hæc proprietates, quæ in ferro desiderantur, auro maximè adesse debent. Qui itaque durtiem, fusionis defectum, nigredinem & sulfuris terrestris abundantiam, argenti-que vivi inopiam à ferro artificiosè tollere poterit, idque æquatis qualitatibus in citrinitatem tingere, is faciet ex eo aurum: At hoc difficilimum non solum alicui continget, sed etiam ferè impossibile.

le. Quod cum quidam animadverterint, experientia frustrata vel ratione ducti, ^{1. Martis imbibitio cum auro.} ferrum imbibierunt cum auro, eique miscuerunt, unde non facile separari potuit, ut Geber testis est, at pondus saltem, non calorem, auro auxerunt: ideoque fuit potius impostura, quam augmentatio aut transmutatio quaedam. Alii ex ferro Mercurium cum mineralibus certis extraxerunt, eumque in aurum, ^{2. Martis Mercurius in aurum coagulatus.} ut ipsi testantur, coagularunt adjecto auro naturali; fermenti loco: sed quantus error inde consecutus sit, noverunt illi, qui eorum libros legerint. Aurum verum & legitimum in omnibus probis à vera arte expectatur, sophisticum, & quod non in omnibus examinibus perduret deceptoribus tractandum relinquitur. Non enim chymicorum libri scripti sunt in perniciem populi aut reipub.: at malè intellecti & opere falso expressi, eum ferè finem in multis fortiuntur per accidens. Vt ille qui hominis alicujus imaginem per plasticen ex cæra suis coloribus ita expressit, ut ipse homo, cujus est imago, videatur, non tamen vitam, hoc est, sensum & motum, adjecit, non sua arte perfecisse

verum hominem dici poteſt , ita nec alchymiſtæ illi deceptores , vel alii horum ſequaces , non putantur aurum verum feciſſe ex materia , in quam non veræ auri proprietates , quaſi vita & forma , introductæ ſunt , quales antea enumeratæ & præcipuè ex propriis auri exami- nibus dijudicantur : Cum itaque hæ proprietates non fuerint in eo auro ſic coagulato ex Mercurio Martis , inde nec omnia examina ſuſtinere potuit , & è contra , nec verum aurum , licet ad ſpeciem , repertum eſt.

II. Ad Tincturam.

Ad tincturam fortè nonnulli ex Marte extrahendam intenti fuerunt , quorum conatus an ab eventu comprobati ſint , meritò quis dubitet , qui tincturæ veræ ſubtilitatem , Martis craſſitiem , illius puritatem , hujus impuritatem , & ſic reliqua cujuſque adjuncta , conſideret. Aurum in palatiis regum & principum reſidet , ut Nobilitatis paludamentum , & obtinet nobiliſſima officia , ferrum in angulis deliteſcit & peragit viliffima Slavorum opera per mundum. In cau-

sa est, quod illud rarum, hoc in copia,
 illud pulchrum hoc deforme, illud te-
 nerum, quasi incorruptibile & æterni-
 tatis specimen, hoc asperum & ignibus
 facile superandum, penitusque destru-
 endum: Quæ omnia in auro iunt propter
 tincturam aut formam ejus præsentem,
 in ferro autem, ob eandem absentem.
 Vnde longissima distantia inter hoc &
 illud videtur, tanquam inter extrema:
 Nihilominus qui omnia etiam inspera-
 ta tentare voluerunt; Martem calcina-
 runt ad Tincturam, sed pulverem ni-
 grum, deformem primò, postea ru-
 brum, levissimum, quem CROCUM
 vocant; invenerunt, ad chymix hanc
 intentionem inutilem. Quomodo enim
 mortuum omnino in vitam revocari,
 aut mortuos alios resuscitare queat,
 cum egeat ipsum vi alterius? Quo-
 modo impurum purificet aliud? Quo-
 modo leve & omni humiditate exutum
 possit recuperare qualitatem humidam
 & argenti vivi copiam, qua alia metal-
 la repleat & vestiatur? Quidam in aquis
 acribus solverunt & sic in crocum re-
 degerunt, eadem finis frustratione. Hæ
 enim aquæ malitiam Martis non tollunt,

1. *Calci-
natione.*

2. *Solu-
tione.*

ſed potiùs augment & ſic ignem , quod
ajunt , igni addunt ; quod in aqua forti
communi experimentari licet , in quam
vitro contentam ſi limaturam ferri inji-
cias : mox quaſi in momento ita effer-
veſcere actu percipies , ut manu tenere
nequeas. Cauſa eſt , quia ignea vis a-
quæ fortis exaſperat ſulfur terreſtre , co-
pioſum in ferro exiſtens. Vnde aquæ po-
tentialis caliditas in actualem reducitur
& ferrum conſumitur. Eadem videtur
cauſa , quod ferrum ignitum , aquis ex-
tinctum , non ſubito ſit adeo frigidum ,
ut manu tutò tractari poſſit , aurum au-
tem contra , quia ſulfur in ferro terre-
ſtre retinet caliditatem , etiam poſt ex-
tinctionem , aurum autem ejus ſulfuris
non particeps , ſtatim refrigeſcit. Sunt,
qui cū aceto diſtillato ex limatura Mar-
tis colorem rubeum eliciant , ad oculum
ſplendentem , veluti cæruleum cum eo-
dam & calce viva ex ære , ſed hi colores
potius oculis arrident , quam quid ſpei
polliceantur ad rem quaſitam , ideóque
ſuis authoribus , pro illecebris ſpectan-
tium reliquantur. Verùm noſtrum non
eſt omnium ſubtiles circa Martem , ut
& alia metalla inventiones ac opera-

3. Extra-
dione co-
loris.

tionem hic exprimere, cum ferè sint innumeræ, nec uni cognitæ, at saltem ex similibus de similibus admonitiones dare, quibus observatis, bonæ voluntatis artifex à phantasticis operationibus abstinere, atque ita necessario ad legitimas subiecti Philosophici præparationes, Viator hoc nostro quasi manu adduci poterit. Concludimus igitur circa omnes cum Marte factas experimentationes, quod sint difficillimæ & perplexæ, nec quicquam boni promittentes, nisi forte filius Iovis & nepos Saturni agnoscatur, qui forori suæ Veneri iunctus ipsam per matrimonium filio regio beabit, & Martem una cum Saturno, Iove, Mercurio, Venere & Luna in amplissimum Solis regnum evehet, quod cōtingere non posse cum ferro communi, facile tibi persuadebis. Ferri enim nullus usus est, nisi in bellis, oppugnationibus & cædibus, vix in medicinis & hominum morbis profligandis nisi rarissimè, de quo mox dicturi sumus, si saltem figuram Hieroglyphicam tibi ob oculos posuerimus, ut sequitur,

MVTII SCÆVOLÆ FACINVS;
quo Servus pro rege occisus.



Nihil frequentius in historiis & picturis
occurrit, quàm illi fortissimi Herois

Romani Mutii Scavole facinus memorabile, quocirca id huic negotio lubentius applicuisse volui. Hic ad Porſenam regem (ut Tarquinium, regno & urbe exulem, reſtitueret) Romam obſidentem profectus, in caſtra tentoriumque ejus venit, ubi purpuratum quendam, arbitratus regem, ſua manu occidit. Verum comprehenſus: & ad regem adductus, dextram, qua cadem perpetrarat, & in perſona aberrarat, ignibus admotam combuſit abſque ulla ſua miſerationis aut doloris ſigno. Quam magnitudine animi inuſitatâ percuſſus rex liberum dimiſit, ſequè potius amicum Romanorum, quam hoſtem poſtea declaravit: Hinc Martialis:

Vrere quam potuit contempto Mutius igne,

Hanc ſpectare manum Porſena non potuit.

Sic ſæpè numero ſervi pro dominis occumbunt, ut verè dictum ſit:

Quicquid delirant reges, plectuntur Achiui:

Verum hic error, ut nec perpetrantem à regicido excuſat, ita nec occiſum pro domino magnificè extollit, cum caſus & conſilium longè inter ſe differant: ſimili modo ſi quis caput hoſtis vulnerare deſtinârit, & pedem ſtrinxerit,

nihilominus corpus adversarii damno attecisse creditur. Ex læso enim pede, licet leviter, in quibusdam locis, mors indiuiduo supervenit. At non existimandum, quod non hic, ut ubique valeat casus, velut Ovidius de eo scripsit:

*Casus ubique valet, semper tibi pēdeat hamus,
Quo minimè credis gurgite, piscus erit.*

Nam Rex noster satis dignoscitur pro fero, ab eoque non solum purpurâ, sed coronâ aureâ, & corporis decore ornatissimo fecernitur, qui non aberrante mente aut dextra à Scævola quodam, sed ambidextro artifice occidi debet, non vi nec ferro, sed refrigerio aquæ dulcis, quemadmodum laudatissimus ille Romanorum Germaniæque Rex Fridericus, ejus nominis primus, Barbarossa dictus, Christianis in terra sancta summum columen, Saladino Saracenisque hostibus invictus, aquâ fluviali (quam lavandi gratiâ intraverat) submersus periit, cujus intestina & quicquid fæculentum, ut ibi ablutum, reliquum autem cadaver mumiâ regio corpore digna conditum & tumulatum fuit, sic hoc loco, quod intelligenti satis.

De III. Vsu ad medicinam.

Hominum saluti non minùs adhibetur Mars, quam pernicipi, imò non solum fervilibus & abjectis operibus, sed & medicinis saluberrimis intra corpus sumendis. Quod enim de Pelia, Achilles hastâ, fingitur, illam vulnera, quæ inflixerat, curâsse, vel ad eorum curationem auxilium attulisse, idem de bellicrepto, hominûmque jugulatore, Marte intelligendum, qui suo acumine & duritie penetrat cutim & viscera animalium, facitque continui separationem, ac ipsius animæ à corpore migrationem, si urgeatur manu hominis, idem in medicinam reductus suæ substantiæ vi penetrativâ ingerit sese in viscera & venas eorundem, & obstructions aperit & resolvit, sicque individuum ab interitu, ex Dei nutu, vindicat. Imò, velut ipse Apollo nunc bestiarum domitor seu jaculator est, nunc medicus & Alexicacus, sic & Mars, ne quid de Pallade addam, quæ & Bellona & sapientiæ Dea credita est. Vnde quantum Mars vi bellica humano generi mali, tantum vi me-

*Medicine
ex marte
aperien-
tis.*

dicâ eidem boni præstat, ut vitium vir-
tute palliet. Quod apparet in primis ex
duabus de Marte præparationibus, qua-
rum una aperit, altera astringit, ut te-
stantur medici. Medicina ex Marte ape-
riens notior est, quàm ut hic describi
debeat, estque diversarum formarum,
nempe velelectuarium, quale est de cha-
lybe diversæ descriptionis, syrupus, de-
coctio, aut alterius formæ humidæ vel
siccæ, quarum omnium basis est chalybs
vel ferrum in limatura præparatum. Hæ
compositiones ferè omnes aperiunt, ab-
stergunt & reserant obstructions visce-
rum & angustarum venularum meseraï-
carum aut aliarum, pro diverso usu, aut
adjectorum qualitate. Hujus classis quo-
que esse dicitur crocus chalybis factus
vel cum oleo aut spiritu vitrioli, imbu-
tâ ejus limaturâ & calcinatâ, vel cum
sulfure. Non opus erit hic recensere hæc
remedia, quibus affectibus sint conve-
nientia, cum sint vulgo nota, alibi que
exponenda. Medicamentum verò ex
chalybe aut ferro adstringens petitur,
si hoc ignitum extinguatur in aliquo
liquore, qui intra corpus & extra usur-
patur. Aut si corpus ferri calcinetur

*Adstrin-
gentes.*

solo igne in crocum rubeum, impalpabilem pulverem. Hic enim potius adstrictoriae virtutis censetur, quàm aperientis, & convenire in omni fluxu sanguinis, alvi, epatis, uteri & ejusmodi aliis. Quaecunque alia ex hoc metallo conficiuntur medicamenta ad eosdem scopos absque dubio referenda sunt, neglectis interim præparationibus ejus, cum aquis fortibus aut corrosivis factis, quæ Martis naturam per se innocuam nocivam facere possent.

C A P. VI.

De Monte Lunæ.

PER imperfecta hucusque progressum fecimus ad perfecta, non quod natura prorsus eadem semitâ incedat, cùm hæc insensibiliter operetur, & diversimodè nunc per imperfecta transeundo, nunc immediatè, sed quia tam artis, quàm doctrinæ ratio hoc requirat. Si enim alterutri sive perfecto sive imperfecto posterior ordine locus dandus sit in omni tractatione, videtur perfectum

imperfecto succedere , & non è contra ,
propterea quod tam secundum naturam ,
quàm artem omnis ferè res à parvis ini-
tiis originem ducat & crescat in magni-
tudinem justam, sive acumen, quâ habitâ
decreſcunt vel ſenſim vel ſubitò : ſic Ro-
ma & ferè omnis civitas orta eſt & ſuc-
cubuit, ſic imperia & regna, ſic arbores,
animalia & ipſe homo , ſucceſſivas vices
experiuntur crescendo & decreſcendo,
ne plura aut longiora petamus exem-
pla : ſunt inſuper ex illis, qui metalla
ſcrutati ſunt , experientiſſimi viri , ve-
luti Matheſius in Sarepta & Solea in ſuiſ
Septuriis, qui teſtantur , metalla imper-
fecta ad perfectionem ſummam per na-
turam aſcendere , quâ habitâ iterùm
deſcendere. Vnde metallarii , ſi mine-
ram offendant combuſtam in materiam
nigram , ex ſignis haud dubiis colligunt,
à perfectione occupata calore ſubterra-
neo eam conſumptam expiraſſe , & di-
cunt ſe juſto tardiùs adveniriſſe : Alias
naturam calcinando corpus Saturni in
Lunam ac Lunæ in Solem ; aut Vene-
ris in Lunam & poſt in Solem progredi
per aſcenſum, ac dare corpus, hoc eſt,
fixitatem ante colorem ; in deſcenſu

verò è contra: De quibus an ita se omnino habeant, cujuslibet naturæ arcanorum indagatoris est inquirere, Hoc pro certo cognitum est, quod aurum & argentum in mineris suis existens adhuc tenellum, instar Embryonis in utero matris, facilè ignibus externis inconvenientibus in fumum resolvi posse, cum ex vaporibus consistit & congelata sint, præsertim si sulfur arsenicum & tale quid in copia ipsi adnatum sit, quod ad volatilitatem præstandam adjuvet: Volatile enim si copia vincit, fixum quoque elevat, ut ab experientia artis patet, auro & argento amalgamatis & quasi incorporatis cum diversis Mercuriis triplæ vel quadruplæ quantitatis quod nimirum ascendat & excrescat in formam arbusculi aut alterius rei, si urgeatur igne. Vnde miror, quosdam ex perfectis, præsertim auro, conatos vitrum facere, hoc miscuisse cum antimonio vulgari ac exposuisse igni liquefactionis, deinde liquefactum in pelvim æneam, frigidam, inclinatam effudisse, vnde vitrum, quoddam resiliit, idque toties repetiisse, donec omne contentum, & per consequens aurum in tale vitrum

rediſſet, quo habito gloriati ſunt, ſe vitrum auri habere: Verùm meo judicio falſi ſunt, quia ſaltem habuerunt vitrum antimonii, auro in fumum elevato per antimonii copiam, ut contingit in ejuſmodi operationibus, & ab experientia probatum eſt. Hoc addidi, ut monſtretur per artem aurum volatile effici poſſe diverſis modis & ut alii ſibi caveant ab ejuſmodi imaginationibus: ſi itaque aurum in mineris ſuis quoque ſit volatile, admixtis ſpiritibus ſimilibus, tunc accedente calore ſolito fortiori, & ibi elevari poterit & in fumum evaneſcere: Quod de auro dictum, multò magis de argento intelligendum eſt, quia hoc eſt auro longè imperfectius, unde continuis ignibus tandem omnino comburatur, aurum nequaquam, cum conſtet cuſioſorum experientia, utrumque furno ardentiffimo vitrariorum impoſitum duobus menſibus, argentum in duodecima ſui parte deſeciſſe, aurum in nulla ſenſibiliter: Ita & contingit in exactis probationibus per cupellam, quod argentum ſi vel dimidia hora longiùs, quàm debeat, aduratur, damnum aut ſui diminutionem patiat, vel quia

à Saturno attrahatur deorsum , vel ab igne vaporabiliter absumatur : si hoc apud artem contingit , quidni apud naturam ? Cum constet artifices subtiliores ex iisdem mineris plus argenti elicere , quam vulgares , & per cupellæ ignes moderatos adjectis convenientibus mediis & fluxibus , longè plus argenti fini promitti , quàm ignibus fortioribus & vulgari artificio ex iisdem mineris exprimat. De incremento autem argenti dictus Matthesius rationes adfert verissimas , quod non solum adhuc crescat : non veluti planta , sed suo peculiari modo (nec omne argentum aut alia metalla , ut quidam existimant , ab origine mundi actu extiterit) sed etiam ex ipsis imperfectis , ut antehac tradidimus ; Nos unicum hujus rei documentum , quod nec ipsi circa has res inquirendas occupati , experti sumus , dabimus : Inter alia cum adessemus in Zellerfeld , in ducatu Brunsvicensi ad Herciniam sylvam sito , cognovimus ex certissima relatione docinastæ seu Examinatoris metallici (*Hutten-Reuter* vocant) fide dignissimi viri , ocularique inspectione , quod in uno eodémque monte , fortè per

*Observa-
tio mine-
rarum.*

duo milliaria Italica circumquaque patiente, mineræ plumbi seu argenti (sunt enim hæ plærumque mixtæ & pro cuiusque abundantia denominationem accipiunt) diversæ inveniantur , pro situ montis ad quatuor angulos mundi respectu habito : Nam quæ versus septentrionem spectabant, in centenarioplumbi sesquiunciam ferè argenti ostendebant , quæ circa ortum & occasum Solis, uncias tres aut circiter, quæ ad meridiem, uncias sex ; ea ratione, ut quo locus magis calori solis esset expositus, eò mineræ fertiliores fuerint, quod cum se quoque in aliis mineris plærumque offerat, hinc constat, non solum perfecta ex imperfectis oriri, sed etiam calore solis quàm plurimum iuvare. Quod de argento ex Saturno generato hic dictum, idem de auro ex Luna intelligendum, quod innumeris indiciis demonstrari posset, ex quibus vnum aut alterum evidentissimū brevissimè adferam. Erkerus antè citatus demonstrat, nullum argentum omnino inveniri, quod non naturaliter auri granum vel majus vel minus absconditum habeat. Et è contra, nullum aurum adeò purgari vel
separari

separari ab argento posse, quin secundum rationem, aliquantulum ejus retineat, quomocunque aquæ separatoriæ componantur; quia argentum est mater auri, & hoc ejus foetus. Vnde foetus à matre non adeò exactè disjungi se finit, quin semper connexionis vinculum maneat: Vnde aurum illud pro fino habendum, quod post exactissimam incupella vel cineritio probationem & discretionem, per aquas separatorias exquisitas ab argento separatum, deinde per antimonii cum eo fusionem reflectionem & cementationem affinatum sit, licet semper tantillum argenti illi adhæreat, non cuique ad sensum sensibile, attamen post exactiorem examinationem artificii subtiliori animadvertendum. Adhæc cum iisdem fere locis ante dictis ad mineras montis S. Andreae *Notabile.* perlustrandas morarer, cognovi à fide digno viro, quod tum ante paucos annos nummi argentei, quos Taleros vocant, spatii unius anni, excusi, nescio, qua ratione plus auri in se continuerint, quam pretium esset argenti, quod quidam olfacientes Andræanos illos cum cruce insignes ejus anni in suum lucrum

converterint, idque non exiguum: Quod contigisse arbitror, quod mineræ illæ, quæ argentum visibile ad oculum (vocant *gedigen*) habuerint, cum hæ plus auri ob perfectionem majorem abscondant, confusæ sint cum aliis, nullo respectu habito separationis aut quartationis. Ex quibus de Lunæ ipsiusque Solis incremento aut decremento rationabiliter quis judicare poterit & ad usum chymicum applicare, ut non opus sit hæc copiosus, prout fieri posset, demonstrare: Nunc de tribus usibus Lunæ ad aurum, tincturam & medicinam paucis loquemur.

*De I. Usu, seu coagulatione Lunæ
in aurum.*

Absque dubio fuerunt, qui videntes hanc naturam in auro & argento propinquitatem, imò amorem & consanguinitatem eam, quæ est & esse debet inter filium & matrem, putaverunt se posse obstetricis officio fungi, aut inspectoris & tutoris, atque hanc sobolem inceptam ad perfectam formam auri promoveri caloribus artificialibus mi-

nistris seu ignis seu aquæ factitiæ acrioris , seu pulveribus aliis quibuscunque admixtis. Qui ignem adhibuerunt , aut i. Circa mineras argenti. mineras ipsas aut solidum corpus argenti attenuandum assumpserunt. Mineræ verò argenti sunt variæ , & non unius pretii aut perfectionis , nec formæ visibilis aut denominationis. Inter quas illud argentum , quod rude seu *gedigen* , capillatum filatúmque vocant , optimum est. Deinde est minera sanguinea , *rothguldig* , hinc in plûbi colore *Glassertz* , dicta , ne quid de aliis generibus adjiciamus , imperfectioribus , quo ad proportionem argenti , & impurioribus , quo ad materias admixtas. Ex his igitur , si quis experimenta capiat , in idem recidet , de quo dictum sub Saturno & aliis , quod nimirum aut longissimum naturæ tempus ipsi expectandum sit , æ vasa & calor subterraneus æquandus , si in his naturam imitari velit , quæ omnia homini sunt impossibilia factu : si verò naturam in aliquo eorum excedat , neque tum sequetur naturæ effectus. Unde calore exiguo nulla emendatio fiet , nisi longissimo fortè aliquot seculo-

ram tempore , calore forti , argentum
fluet ex minera sua in corpus solidum, &
relinquet suum sulfur adnatum , & quæ-
cunque alia , nec jam ampliùs erit fœ-
tus , sed fructus absolutus in suo gradu.

2. Circa
corpus
argenti
solidum.

Quod si nunc relictis mineris quis huic
corpori argenti solido vel foliato , li-
mato , vel alias in pulverem reducto
operam suam impendat , ille eodem mo-
do eam laturus est. Igne enim levi nihil
efficiet , forti fluxionis perdurante , ar-
gentum consumet in vitrum rubeum, ut
ab aliorum experientia patet. Ergo di-

3. Per so-
lutionem
tam tenuis
acribus.

mittendum argentum per se. Hinc alii
aquas factitias , acriores ex salibus fa-
ctas , gradativas, fixativas, & hujusmodi
invenerunt , & argento solvendo , gra-
duando vel fixando , ut loquuntur, adhi-
buerunt. Aquæ autem hæ ex innumeris
materialibus factæ sunt , ut vitriolo , sa-
lepetræ , sale cõmuni , armoniaco, gem-
mæ , aluminibus , cinabari, viridi aris,
Mercurio sublimato & aliis similibus.
His solvunt argentum & macerant di-
versis modis , quos non curamus , sed ad-
demus saltem , quid de eventu harum
operationum ex rei natura sperandum
sit , quid non. Argentum habet æqua-

tionem in suis qualitatibus, sed non tam alterum graduum, quam aurum: Vnde illud magis corruptioni obnoxium, quam hoc. Novimus circa has quaestiones communiter statui, quod elementa quatuor sint in mistis omnibus in summis gradibus, sed excellentiam agentium elementorum retundi à patientibus. Quod si ita est, nihil tamen hoc detrahit huic sententiæ, quod possit esse æquatio in multis gradibus, præsertim in metallis perfectis, in quibus est duplex mixtio, una spectans ad formam, altera ad materiam, quæ duplex mixtio non est in aliis elementatis eodem modo: sunt ex vegetabilibus quædam ad qualitatum temperiem accedentia, ut fortè censerì possit manna, saccharum & his similia: Verum hæc temperies non est vera qualitatum æquatio, adhæc simplex, in qua sint elementa in summis gradibus, in qualitatibus retusa. In Luna & Sole aliter se res habet, quia forma seu tinctura cujusque habet hanc temperiem, & materia similiter, licet in alio gradu. Vnde Bernhardus Comes & alii in auro rectè duplex calidum, frigidum, humidum & siccum ponunt, ut & in ar-

gento. Nam Mercurius auri, veluti materia, habet mixtionem suo modo temperatam, excedentibus frigidis & humidis qualitatibus: sic tinctura auri seu forma, habet suo modo temperatam mixtionem, superâtibus calidis & siccis qualitatibus. Vndæ sunt æquationes in auro, non exactæ tamen, separatim intellectæ: si verò conjungantur materia & forma, fit una exactissima qualitatum omnium æquatio in summis gradibus. Quia frigidum & humidum in uno, & calidum & siccum in altero excellens fuit seu summorum graduum: sic & de Luna dicendum, cujus tamen forma non adeò calida & sicca, ut Solis, inde nec tantum materiæ amplexa: His stantibus & consideratis, si per aquas gradativas ex argento debeat aurum fieri, necessum est, hanc æquationem qualitatum argenti æqualiter promoveri ad superiores & intensiores gradus auri, quod nullo modo fieri posse, est rationi consentaneum. Vt enim nulla domus regia, ex lapidibus & lignis extructa, satis ampla (non loquimur de tuguriolo aut ligneis tabulatis) unà cum suis partibus, quæ sunt fundamenta, tectum & parietes

tes, vi humanâ (nisi fortè angelicâ) de loco inferiori in montem excelsum trāsportari potest, manens in sua integritate, quin collabascāt & corruat, ita nec argenti quatuor qualitates inter se temperatæ & æquatæ, unâ cum substantiis illæsa, ad auri temperamentum & æquationem provehi possunt ullâ vi aquarum aut aliarum rerum, quin destruantur aut corrumpantur ad qualitatem agentem, quæ est calida & sicca. De Archimedis Automatis non est dubium, quin illis navem solâ manu movere de loco in locum potuerit, quò multorum millium exercitus eandem absque illis attrahere nequiverit. Verùm quod promisit idem, se terrenum globum suis instrumentis promoturum, si modo aliud firmum esset fundamentum, quo pedem poneret, illius ingenii magnitudini concedimus, non viribus, nec arti. Ita nullo modo largimur artificibus chymicis, eos per instrumentales seu graduativas aquas argentum posse perficere in aurum, licet præsumant eo instituto, quia videant ejusmodi aquis nonnunquam ex argento aurum educi, quod ibi latebat, non vi aquæ trāsmuta-

toriam, sed potius separatoriam. Vnde falluntur illi, qui dicunt, se in argentum certas uncias auri inducere posse, cum, si experientia non reclamet, potius ex argento id educant. Nam si educere possent ex argento aurum, esset aurum ibi vel actu vel potentia: si actu, tum est separatio propriè dicta: si potentia, vel propinqua vel remota: Non propinqua, quia ita est in propriis mineris: Ergo remota: At remota potentia non potest ad actum pervenire, nisi per propinquas transeat: Ergo in mineras auri argentum transire debeat: sed neque tum potentia propinqua in actum deducitur, nisi per naturam ipsam, ut demonstratum. Nam quod ars separat ex mineris, est saltem obstetricatio, quæ nihil addit foetui perfectionis, sed à natura perfectum juvat ad exitum, & purgat ab excrementis extrinsecus adherentibus. Idem de salibus & pulveribus aliis, quibus argentum in aurum transformari præsumitur, iudicium esto. Hæc enim potius ad suam naturam, hoc est, terrestrem & siccam, reducere poterunt argentum, quàm ad aurum æquatum, cum omne agens agat, ut sibi assi-

4. Cū salibus & pulveribus aliis.

milet patiens, exceptis iis, ubi fit substantiarum commixtio, ita ut ex pluribus una fiat, ut in mulo, spiritu vini & aqua mixtis, & auro apparet, ubi mulus ex diversa speciei seminibus, ut aurum ex materia & forma, utraque Mercuriali, hac calida, illa frigida: At talis commixtio non fit in aqua gradativa & argento. Vnde illa agit in hoc, ut ignis, donec absumat humiditatem argento propriam, & inducat suam siccitatem & terrestreitatem. Quidam addunt hisce mixturis salium aut aquarum ipsum aurum cum argento incorporatum, sperantes perfectum minus à perfecto majori adjutum iri. At eadem causa contrarium eventum produxit, quæ antea. Cum enim aurum non dare possit, ut sæpe demonstratum, alteri, nec argentum ex sese auri formam habeat, hinc nec ab aliis eam non habentibus accipere potest. Scimus, quosdam esse, qui non ad essentiam cujusque rei internam, sed saltem externam formam respiciunt, & interim promittunt argenti in aurum promotionem seu nobilitationem modo per artem facili & possibili. Nam argentum, inquiunt, est fixum quodam-

5. Cum
mixtione
metalli
unius &
alterius
perfecti.

6. Per
quam-
cunque
extrinse-
cam assi-
milatio-
nem ce-
mentatione.

modo, licet non fixatione auri, ei que nihil deest ad fixationem, quam ut magis igne coquatur, & compactius reddatur, quod sale communi aut huic simili cemento, strato super stratum posito fieri posse non dubitant, cum sal commune humiditates superfluas argenti consumat, poros constringat, & substantiam magis coire faciat. Vnde post auri pondus acquirat, nec in aqua forti solvi se patiatur, utpote aurum album: cui si tinctura flava auri addatur, dicunt id in aurum optimum converti. Respondeo, concessis illis omnibus, de quibus tamen adhuc sub iudice lis est, & tincturâ flavâ seu rubrâ argento communicata, dicendum, quod non sit aurum verum & naturale, quod ex sua formâ essentiam habeat; cum illud potius à materia eam habere præsumatur; nempe materia præparata eo modo, ut formæ quædam vires exprimat, non omnes. At obijciunt, Hoc, quod omnes auri proprietates habet, esse aurum verum; quas cum hujusmodi agnoscat, quidni & pro verò auro agnoscat? Quibus replicamus, quod neque hoc habeat veras auri proprietates omnes, nec habere

possit, cum non à formâ proficiſcantur, ſed pòtius à materia: ſit color flavus, at non durabilis in omnibus examinibus; ſit pondus majus argento, at non verùm auri, quod ſub duplo aut circiter majus in auro, quàm argento: Ne quid de extenſibilitate aliisſque proprietatibus auri dicamus, quæ à forma, & non à materia principaliter depēdent: Quin colorē verū negamus ipſi dari poſſe, niſi ab argento vivo, fixo, tincto, rubeo: quod ſi tale non ſit, ab argento erit ſeparabile, quia in profundum ſubſtantiæ non penetravit, & ignibus ſuperabile & delebile; quia non eſt æquatio facta: ſi ſit, eſt tinctura & forma vera, quæ etiam materiam non præparatam præparat, non compactam compingit, non fixam fixat; in fixam autem ac præparatam miſſa eam perficit ampliùs in reliquis defectibus & ſpoliat à ſuperfluis, ſi quæ adſint: Analogon itaque auri dicendum eſt tale argentum, non aurum, de cujus examine potiùs ipſo facto, quàm diſcurſu judicari liceret. Hinc ad ſecundum argenti uſum accedimus, nempe ad Tincturam.

De II. argenti usu ad tincturam.

Ex argento formam seu sulfur haud pauci educere tentarunt diverso respectu, hoc est, vel ad augmentandum cum suo proprio corpore Mercuriali, vel alio quocunque addito, idque vel ad argentum, vel aurum. Cum enim Philosophi saepenumero inculcent, ut & verum est absque amphibologia, in argento esse sulfur argenti seu tincturam argentificam sive formam agentem, & in auro sulfur auri, dummodo exinde haberi possit supra terram, vel educi subtili artificio, hinc diversas vias aggressi sunt ad hanc intentionem perveniendi, quas (cum innumeræ sint partim, partim arcanæ pro cuiusque inventionem, ideoque nec numero aut exiguo tractatu comprehendendæ, nec ingenio indagandæ) in pauciores ac potiores contractas hic cuiusque judicio considerandas, ut de reliquis inde concludat, proponemus. Primò posset quis existimare, in argento non esse aliquod sulfur, sed saltem Mercurium, qui albus apparet, cum sulfur rubedinem habeat. Vnde ex Mer-

curio vulgi coagulato facilè argentum fieri, nec opus esse introductione alicujus sulfuris in illum: sed causam hujus rei impossibilitatis in primò capite retulimus; quæ & hinc constat, quod argenti vivi coagulatio in argentum quocunque modo sive per imperfecta, vel alias contingat, medio sulfuris calidi & ficci comburentis apud naturam fiat; quod sua actione perpetua in argentum vivum illud coagulatum introducat suam vim calidam & siccam, donec id in argentum primò & post in aurum perficiatur. Vnde apparet, quod sit satis magna caliditas & siccitas in argento, quæ non est in argento vivo coagulato, nec plumbo, nec Iove, nec ipsa Venere, respectu argenti vivi, non autem sulfuris comburentis seu terrestris adjuncti, cujus consideratione Venus valde calida, & Saturnus non ita frigidus, nec Jupiter, imò Luna sint calidiores censendi: Qui nihil aliud, quàm argentum vivum coagulatum id arbitrati sunt, nec habere argentum, formam separatim considerandam, hac ratione seducti, cum eo ipso tanquam Mercurio indivisibili alia imperfecta tingere conati sunt:

i. Coagulatione Mercurii argenti.

quod sanè fieri posset, si non esset aliud quid tinctura argentifica, quàm argentum vivum coagulatum ac æquatum: sed cum illi sua intentione & spe frustrati sint, hinc quoque patet eorum falsum fundamentum, & tincturam argentificam habere in se plus caliditatis & siccitatis, fixitatis, tenuitatis & spiritualitatis, quàm argentum ipsum ab ipsa incorporatum. Vt enim homo non est ipsa anima rationalis, nec corpus solum est homo, sed hic constet ex anima rationali & corpore, sic argentum suo modo ex forma & materia, & per consequens argentum ipsum non est forma argentifica, nec argentum vivum, utpote materia est argentum, multò minus forma ejus. Alij videntes, quod cum tota crassa substantia argenti nihil tingere possent, magis tenuiorem ejus portionem à reliquis faci- bus, quasi similam à furfure separare aggressi sunt viis iisdem & mediis, de quibus sepè diximus, nempe salibus & aquis separativis. At quo effectū? Hoc ipsi viderint; sat scio, quod non Philosophico aut sperato: Quia hæc corrodunt totum & non segregant ejus partes, quas si segregarent, id tamen per violentiam destru-

2. Separatione sulfuris eius.

ctivam, exiccativam & naturæ contrariam facerent, & sic semen ipsum extractum corrumperent, ut nihil inde propagari posset, ne hoc quidem, quod antè fuerat, tantum abest, quod vim propagativam immittat aliis & multiplicationem similium instituat. His difficultatibus obviam euntes quidam ingeniosiores, totum hoc negotium committunt Mercurio vel Mercurialibus, quibus antè dictum propositum perficiant, sperantes Mercurio vulgi Mercurium & sulfur argenti elicere, ut aves captantur avibus sui generis. At quia totum argentum est Mercurius tam formâ, quàm materiâ, quis erit arbiter aut sequestrator? Amalgamationes fieri possunt argenti cum Mercuriis, item & solutiones seu liquefactiones, velut butyrum in radiis Solis liquefcit, sed non separationes substantiarum ejus. Quomodo dignoscetur vis activa à patiente, hæc relinquatur, illa colligatur, cum utraque sit alteri similis, atque ita conjuncta, ut nihil intercedere possit, nec simile, nec dissimile: si enim simile, conjungetur, & fiet unum: si dissimile, non assume-
tur ab utroque, velut judex æqualis.

3. *Separatione
Mercurii
ejus per
Mercurium.*

Verum respondere quis posset, naturam hic potissimum operari per calorem, non medium separativum, nec artificem. Ut enim calor in lacte moto excitatus discernit heterogenea à butyro, nempe caseum & serum, & congregat ejus homogenea, ita & hic fieri præsumitur. Et sunt, qui aquam à vino secernant hederaceis vasis, aut aliis modis; Hoc & argenti sulfur à Mercurio separari posse opinantur. His infero, quod corpora naturalia ex elementis composita per putrefactionem vel calorem facile separantur in diversas substantias, in quibus non sit mixtio fortis, ut in vegetabilibus & animalibus, sed illa, in quibus fortior mixtio existat, difficilimè, ut sunt plæraque mineralia & metalla. Cum itaque in argento & auro sit duplex mixtio & æquatio qualitaturn, eaque fortissima, inde non calore exiguo, ut lac, sed nec igne fortissimo, superantur, & hinc horum & illorum apparet maxima dissimilitudo in modo separationis substantiarum. Verum demus, quod possint aliquam partem maturiorem de argento separare, virtute ejus illasa, quam si iterum projiciant in plumbum vel stannum,

*Ex extractione
sulfuris
nulla utilis.*

num , vel Mercurium , vel æs , tum ex singulis optimum argentum renasci. Quid hoc ad tincturam ? Sanè esset cum damno orbis Christiani conjunctum , castra à Turcis , expensis laboribus & sanguine multorum millium occupata & possessa , iisdem restituere absque lucro aut restauratione aliarum commoditatum. Ita sentiendum , si sulfurex perfectis , multis sumptibus & sudoribus petitur , post absque ullo lucro , iisdem corporibus , unde detractum , vel similibus reddendum sit. Ludus sanè hic esset Sisyphius aut Tantalus , non Philosophicus , magis ad ostentationem , ne dicam , deceptionem multorum , quàm utilitatem spectans. At respondent illi , hoc sulfur detractum cum suo proprio corpore aut alio Mercurio , in infinitum augendum esse , ac reverà se habere instar bona semini , quod successu temporis ex parvulo cumulo in immensum multiplicari possit , vel instar fermenti fermentandi cum sua propria massa. Sanè si hoc fieri posset , & illud sulfur haberi , opera illa esset optimè collocata. At vereor , ne hi bonæ voluntatis & magnæ spei homines

seipſos fallant ; quibus quantum ſufficit , hac parte quoque ſatisfaciam . Nolim contra antiquiſſimorum Philoſophorum intentionem de multiplicatione tincturæ hic quicquam ſtatuerè , quæ veriſſima eſt pro illorum intellectu , ſed huic negotio non convenit . Quomodo autem augebunt ejuſmodi tincturam ex argento extractam , cùm non conſtet , cujuſ originis ſit , imò cujuſ generationis aut propaginis , an ſit ex oviparis aut prolem lactantibus , aut ex putrefactione ſola exortis abſque patre & matre , ad hæc ignorant , quo nutrimento delectetur . Quodlibet autem ſibi ſimili nutritur , quo ad finem : & quibus conſtat , iſdem augetur : ſi itaque augmentare : deberent verè , hoc eſt , humidum radicale & calorem naturalem multiplicare argentificæ tincturæ extractæ , hoc nulla re facient , quam eâ , ex qua illa per naturam fuit compoſita : ſed hanc rem ignorant . Ergo nec augmentabunt . Hæc ſunt adeo firma , ut omni exceptione ſint majora intelligēti . Quod ſi affirmant , ſe ſcire , cur , inquam , hoc non aſſumunt & relinquunt argentum ?

Instantia. At illi inſtabunt hoc modo . Omnis for-

ma ex sinu suæ materiæ educitur, ut patet in omnibus vegetabilibus, animalibus, excepta forma hominis, mineralibus ac metallis: cum in Saturni promotione in Lunam, forma Lunæ educatur ex materia Mercuriali sibi propria. *Res- Responsio*
pódeo, hoc argumētum multa dubia admittet. Doctissimus Fernelius in mysticis illis libris de abditis rerum causis disputat contrarium, & concludit omnibus mistis formas aliunde immitti, præsertim animalibus, atque hinc alias aliis esse nobiliores. Cui sententiæ, cum sit valdè probabilis, & nihilominus intricata, hoc loco supersedebó, & dico, quod secundum naturam ita se habere possit, sed in hoc naturam non imitandam esse, quia artifice impossibile. Inde duplex modus statuitur generationis auri, unus per dicta imperfecta, alius per proprium suum argentum vivum formale, quod si instar fumi misceatur imperfectis, vel argento vivo cuicunque, brevi tempore id in autum promovet. Hinc ex pyrite durissimâ, lapide lazuli, granatis & similibus, quæ nihil imperfectorum metallorum continuerunt, aurum immediatè prove-

nit & per artem educitur. Hoc ultimo proceſſu utitur ars non priori. In hoc ultimo enim forma auri non ex gremio materiæ corporalis auri educitur, ſed ex potentia materiæ propriæ magis coctæ, ſpiritualis. Fruſtraneus itaque eſt labor, tincturam argenti augere vel le cum materia argenti propria vel aliena, cum hæc ſit incognita operatio ejuſmodi, illa inepta: Novi equidem centenas ferè ab aliis præſcribi vias ad Mercurium aut ſulfur argenti & auri educendum, prout in libris illorum videre eſt, at ſequatur illas, qui velit & intellectu careat, rationali hæc pauca, ſed ſat firma, ſufficient. Verùm loquuntur Philoſophi, in argento & auro eſſe ſulfura perfectæ, ſed in multis locis affirmant, illa per artem educi non poſſe, & addunt rationes, quia illa compacta & dura corpora, in quæ noſter ignis non agit, & ſi ageret, quid inquirunt, boni inde ſperandum? Imò manifeſtè dicunt, illa eſſe corpora mortua, Philoſophica autem viva; & perfectum perfici non poſſe, ſed imperfectum, à quo incipiendum, ubi natura illud reliquit & arti præparavit. Dicunt quidem illa duo cor-

pura , argentum & aurum , subtiliter præparanda esse , ut sulfura inde habeantur , sed ab istis præparationibus addunt , se excusatos , si inuenire possint duos illos lapides , quos Deus nobis gratis concessit , de quibus videatur Isaac in diversis locis , & Arnoldus in suo novo Testamento. Quomodo verò isti duo lapides inveniendi , aut alii eorum vice præparandi , hoc est , quomodo Luna & Sol in primam sui materiam reduci debeant , patebit ex sequenti figura.

TERRARVM ORBIS circumscriptio.



Vt antiquitùs cum de Delphis quæstio
agitaretur, an esset in medio terræ, nec-
ne, Iupiter dimissis utrinque duabus

aquilis, quæ cùm circumcirca totam terram, una ad occidentem, altera ad orientem, pervolarent, & in Delphis convenirent, litem diremit: Ita Magellanus ille, cùm terrenum globum circumnavigabilem, quotquot vixerant homines antè dubitassent, ab occasu ortum versus nave penetravit, atque sic circulum terræ integrum cursu (quod à nemine ante id tempus perpetratum) absolvit: Verùm cùm ille in itinere occubisset, socii ejus domum reversi, unum è septimana diem (quod mirandum est) amiserant, ita ut feriam primam seu diem Solis, pro feria ultima seu Saturni, & diem Lunæ pro Solis acciperent, cùm interim Hispani eandem diem pro sequenti haberent. Nec verò hi aut illi in computatione dierum aberrare poterant, sed utrique veritatem, ut erat, complectebantur. Quæ res pro miraculo diu reputata, cùm ad sapientiores ad discutiendum transmissa esset, responsum est ab illis, Magellanicos sua peregrinatione absolvisse eum cursum circa terræ superficiem, quem Sol peragraræ solet spatio 24. horarum, in suo cœlo manens, atque integrum diem,

cum nocte ita constituere. Hispanos verò domi mansisse, nec interim aliquem cursum circum terram peregrisse: Hinc necessariò Magellanicis unum diem integrum, qui constet 24. horis, deesse, quod licet primò valdè dubium, tamen postea cuique ingenioso consideranti verissimum inventum fuit. Ad hunc ferè modum, ut in hac arte Lunæ & Solis reductio fiat in suam primam materiam, hoc est, ut duo illi lapides gratis dati inveniantur, non opus erit totum terrarum orbem pervolare cum aquilis illis, aut circumnavigare cum Magellanicis, aliàs Lunæ habebimus pro Solis, & Solis pro Saturni diebus, quod non convenit: si verò ita habituri simus, non multum aberrabimus, sed cum sociis illis, uti & Philosophis, nostram mentem ceu verissimam interpretari poterimus, cum eadem sit vera utrobique ratio. Illi, qui domi manent, nobisque libro reliquerunt, in materiam sui primam hæc lumina converti jubent, nos, qui in Oceano operationum chymicarum versamur, diuque versati sumus, respondemus, quod ea conversio sit facta à nobis, dum binos illos lapides,

veluti aquilas orientalem & occidentalem, conjunximus in Delphis sive furnis Philosophicis: Verùm sapientiores hanc litem judicent, ex quibus duo pro tempore sufficient: Avicenna dict. 1. cap. 2. *Aristoteles*, inquit, *de lapidibus*: Duo lapides jacent in stercore, unus foetens & alius bene odorans, parùm appreciati in oculis gentium: si scirent eorum valetudines, tenerent eos honorificè: sed quia nesciunt eorum valetudinem, despiciunt & dimittunt eos super stercorea in locis foetentibus & qui conjunget eos ibi est magisterium: Author consilii conjunctionis massæ Solis & Lunæ hæc verba exponit, ubi dicit: Quod hujus artis duo sunt lapides principales, albus & rubeus mirabilis naturæ: Albus in occasu Solis incipit apparere super facies aquarum, abscondens se usque ad mediam noctem, & postea vergit in profundum: Rubeus verò ex opposito operatur, quia incipit ascendere super aquas in ortu Solis usque ad meridiem, & postea descendit in profundum: Atque sic proposito satisfecimus.

De III. Lunæ Usu.

Plurimi ex Luna medicinas extraxe-

runt , cùm tincturas nequiverint , non omninò contemnendas: dum tamen absque jactatione , ne dicam , mendacio, non obtrudant magnatibus corrosiva & venenosa pro alexipharmacis , capita mortua nescio quarum nugarum pro magnis mysteriis. Quicquid ferè excogitari potest, siue ens, seu non ens, illi experimentatores ex Luna educunt, nempe sulfur, Mercurium, oleum¹, sal, butyrum (utinam & panem cum vino) lac virginis, Lunam potabilem, & quid non, aliud ? Magni viri suis natis dant magna nomina pro libitu, nullo reclamante, sic illi : At ut non sequitur, si quis Hercules, Alexander, aut Iulius Cæsar vocetur, quod sint illi ipsi, quos nomine repræsentent, ita nec judicandum horum magnifica nomina suis inventis (potiùs amissis) indita quicquam commune habere cum rebus, quas referunt. Vbi notandum, Lunæ, hoc est, argento, in quacunque præparatione singulares effectus ascribi, quo ad morbos cerebri, nempe ad Epilepsiam vertiginem, apoplexiam & ejusmodi symptomata : quod si ita est in rei natura, nil contradicendum. Verùm aliquid condonandum imagina-

tionem hominum, qui de argento & auro magnam spem in medicando conceperunt, etiam ibi, ubi nulla est ratio cognita. Argentum vulgariter vocatur Luna, saltem ut sit pallium, quò à vulgo, occultetur, quicquid de eò scribitur; hoc alii interpretantur, quasi omnes Lunæ cœlestis proprietates huic metallo sint inditæ. O cæcitas humana! Luna cœlestis alba est, ita & argentum, ita cerebrum. Ergo hæc tria conveniunt, & morbi cerebri à Luna cœlesti sunt, & curantur Lunâ terrestri seu argento: Ejusmodi ratiocinationes non multum habent veritatis, licet multum ad speciem probabilitatis. Alii ad curandos jam dictos morbos, aut his similes, utuntur limatura vel foliis: quidam oleis; aquis, lacte & butyro Lunæ, aliisque ejusmodi, iisque nihil contradico, dummodo caveant sibi à facibus aquæ fortis, quæ inhærent Lunæ nec inde separantur, nisi in fluxu metallico: Nam Luna à Sole separata per aquas acres affusa aqua communi, descendans in laminam æream, magnam partem ejusdem aquæ spirituum acrium & corrodentium apud se retinet, unde illa aqua

multum de sua virtute amittit & inefficax redditur, nisi de novo fortificetur. Hæ autem fæces sunt summæ acredinis & plus nocuenti, quàm emolumentum, humanis corporibus adferre possent, si non mox, tamen statò tempore; ideòque summo opere cavendæ sunt. Quod si quis inferat, ablutiones toties esse factas, ut nihil acredinis sentiat, hoc parum confirmat: si verò quod sua ex Luna petita remedia sint facta absque ulla acredine, nempe mirabili solutione aut coagulatione in aquis simplicissimis, cujuscunque generis. Huic respondeo, bene quidem hæc omnia & vera esse posse, at quia solutio aut attenuatio corporis Lunæ non fiat aut fieri possit, nisi aqua ea vi prædita, ut in poros corporis Lunæ possit penetrare & se insinuare, illudque veluti dentibus aut Strutionis stomacho conterere & digerere, hinc si sit oleum, sulfur, Mercurius, sal vel tale quid de Luna factum, sine omni dubio, hæc erunt participia istius acredinis & corrosionis. Aliud judicium erit de auro per quartationem à Luna separato, quia hoc non admittit in suam substantiam illos sales, ideo nec solvitur ab aqua forti propriè, sed à sale

armoniaco, oleo salis communis aut vrinæ, quæ non adeò noxia existimo intra corpus humanum, dummodo cum cautione usurpentur, quam antedictæ aquæ fortes.

C A P. VII.

De Monte Solis.

Solis naturam postquam peculiari tractatu, tum quia medicinæ in rebus humanis optimæ subjectum sit nobilissimum, tum quia scopus, ad quem multorum actiones non solum in chymia, sed omni penè vitâ, referantur, & quasi parvus quidam mundus sit, innumera in se complectens arcana, declarandam antehac susceperimus, nunc ejus proprietates, quæ passim hic & alibi occurrunt, silentio transibimus, & saltem de usu ejus triplici, ut hætenus reliquorum, pertractabimus.

De I. Vsu Solis.

Nullus quidem præsumere potuit coa-

gulationem Solis in Solem , sed quia augmentationem , quam aliqui quærunt in Sole , huc referendam duximus , hunc quoque usum præmisimus. Persuasum enim sibi plurimi habent , ut reliqua omnia vegetabilia & animantia propagandi spiritum & virtutem in se fouent & retinent , sic quoque Solem , seu aurum ejus non esse expers aut omnino sterile , eo argumento , quod crescat sub terris ex propriis mineris , & non ab initio mundi huc usque , ut inane pondus , jacuerit , omni facultate vivificâ orbatum. Nihil est , inquiunt , vitali illo spiritu vacuum , qui permeat omnia terræ creata , eaque pullulare , sibi que similia producere facit. Elementa enim terræ & aquæ , quibus metalla abundant , sunt pigra , & ad generandum inhabilia. Aër verò & ignis dant motum & spiritum ad sese multiplicandum idoneum. Cùm itaque aurum omnia quatuor habeat elementa , & ex eorum mirificâ concordantia & æquali temperie tantas dotes ut in igne perduret , & in re medica præstantissimos effectus ad hominum sanitatem conservandam , & morbos depellendos edat , quis negabit , nisi insa-

nus , huic adesse illum spiritum vivificum , & per consequens virtutem sese propagandi ? His & similibus , si ritè intelligantur , per se veris , si secus , non solum falsis , sed quoque multorum errorum causis , hic in tempore obviam ibimus , respondendo , quod doctissimi inter Medicos & Philosophos agnoscant , qui nos mixtorum ex elementis gradus. Primò simpliciter mixtorum & rudi Minerâ compositorum , eaque sunt propriè meteora dicta , non ex omnium elementorum complexione , sed quorundam saltem orta. Secundò perfectè mixtorum , ut sunt lapides , mineralia & metalla , ex quibus alia perfectiùs , quàm alia , & nonnulla perfectissimè sunt composita , nempe argentum & aurum. Tertiò vegetabilium , quæ præter mixtionem , vegetabilem animam obtinent , cujus beneficio nutriuntur , augmentantur in justam & speciei convenientem magnitudinem , & sese propagant. Quarto animantium , qui præter jam dicta , habent sensum , appetitum & motum. Quintò ipsius hominis , qui instar parvi mundi præter vegetabilium & animantium potentias , animam quo-

jam dicta, habent sensum, appetitum & motum. Quintò ipsius hominis, qui instar parvi mundi præter vegetabilium & animantium potentias, animam quoque rationalem, constantem intellectu & voluntate possidet. In his omnibus spiritus quidam est, ea permeans & vegetans, at diverso respectu. In homine hic spiritus est cœlestis originis & immortalis substantia. In cæteris animantibus, alterius conditionis, qui fortè ab astris iisdem suppeditatur. In plantis adhuc ignobilior spiritus habitat, fortè ejusdem ortus. Metalla verò, mineralia & lapides animam propriè dictam non habent, unde sentiant aut vegetent, nutriantur, augeantur & generentur, sed spiritum nihilominus & virtutem infusam ab astris manifestè ostendunt, ut patet in magnete, gemmis, mineralibus & metallis, aliis secundum magis & minus. Est quoque spiritus & potentia in rore, pluvia, grandine, & ejusmodi, sed longè inferiori ab his censu: si quis jam vim vegetativam metallis ascribat, ut plantis, ille fallitur suo judicio, & confundit rerum proprietates. Tres itaque ultimi gradus per semina suam speciem

ciem propagant, homo & bruta in discreto sexu, duorumque conjunctione; plantæ vnâ saltem numero, sed Hermaphroditica virtute. Nullo autem modo sic metalla multiplicantur, cum generativa, augmentativa & nutritiva facultatibus destituantur, quarû vice motu grauis & levis utuntur, hoc est, vapores ex elemētis diuersa proportionemisti excitantur calore, ut ascendât, & frigore congelantur, ut descendant; Vnde fit mixtio eorum omnium, in primis sulfuris & argenti vivi, ex quibus imperfecta, & ex his perfecta oriuntur. Ex vaporibus itaque metalla omnia constant, tam ferrum durissimum & aurû ignibus durabile, quàm Mercurius, aut alia leviter cōgelata corpora, quò ad materiam, & saltem differût modo mixtionis ac coctionis: In auro, de quo nunc loquimur sunt saltem vapores Mercuriales, non sulfuris illius cōmunis; atque ii sunt duplices, alii materiales dicti, quia materiã suppeditant auro & sunt humidi & frigidi in magna copia; alii formales, qui formam seu tincturâ adferût, & sunt calidi & sicci in longè minori quantitate: Hi inter se mixti, ut in qualitatibus sese mutuo non excedât, cōstituunt

aurū naturale. Verum quidem est, quod magna ex parte forma & gremio materiae educatur, hoc est, quod vapores illi formales fiant ex materialibus in operibus naturæ, quæ utitur longissimo tempore & calore temperato, quo vaporem humidum & frigidum convertat in calidum & siccum, at in his ars naturam imitari nequit. Hinc cū animadversum sit eosdem vapores formales ex propria sua minera aliquando exhalare, qui si inveniant nullum argentum vivū, nihil quoque inde exoritur, si verò apprehēderint vaporem argenti vivi humidum & frigidum, hunc congelant in argentum & aurum. Nulla ergo ratio patet, cur aurum jam congelatum intra vel extra terre viscera, dicatur vegetare, augeri aut seipsum propagare, cū semen aliud non habeat, nisi duos illos vapores, ex quibus ipsum ejus individuum compositum est. Sperma illud ipsum, ex quo animal vel planta concrevit, non facit propagationem speciei, sed distributum est per omnes partes ad augmentationem individui, quò ad acumen perducto ipsum generat novū sperma in certis locis & partibus, ad propagationem species inseruiens.

Tale sperma cum non generetur in auro; nec sese propagare potest. Vnde illi, qui quarunt aurum purum, ignibus intactum, ex mineris suis vel fluviis collectum, idque per vim ejus propagativam, aliis mineralibus infundendam multiplicare student, ratione quidam innituntur probabili, at quam experientia & rei ipsius natura refellat: Cui si quis fidem adhibeat, non opus erit sumptibus & periculis haud levibus (ut contigit cuidam, mihi satis noto) tale aurum congerere, instar formicæ Indicæ, & pro ovo Philosophico excubandum in furnis ponere: Quod si itaque hæc vis generativa ad sui simile propagandum idonea non sit in auro illo spiritali, ex quo ignis nihil destruxerit, multo minus est querenda in alio communi per ignes ceteris macerato & exhausto.

De II. Vsu Auri ad Tincturam.

At alii non contenti his demonstrationibus, cum legunt authores de auro loquentes, quod in eo sit sulfur eorum atque inde eliciendum, imò quod ipsum aurum vocetur sulfur, & non è contra, non ulteriori inquisitione facta ad au-

rum commune (sed ut Arnoldus inquit, veluti asini rostrum ad fœnum, nescientes ad quid & cur) manus porrigunt, quibus Poëtæ aureoli versus optimè arri-
dent, ut ait :

*Hordea cui cordi, demum serit hordea, in auro
Semina sunt auri.*

Sed illis iidem authores satisfaciant, cum in-
quunt, Aurum Philosophicum non esse aurum vulgi : nec sulfur eorum esse sulfur commune aut ex communi sub-
jecto peti debere, propter causas, quas annectunt ; quia hoc nimis durum & æquatum sit, aut ut poëta addit, quia (semina illa ex auro petenda) nimium retro submissa recedant : Hi, inquam, animadvertentes aurum in sua substan-
tia grossa & dura quasi ligatum nihil agere aut virtutem suam augmentativam seu propagativam exerere non posse, hoc est, sulfur, tincturam, formam, Mercurium fixum, vel animam suam non relinquere, ad solutionem, macerationem, attenuationem & elixationem ejus se contulerunt, non diffidentes hoc modo tractatum id quæsito fini responsurum : Verùm quando omnium horum recor-
dor, quæ hujus intentionis gratia à mul-

tis phantasticis concepta, tentata & acta vidi, audivi & cognovi, inhorrescere potius cogor & obstupescere, quam de singulis narrationem instituere, aut rationem reddere: Quicquid de cœlo, terra, mari, aëre, & igne perquirere potuerunt, huic proposito accommodarunt: Annon quidam mendacissimus mihi jactavit, sese posse radios Solares in vitro captare & eorum essentiam extrahere; quo invento maximè gloriatur ad auri essentiam extrahendam adhibendo? Sunt qui rorem Majalam distillant pro materia omnium rerum prima ad dissoluendum aurum, qui cœlum & omnia ex aquis creata asserunt ex sacris. Alii terram rubram aridam cespitem grammineo detecto per noctem sub dio relinquunt & mane distillant inde aquam ad auri solutionem accommodam. Alii ex quercu veterrima arida ligna putrida accepta distillant ad eundem effectum. Quidam utuntur aquis Regiis cum armoniaco sale, ex fortibus, factis, item oleo salis, spiritu urinæ, aceto acerrimo, aqua ex melle, ex chelidonio, ex Mercurio sublimato, ex Mercurio cum stanno, oleo sulfuris per as-

censum fumi facto , & innumeris aliis, quæ singula aurum solvunt, corrodunt, & in aqueam tenuitatem reducunt.

Circa auri solutionem.

1. *Opinio.*

2. *Opinio.*

3. *Opinio.*

4. *Opinio.*

Concedamus jam his aut similibus aurum in liquorem solvui posse, aut solutum ab illis fuisse. Quid inde? Alii hanc solutionem sibi sufficere putant, quia aurum spirituale, penetrabile & tingibile activè fecerint. Alii hinc amplius elementa segregare student distillando & redistillando, donec in tincturam promoveant: Quidam sulfur à Mercurio auri discernere tentant, iisdem mediis. Nonnulli addunt huic solutioni metalla, Mercurios aut pulveres, ut incorporentur auro soluto, & uniantur. At cum omnes enumerare sit impossibile, cæteris omissis, his respondebimus, non dubitantes, nos pauca calopodia plurimorum pedibus adapturos. Qui aurum hoc modo solutum spirituale factum adfirmant, quibus fidem adhibebimus adeò, ut concedamus, quod etiam per alembicum totum evexerint, licet id non sit cujusvis operarii chymici, nihil tamen ad tincturæ Philosophicæ essentiam spectans inde conficiet, sit aurum volatile & spiritualizatum, ut ve-

Responsio ad 1. opinionem.

lit, nondum tamen ex materia facta est forma, aut ex patiente agens. Nam quod antè retuli de geminis vaporibus, auri integralibus partibus sive etiam principiis, quorum alii sunt humidi & frigidi, materiam, alii calidi & sicci, formam auro conferentes, hic in primis spectandum, num ex hac solutione dictorum vaporum, humidi & frigidi convertantur in calidos & siccos, remanente sufficiente humiditate, quà ingressus fiat in metalla alia? Quod si fieri possit, hæc tinctura est verissima: sed quomodo hoc fieret? Quo instinctu naturæ hæc aqua solutiva potest vapores illos alterare in contrarias qualitates summorum graduum, & interim relinquere satis ex primis qualitatibus non alteratum. Vnius rei simplicis vel naturalis, vel arte factæ, est saltem una simplex operatio excedens in qualitatibus, ut patet in igne, qui calefacit & exiccat summè, cui-cunque admoveatur, nec quid humidi aut frigidi relinquit, sed totum absorbit; quod si proæresin sive imaginativam vim aut rationem cum voluntate haberet, tum posset unam partem subjecti, in quod agit, intactam relinquere: At

neque tum ad hanc intensionem quid proderet. Hinc aqua solutiva, si quid agit in aurum, totum id corrumpit, & potius in terream substantiam exuccam & inutilem, quam summè calidam & activarum qualitatuum redigit. Nam calor in aqua solutiva existens est accidentalis ipsi aquæ, multò magis auro aut ejus Mercurio, hoc est, non est naturalis calor in illa aqua, sed per vim ignis adductus, adscitius & violentus, qui nec auro essentialiter communicari potest, nisi ad corruptionem ejus, de quo superius. Qui per segregationem elementorum ex auri solutione hujusmodi quicquam boni educere sperant, multis inanibus laboribus se fatigant potius, quam id præstent: Idem enim quod jam dicti quærentes ferè per eadem inveniunt, hoc est, vel aurum integrum seu non solutum, sed corrosum tantum & reducibile, vel in terram redactum, quæ suæ aquæ iterum permisceri nolit, veluti Bernhardus Comes inter suos frustraneos conatus recenset. Per sui destructionem, ajunt Philosophi, nulla res componitur, multo minus aurum. Si quis nepotis generationem appetere,

*Responsio
ad 2. opinionem.*

& ideò vellet filium suum unicum trucidare, atque ex ejus venis, nervis, visceribus aut membris semen aliquod educere idque in matricem nurus imittere ad prolis generationem, certè ille omnium hominum insanissimus haberetur, detestatione potiùs quàm commiseratione dignus. Interim hi perversè in auro quærunt sperma sive sulphur, quod ad auri augmentationem, seu potiùs sulfuris propagationem adhibere intendunt, absque naturæ consulto aut nutu, ignorantes, per destructionem unius individui non posse innumera ejusdem produci, sed illud in terram aut sua elementa redigi, quæ semel dissoluta ab arte, nunquam iterum conjungi poterunt. Fateor Philosophos hujus elementorum separationis & conjunctionis sæpissimè mentionem facere, sed tropicè potiùs, quam ad literam intelligi volunt, cum non rarò omnem elementorum separationem evitari in opere debere tradant, & totum opus ad paucissimas easque simplices operationes contrahant. Videatur Isaac lib. 2. *Responsio* cap. 6. aliisque locis. De sulfure Solis *ad 3. opin.* à Mercurio separando quod difficili-

*Responſio
ad 3. opi.
nion.*

mus & inanis labor ſit , jam ante ſub
expoſitione Lunæ , declaraviſus , unde
quantum huic errori ſufficiat , peten-
dum. Eadem enim eſt ratio extrahendi
huius ſulphuris aut Mercurii , quæ Luna-
ris , niſi quod hæc ſit difficilior , nec uti-
lior illa. Qui pulveres addunt Soli ſolu-
to ſive metallorum , ſive ſalium , idem
ſtramen tritulant , nec quicquam frugis
inde , niſi paleas & pulveres , reporta-
bunt , Cauſa hæc eſt , quia Tinctura auri
hiſce mediis produci nequit , propter
qualitates ſæpius inculcatas , nulli ſubje-
cto , niſi ſuo proprio (quod non eſt ex
jam dictis) propriis operationibus (quæ
non ſunt hiſ ſimiles) communicandas
aut naturaliter & radicaliter introdu-
cendas. Non opus erit hic repetere alio-
rum commixtiones , quas faciunt cum au-
ro , nempe Mercurii , aut imperfectorum
quorumcunque cum de hiſ jam ante ſuo
loco reſponderimus. Nihil enim ad
Tincturam aut ſulphur auri augendum
magis pertinebant quàm aqua ad ſpiri-
tum vini per confuſionem multiplican-
dum , cum quo nihil commune habet ,
ſed quo plus de ea additur , eo magis
vinum adulteratur & dilutius redditur.

Verum his alii contradicentes : Ergo tu, *Obiectio.*
 inquierent, non credis fuisse, qui ex auro *1.*
 Mercurium currentem eduxerint, aut *2.*
 alias tincturas ex auro elicuerint, in
 Mercurium vel metallum imperfectum
 jaciendas ad convertendum illud in au-
 rum, cum utrumque ab experientia to-
 ties probatum etiam nostro hoc ævo
 constet? Quibus concedo, utrumque
 factum ac fieri posse, sed hinc nulla
 utilitas homini, sed damnum & labor,
 ut ante sub Luna demonstravimus. No-
 vimus enim permagnum Principem no-
 stro tempore id à quodam artifice popo-
 sisse & impetrasse, hoc est, auri in
 Mercurium reductionem, verum cum
 speraret in hujus auri Mercurii coagu-
 latione aut coctione Tincturam artém-
 que omnem delitescere, eoque nomine
 diversis chymicis eum Mercurium tra-
 ctandum & perficiendum tradidisset,
 tandem inventum est, nulla arte aut ra-
 tione coagulari posse, nec ad tincturam
 inde proliciendam utilem existere, nec
 cum auro quid commune habere, cui
 in amalgamatione, non ut Mercurius
 vulgi, conjungi voluerit. Causa hu-
 jus rei est, quod Mercurius sit saltem ma-

Responsio
ad 1. Quod
Mer- cu-
rius pos-
sit educi,
sed absq;
utilitate.

teria auri, & tinctura seu sulfur inde separatum sit: Veluti si ex lacte per artificium separaretur butyrum, tum si quis ex substantia reliqua seu lacte butyraceo, seroso, velit iterum butyrum aut lac, quale primò fuit, integrum efficere, stultissimus omnium hominum, aut si possit, ditissimus futurus esset. Hinc ex Mercurio solo auri non potest tinctura auri, nec aurum ipsum produci, quicquid contentur artifices. Nec verò illis fides adhibenda, qui dicunt, quocunque modo tincturam seu rubedinem esse auro detrahendam per oleum salis, spiritum urinæ, aut alias aquas solutivas, ac cum ea projectionem in alia metalla imperfecta fieri posse, ut in aurum reducantur; Corpus verò auri album remanens posse iterum in aurum ignis calcinatione, vel Veneris coloritio addito, vel etiâ in tincturam ipsam promoveri. Nam si sint veri artifices, qui hoc affirmant, tropicè cupiunt intelligi, si non perfecti, loquuntur ad suum captum, prout intelligunt scripta Philosophorum, aut naturæ mineralis secreta. Demus, quod tinctura ex auro possit segregari, quemadmodum plures fecisse constat, & cum ea fecisse proje-

*Responsio
ad l. quod
tinctura
segrege-*

ctiones in metalla imperfecta. Verùm ^{itur &} hos non fuisse veros artifices, sed magnâ ^{auro, sed} ex parte deceptores, ex eventu animad- ^{absque} versum est, cùm artem in hac tincturæ ^{utilitate.} extractione ex auro sitam esse, sibi que eam cognitam adfirmarent, seseque multiplicationem hujus tincturæ facere posse, aliósque docere velle acceptâ magnâ pecuniæ summâ falsò promitterent, cùm nihil ex iis præstare possent. Tinctura enim hæc, ut sæpè dictum, non est multiplicabilis licet sit educabilis per artem ex auro. Vt nec butyrum ex lacte extractum multiplicabile est cum alia substantia, sed solum ex lactis naturali composito educendum. Eodem modo de tinctura auri judicandum, quod illa possit quidem ex auro educi, sed eduçta nullam sui multiplicationem admittat, quicquid ignari tentent aut glorientur. Causa hujus impossibilitatis apparet, quia vis vegetativa aut nutritiva non est in auro ejusve tinctura, ut in vegetabilibus vel animalibus, in quibus nutriens vertitur in similitudinem & identitatem nutriti, atque hinc vegetabilia ac animalia crescunt in debitam magnitudinem: sed hoc non contingit in metallis sub terra

in suis mineris propriis existentibus, multò minùs extra terram integris aut partes separatis. Inde aurum integrum non sibi assimilare potest Mercurium aut aliam substantiam, eamve in aurum transmutare, nec tinctura veluti pars auri ex eo abstracta in se aurum, vel quid aliud promovere potest. Si quis contendat, etiamsi non metalla nutrian-
Objectio
alia. tur, ut vegetabilia ac animalia, tamen veluti per naturam in illis tinctura crescit & augetur, sic quoque per artem.

Responso. Huic quæstioni antè responsum, quod qualitates calidæ & siccæ introducantur in Mercurium frigidum & humidum longissimo tempore, in vasis naturæ, calore subterraneo ut extrinsecus agente, & sulfure calido & sicco; velut igne interno operante & exiccante humiditatem illam Mercurii, & ad æquationem reducente: quæ cum in arte nullo modo haberi possint, ut sint eadem cum naturalibus, hinc nec qualitates illæ eo modo arte in Mercurium ullum introduci poterunt. Quidam ad hæc respondent, etiamsi artificialia vasa, media & operationes non sint eadem cum naturalibus, tamen sequitur idem

Instantia
aliorum
ratione 1.

effectus per artem, velut per naturam, dummodò artificialia disponantur ad modum naturalium, ut divus Thomas, aliique Philosophi attestantur. Deinde ^{Ratione 2.} metalla esse instar ovorum, quæ calore à matre propriâ seu gallinâ naturaliter, vel ab homine artificialiter (ut in Ægypto antiquitus & adhuc fit) in vivos pullos excludi possunt. Ad hæc sola ^{Ratione 3.} coctione apud naturam aurum maturissimum metallorum produci, & imperfectis deficere coctionem, minus coctum verò magis coqui & maturari posse. Imò & id, quod maximè coctum sit aurum quoque superet in colore & maturitate. His quatuor rationibus ita breviter contractis, cum sint causa errorum inextricabilium multorum etiam ingenii subtilioris & voluntatis haud iniquæ in arte operantium, hoc loco satisfaciemus, quantum conveniet. Quando ^{Responsio ad rationem 1.} Philosophi loquuntur, quod in vasis artificialibus idem opus præstari possit, quod à natura præstantur in vasis naturalibus, si illa ad horum modum accommodentur, tum non intelligunt, tanquam homo possit imitari naturam in mineris perficiendis ab infimòque statu, hoc

est, Mercurio aut plumbo, in summum, hoc est, aurum provehendis. Nam si hoc ita esset, tum mineræ per artem in aurum perfici possent coctione in vasis artificialibus, at non nisi tempore naturæ debito, hoc est, mille fortè annis, non decem mensibus. Nec cogitandum est, naturam magistræ rerum tanto tempore opus habere ad auri productionem, ad quod generandum ars non millesimam partem temporis requirat, vasis utrobique concessis paribus. At respondetur; Ars calorem intendere & remittere, item disjuncta conjungere & conjuncta disjungere potest pro arbitrio: natura autem saltem uno modo operatur simplici absque remissione aut intensione caloris, absque compositione aut divisione locali materialium. Verùm dicimus, artem non posse, nec velle imitari naturam in minerarum perfectione aut naturali auri generatione, cum id sit impossibile, etiamsi mineras jam à natura præparatas, velut ovum quoddam ad formam suam certam ordinatum sumat & in aurum promoveri conetur, sed intèdere ad eundem finem per alia media, hoc est, respicere

picere ad ultimā productionem auri per productionem intermediam ejus tincturæ, velut partis principalis. Cū enim natura aurum producat, & in eo ars illam imitari nequeat per media naturalia, tamen imitatur in fine per sua propria inventa, non tamen à natura abhorrentia. Hæc media artis, quam proximè fieri possit, ad naturæ media accedere debent, hoc est, vasa, calor & materia artis ad vasa, calorem & materiam naturæ. Quod si natura faceret tincturas, aut si ars perficere posset mineras, tum ars in omnibus naturam imitari deberet, nec exceptio ulla daretur: At cum neutrum fieri queat, vasa tamen & media artis proximè ad naturam accedant, ut in fine conveniant. Inde dicunt Philosophi, quod idem effectus sequatur ab arte, qui à natura, si vasa artis disponantur ad modum vasorum naturæ. At secundum, quod metalla sint velut ova ex-

*Responsio
ad ratio-
nem 2.*

ternis mediis & artificialibus ad suam formam promovenda, respondemus; id in minima parte veritati convenire, in plurimus circumstātiis reclamare. Nam ova sunt animata & habent formam agentem sibi infusam: Item nutriuntur

vegetatione perfectâ ; fractionem corticis non admittunt , alias humidum nutriens exhalaret , & vis generativa evanesceret : Egent calore leni eodem tempore apud artem , ut naturam , nec ars aliquid facit ad ovi excubationem ; sed calor lenis , qui naturalis est , totum perficit , nec artificis media adjunguntur ipsi substantiæ ovi interiori , sed manent extra ipsum : Vnde nihil addit ovo , sed ut factum est à natura , ita manet & ad illam perfectionem , ad quam deputatum est à natura , per artis ministerium promovetur. Verùm hæc omnia sunt diversissimo discrimine in mineris metallorum. Hæ enim non sunt animatæ , licet sulfur calidum , ut agens , apud se habeant , nec nutriuntur : frangi possunt absque exhalatione virtutis : quibus singulis non consideratis , si tamen quisquam existimet , illas ab arte æquè ut à natura excubari posse , instar ovorum ; necessum est , quod quoque idem tempus excubationi earum tribuat , quod naturæ est proprium , ut in ovis ; in quibus excludendis est idem tempus apud artem , quod apud naturam : quod cum expectari non possit ab arte , ultra

mille annos ; Ergo hac comparatio in nullo convenit , nec in mediis , nec fine. Tertia ratio quoque nihil probat ; quia coctiones naturæ & artis , licet uno nomine vocari possint , tamen reipsa longissimè differunt. Aurum coquitur ex mineris per naturam calore leni & temperato , longissimo tempore. Hanc coctionem ars imitetur calore æquè temperato , sed nihil efficiet , nisi longissimum tempus intercedat. Quod si tempus artis sit abbreviandum & calor intendendus , non est coctio naturalis , ideò nec effectus naturalis sequetur , sed aliud quid , de quo natura non curat. Inde dicimus ; imperfectis quibusdam deficere coctionem , eaque coqui posse à natura , non ab arte. Quicquid ars imperfectum reliquit , aliquando perficere , quicquid natura immaturum , maturare potest , non è contrà. Hinc aliqui narrant , in Sclavoniæ partibus fossiores metallicos occlusisse fodinas , si in metallum non satis maturum incidissent , per aliquot annos , fortè 60. ut maturius intermedio tempore fieret. Verùm humanæ vitæ ea est brevitās , ut si hoc verum esset , quod 60. annis

*Responsio
ad rationem 3.*

maturari posset , non expectare posset maturationem ejus. Quidam quoque referunt de lacu seu fossa circa terræ superficiem non profunda in Westphalico tractu , quod singulis ternis aut quaternis annis ejus loci incolas auro interim generato beet. Talia opera si per naturam fiant , artis tamen beneficio præstari nequeunt. Maturantur quidem mespilo tempore & paleis extra arborem ; Item poma & pyra varii generis viridia , dura , nec satis matura , temporis diuturnitate digeruntur & coquuntur extra arborem , velut quoque in arbore naturaliter , quæ , non dubium est , arte breviori tempore posse digeri , & esui apta reddi , tenendo ea in locis temperatè calidis , ut lectis aut similibus : sed non de specie in speciem , seu de forma in formam promoventur , ut contingere debet in mineris. Vva immatura , acerba , à se non differt essentiâ & formâ essentiali , matura & dulci. At aurum à plumbo differt essentiâ & formâ , licet non materiâ communi & formâ generali , ut homo ab asino differt suâ propriâ forma essentiali , non autem formâ generali animalis , quæ utrique &

homini & asino æquè competit. Ars itaque mineras purgare potest per ignem à superflua humiditate, separando maturum à maturo, veluti pomum immaturum separata humiditate ejus superflua, per lenem calorem maturare, at ex mineris ipsis per maturationem aurum educere nequit, ut nec ex floribus pomi pomum maturum, avulsis utrisque à sua matre seu terra & arbore. Natura itaque sola ex plumbi mineris facit mineras auri, ars utraque purgat, & segregat ab heterogeneis, atque ita natura immaturum coquit, ars maturum ab immaturo discernit. Vnde & quartæ rationis falsitas apparet, quod immaturum non solum maturare possit, sed etiam longè ultra naturalem maturitatem auri evehere in tincturam. Nam si id, quod minus est, inesse non possit, alicui rei, quomodo inerit, quod majus? Quomodo puer, qui gestare nequit viginti libras ponderis, portabit ducentas aut Bis mille? Hinc cum minerae non possint arte perfici in aurum, quomodo in millies perfectius perficientur, nempe tincturam auri. At sunt quàm plurimi ex ita ratiocinantibus, qui

*Responsio
ad rationem 4.*

cum legerint in authorum libris , tincturam esse in Mercurio , Aurum totum nil esse nisi Mercurium , & in Mercurium resolui posse naturam & artem ad perfectionem metallorum causandam coctione uti , opus figuli esse spectandum in arte Philosophica ; ex his & similibus dictis opinantur in auro nihil esse nisi Mercurium simplicem , coctum ac coagulatum ad maturitatem , quemadmodum vasa figulina alia sunt minus , alia magis cocta , & ante coctionem cruda , nec esse aliam in auro compositionem , nullam æquationem qualitatum in quatuor elementis , nullam combinationem sulfuris aut argenti vivi , nullam tincturæ , tanquam maturioris partis & formæ , in Mercurium tanquam immaturiorem partem & materiam introductionem , sed differre aurum solummodo ab imperfectis , veluti carnes ad rubedinem usque assatæ differunt à crudis , in quo diversimodè falluntur : Nam aurum , ut sæpè dictum , habet suam propriam formam , quæ non est in Mercurio , nec plumbo. Caro autem assata non habet aliam formam elementalem , quam eam , quam habet cruda , nisi fortè

paucis accidentibus ab ea differentem. Forma autem dat esse rei, & differentiam specificam ostendit, quæ cuicunque competit, eidem definitio & identitas rei competit. Cum itaque plumbum non sit aurum, nisi tropicè dictum, aut potentia remota, non propinquissima, aut actu primo, minimè actu secundo, inde differt ab auro forma essentiali, longissimâ distantia, quo ad naturam, nempe ut inde fiat forma; respectu artis, ut inde fiat materia, in quam forma aliunde introducatur, propinquissima: Verùm de minerarum in aurum coagulatione sub singulis imperfectis fatis actum; nunc figuram huic capiti convenientem adjiciemus.

HIC EST LEO HOSTES

*Hominis, hic est homo
medicus Leonis.*



Cum antiquitus Roma illa gentium
victrix orbi dominaretur, accidit, quod

quidam in Africa servus ob facinora quædam commissa à domino suo fugeret in sylvas atque invia ferarum latibula, ubi cum sese aliquamdiu, ne ab insequentibus traheretur ad pœnam, abscondisset, Leo quidam insignis magnitudinis in easdem sylvas sese contulit, qui cum fortè fortunà hominem ibi latitantem reperisset, ad eum accessit, nullam præ se ferens rabiem aut iram, sed potius lenitatem, ostentans ipsi unum ex pedibus anterioribus, quem læserat. Homo perterrefactus primò ob belluæ tantæ conspectum, cum videret adeò circurem, admiratus quid causæ esset, cur pedem sibi offerret, quem ubi manu apprehendisset, ac spinam interiùs adauctam offendisset, eam extraxit. Leo à malo, quo urgebatur, se levatum sentiens, prædas, ut antè insequutus est, quas ad dictum hominem magnà copiâ apportavit, ei que potio rem partem illarum obtulit, veluti mercedem & præmium in se factæ medicinæ: servus vel igne vel Sole in Africa vehementissimè æstuante, carnes maceratas & coctas pro levanda fame indies comedit, atque sic longo tempore vixisse perhibetur.

Post cùm Leo prædationi ferarum pro more sese dedisset , in insidias sibi ab hominibus ejus loci prætensas incidit, atque ita captus est : ac quia præ cæteris magnitudine conspicuus , Romam missus : ubi loco publico ad certamina cùm gladiatoribus aut morte damnatis spectante populo ineunda servatus est. Accidit non longo indè tempore , quod antè memoratus servus, jam œconomo suo Leone destitutus , ad hominum conspectum prodiret , ubi cùm agnitus esset , ac tandem Romam adductus , à domino , à quo affugisset , ob perpetrata scelera, belluis, ut mos erat, objectus est. In quem cùm Leo immissus esset, nil furoris in hominem agnitum, à quo se curatum recordabatur , sed potiùs blanditias motâ hinc inde caudâ , ostendit, & ante ejus pedes, ut solitus erat, procubuit. Hujus rei cum populus causas admiratus intellexisset, Leonem homini , ut & vitam cum libertate donavit, acclamans : Homo Leonis Medicus & Leo hominis œconomus vivat, vivat. Hoc etsi non pro facto, sed apologo à quibusdam receptum sit, tamen reverà ita contigisse memoriæ proditur ab Aulo

Gellio lib. 5. noct. Attic. cap. 14. qui servum Androdum seu Antroclum appellatum fuisse asserit, historiámque prolixè narrat, ut quilibet loco dicto legere poterit. Idem de Mentore Syracusano, in Syria Leoni eodem modo medicante, nec non de Helpi Samio in Africa, alii scriptores narrant. Nos, siue id Romæ acciderit, siue non, meminimus in Eutopia, ubi Philosophorum turba congregata fuit, simile quid observatum esse. Servus enim Leoni medicinam, & Leo servo cibum, per vices ministravit, cùmque utriusque capti sint, singulari amore sese mutuo prosequuntur, ita ut Leo ad obsequium servi, & hic Leonis, in perpetuum devinctus sit. Leo hic in Cytherone monte, & Nemea sylva degens ex Luna decidit (veluti in Hieroglyphicis nostris inter Herculeos labores retulimus) de prosapia Solis, viridis viribus, magnanimus robore, celer pedibus, furore horribilis, à solo servo cicur & mansuetus redditur, non violentiâ, sed officio, non vi, sed amore victus. Iunge ergo servum tuum rubeum sorori suæ odoriferæ, & hi duo artem gignent.

De III. Vsu Auri.

Nullum est dubium, quin ex Sole optima Medicina corporibus humanis valdè utilis concinnari possit, tum quia à vulgo propter pretiositatem & carissimam raritatem ita æstimatur, tum quia à medicis & chymicis ab experientia & ratione edoctis idem statuitur. Hinc aliqui ex vulgo, fortè medicorum præscripto, ægris aurum copiosissimum conspiciendum, & tractandum offerri jubent, quia oculis propter colorem & splendorè acceptum, in phantasia speciem haud ingratham excitet, unde cor lætitiâ vel affectu mitiori accensum spiritus vitales ad membra affecta transmittat uberius. Aliqui aurum non aspectu, sed tactu prodesse ægris referunt, at potiùs alieno, hoc est, si medicis & pharmacopœis pro optimis medicinis in tempore administrandis, in manus tradatur. Vtrumque non nocere arbitramur, illud imaginatione patientis, hoc effectis agentium: Verùm aliqui externis hisce auri remediis non contenti, intrinsecus illud comedendum obferunt. Cùm verò sciant, id dentibus conteri

non posse, in limaturam subtilissimam reducunt, vel in folia extendunt tenuissima, atque ita miscent cum electuariis, conservis, pulveribus, syrupis aut liquoribus assumendis, non absque causa ac effectu, nempe ut corroboretur & spiritur vitali abundantiori illustretur. Quidam diffidentes corpulentæ ejus substantiæ, ignitum aurum aliquoties extinguunt in aquis cordialibus, atque ita propinant. Marsilius Ficinus de studioforum sanitate tuenda, libro secundo, utrumque modum jam dictum approbat, cum inquit: Aurum fermè potabile habebis, ut dicam: Collige flores borraginis, buglossæ, melissæ, quam citrariam nominamus: Et quando Luna Leonem subit vel Arietem, vel Sagittarium, aspiciatque Solem aut Iovem, eoque cum candido saccharo, aqua rosacea liquefacto, & pro qualibet uncia insere diligenter auri folia tria: Iejunus cum vino quodam aureo sume. Verùm alii considerantes auri compagines adeò firmas, ut non ab ignibus aut aquis fortibus superari aut dissolvi queant, non contenti extinctione ejus aut corpulenta administratione, id solvendum priùs & ad

medicinalem formam reducendum arbitrati ſunt; utque hoc effectum darent, innumeras vias inierunt, quæ omnes non aſpernandæ, ſed tamen earum aliæ aliis ſunt longè meliores & naturæ humanæ accommodatiores: Quidam ſolvere tentarunt aurum cum Mercurio communi: Atque hi facientes amalgama, tandem longa coctione & præcipitatione pulverem rubrum ſeu præcipitatum habuerunt: Alii ut hoc facilius & citius præſtarent, ſolverunt utrumque ſeu aurum amalgamatum cum Mercurio, in aqua regia, qua ſubtracta & aliquoties reſuſa, iterumque diſtillata, turbit, ut vocant, acceperunt, multis lotionibus edulcoratum intra corpus dandum: Alii amalgama aliis aquis corroſivis Mercurii ſublimate, ſulphuris per campanam diſtillati, aut eiufmodi ſolverunt, à quibus deſcribendis, veluti & uſurpandis abſtinemus: Quidam aceto acerrimo, ſpiritu urinæ aut ſalis ad eandem intentionem utuntur, iisſque aurum potabile fieri poſſe promittunt: Verùm hiſciant, Aurum potabile antiquorum Philoſophorum eſſe longè aliud, nempe abſque peregrinæ alicuius additione

factum ex Tinctura perfecta cum spiritu vini mixta, quæ cum paucissimis divinitus concessa sit, ejus loco Aurum potabile nihilominus fieri posse concedimus, ex auro calcinato debite & soluto iis mediis, quæ naturæ humanæ non sunt adversa at familiaria. Quidam solvunt aurum antimonio, vel Mercurio ejus, aut per se ignibus adustum continuis reverberantibus in pulverem, ut ajunt, redigunt medicinalem; qualem Moisen fecisse constat ex sacris literis, cum aurum vituli aurei combusserit in pulverem & Israëlitis bibendum propinarit. Quidam aurum in sulfur, oleum, sal, pulverem, ut pollicentur magis dictis, quam prestant rebus, conuertunt, atque sic Magnatibus vendunt, fortè plus veneni quam Alexipharmaci reconditum habens. Plus enim corrosivi illis compositionibus adesse suspicamur, quam auri, quicquid multi Thrasones jactent, quibus aurum lucrandum potius in mente, quam propinandum ægris in medicina propositum est, novo genere aucupii & quæstu uberrimo. Illi enim non solum lucrantur aurum (pro eo dantes nescio quid

frivolum) sed & animas hominum, ut Plinius falsè inquit, & faciunt experimenta per mortès: Horum experientiam Stratonicus Cytharœdus laudabit quorum benefacta Sol aspiciat, errores & malefacta terra tegat. Deus optimus Maximus concedat omnibus bonæ voluntatis & artis filiis legitimis, ad sui gloriam hominisque utilitatem, NEPENTHES illud Aureum ab Helena Telemacho datum, quo, ut ille, præteritorum laborum, luctus, doloris & malorum omnium oblivione capti, ipsi cum lætitia & animi quiete gratias agant sempiternas.

F I N I S



positive results of the test

the results of the test



